

~~11.5~~ ~~13~~ ~~33~~

~~75~~


~~52~~

167

B

33








JUS FEUDALE

NEAPOLITANUM, AC SICULUM.





14
MARINI GUARANI

IN UNIVERSITATE NEAPOLITANA

JURIS CIVILIS

PRIMARII PROFESSORIS

JUS FEUDALE

NEAPOLITANUM, AC SICULUM.

TOMUS III.

*Jus feudorum συναλλαττικον,
ac publicum exhibens.*



NEAPOLI MDCCXCIV.

EX TYPOGRAPHIA SIMONIANA.


Cum publica venia.



Ου πὰς φαρμακοπώλης κροκὸν πώλει .



*Viro • Incomparabili • Marchioni
Ferdinando • Corradino • Divini • Hu-
manique • Iuris • Scientia • Et • Usu
In • Regno • Neapolitano • Prae • Re-
liquis • Praefulgenti • Apud • Opti-
mum • In • Europa • Principum • In
Rebus • Ecclesiasticis • Atque • In • Am-
plissimo • Sacrarum • Privatarumque
Rerum • Consilio • Libellos • Agenti
Eximio • Philosophiae • Ac • Musarum
Severiorum • Alumno • Ingenii • Acu-
mine • Morum • Suavitate • Fide • Inte-
gritate • Constantia • Felicissimo • Ferdi-
nando • Ejusque • Augustae • Conjugi
Acceptissimo • Marinus • Guaranus • Ipsius
Amplitudini • Devotissimus • Obsequii
Sui • Testificationem • In • Praesens
Monumentum • Virtutis • Ejus • Ad
Posteror*



INDEX EORUM,

Quæ in tertio tomo continentur.

L I B E R III.

<u>TIT. I. De prohibita feudorum alienatione ex jure feudali communi, ac Neapolitano .</u>	<u>pag. 1</u>
<u>II. De assensu ob feudorum hypothecam præstari solito .</u>	<u>14</u>
<u>III. De feudi alienari revocatione.</u>	<u>31</u>
<u>IV. De universitatum proclamatione ad Regium demanium ex jure Neapolitano, ac Siculo .</u>	<u>48</u>
<u>V. Quatenus de feudis Siculi statuere possint per contractus ex capit. volentes.</u>	<u>71</u>
<u>VI. De militari servitio, & ad hoc ejus loco præstanda.</u>	<u>100</u>
<u>VII. De ad hoc quantitate ex jure Neapolitano .</u>	<u>114</u>
<u>VIII.</u>	

VIII.	<i>Quibus initiis barones ab op- pidanis exegerint adhoc dimi- dium .</i>	127
IX.	<i>De donativo ad rationem adhoc in Regno bodie præstari soli- to , & rata vassallorum , quam vocant .</i>	146
X.	<i>De militari Siculorum servitio , seu adhoc .</i>	163
XI.	<i>De relevio , quindenniis , a- liisque baronum præstationi- bus .</i>	180
XII.	<i>De relevio ex jure Siculorum novissimo .</i>	204
XIII.	<i>De juribus baronum intra feudi territorium .</i>	211
ULT.	<i>De jurisdictione baronibus concedi solita ex jure seu Nea- politano , seu Siculo .</i>	243

J U S F E U D A L E

NEAPOLITANUM, AC SICULUM

L I B E R III.

T I T U L U S I.

*De prohibita feudorum alienatione ex
jure feudali communi, ac Nea-
politano.*



Bi primum perpetuitas feu-
dis accessit, exinde quidem
heredibus sunt ea delata, a
primævo tamen instituto in
aliis non recefferunt. Iphis igitur adhuc
hæsit militare servitium, cum pro ra-
tione temporum aliunde Principes mi-
litares copias expectare non possent. Ita
ipsamet feudorum natura flagitabat, ne
ca per barones alienari jus esset. Licet
Tom.III. A enim

2 *Jus feud. Neap. ac Sic. L. III. T. I.*

enim cum militari servitio in alios feuda transferrentur, usu facile venire poterat, ut novi possessores imbelles forent, neque militiæ muniis sustinendis pares. Conf. Thomasi differtationem *de caus. prohib. alienat. feud.* Enimvero ut in aliis juris articulis inter absentiam Principum feudalem jurisprudentiam corruerunt Transiberini jurisconsulti, ita ejus quoque rei respectu cerebrosis suis interpretamentis ipsam ferme feudorum naturam cœptarunt evertere. Nam ante Lotharium II. eorum opera in Italia Transiberina recepta sententia Curiarum erat, ut alibi dimidium, alibi vel solidum feudum alienari liceret. Ita pessimo publico ad bellum seu arcendum, seu inferendum militum copia non suppetebat. Proinde idem Lotharius valenscentem illam feuda alienandi licentiam *perniciosissimam pestem Reipublicæ non mediocre damnum inferentem* appellat in
con-

constitutione , quam collector exhibet
consuet. feud. 2. 52. Quapropter veterum legum observantia ibi revocata , feudorum alienationem severius interdixit: si secus quid fieret , feudum ipsum alienatum , ejusque pretium in commissum venire jussit ; tabelliones vero , qui instrumentum de alienatione scripssissent , & infamia , & muneris amissione coercuit.

II. Enimvero non alias patuit , quam impune inter absentiam Principum Transiberinæ Curia saluberrimas Imperatorum leges everterent . Nam sub ipso Lothario , ejusque successore Conrado III. veluti ex compacto feudorum alienationes sententiis suis statim restituerunt . Proinde Fridericus Ænobarbus Conradi successor , constitutione Lotharii severius restituta , feudorum alienationes non solum in posterum fieri vetuit , sed & irritas haberi jussit alienationes illas , quæ ante legem a se latam expeditæ forent,

4 *Jus feud. Neap. ac Sic. L. III. T. I.*

scribæ , qui alienationis instrumentum scripsisset , dextera amputari jussa . Extat ipsa Friderici constitutio *consuet. feud. libr. 2. tit. 55.* Feudum igitur sine concedentis assensu alienatum *ad dominum libere* reverti jussit Fridericus *loc. cit.* Proinde si de feudis quidem in capite sit controversia , in causa commissi ea redibunt ad Principem . Nam si eam ob causam in commissum suffeuda venerint , ad ipsum baronem , qui ea concesserit , redire oportebit . Conf. Rosenthal. *c. 9. m. 1. conclus. 32.*

III. Porro ut recte feudum alienatum dicatur , ex jure feudali communi ne domini quidem consensus sufficere potest . Ea in re scilicet interesse placuit nova inter , & antiqua feuda . In feudis novis recte expedita censetur alienatio, si unius concedentis adsit assensus . Verum in feudis antiquis sine agnatorum assensu alienatio fieri nequit *consuet. feud. 2. 26. 5.*

Id

Id autem in feudis antiquis lex ipsa investituræ suavit, qua ab initio feuda non minus quæritori, quam liberis concessa intelliguntur; ut proinde baronis factum præjudicium agnatis in investitura vocatis creare nequeat. Eo accedebat, quod ex barbararum Gentium institutis in res a communi parente profectas non solum liberis, sed & agnatis jus competere credebatur, nec sine eorum assensu alienari posse. Hinc in instrumentis donationum in monasteria collatarum formula illa frequentissima, *cum heredum nostrorum consensu, & beneplacito; consentiente filio, & aliis heredibus*. Conf. Schilter. *ad jus feudal. Alemann. c. 64.*

IV. In præfenti autem argumento alienationis vocabulum latius quidem accipitur, ut generatim alibi, ubi quarundam rerum alienationem aut testatoris voluntas, aut lex ipsa prohibet. Proinde sine domini, atque agnatorum consensu

6 *Jus feud. Neap. ac Sic. L. III. T. I.*

feuda non solum vendi, legari, donari, atque in solutum dari non possunt, sed dotis etiam titulo, aut permutationis causa in alium transferri nequeunt *feud. consuet. 2. 42.* Hinc intelliges, cur collector edicat *consuet. feud. 2. 9.* baronem ne *pro anima* quidem de feudo *judicare* posse. De feudo enim *pro anima* judicare dicitur, qui illud Ecclesiæ donat, aut legat. In eam vero sententiam judicandi vocabulum haud infrequenter occurrit in monumentis sequioris ævi. Eo pertinet Caroli Magni illud in *Longobard. 2. 18. 4. Si quis Longobardus statum humanæ fragilitatis præcogitans pro salute animæ suæ de rebus suis voluerit judicare.* Indidem rationem reddes, cur neque per emphyteusim, neque per libellum, neque per censum in alterum transferre feudum baroni liceat, neque illud hypothecæ subicere *consuet. feud. 2. 55.* Proinde & in generali hypotheca a baro-

ro-

rone promissa feuda non continentur, nisi ea quoque cum consensu domini hypothecæ subjecta fuerint *consuet. feud. 2. 26. §. in generali*. Cumque, alienationis vocabulo generatim accepto, servitus etiam intelligatur *l. 7. ff. de reb. alien. non alien.* sine domini assensu ipse usufructus, aut alia servitus seu realis, seu personalis in feudum frustra constituetur *consuet. feud. 2. 8. princ.* Sed, his omissis, enucleemus, quid jure Neapolitano de feudorum alienatione placuerit.

V. Ubi primum Nortmannorum opera in Regno Neapolitano increbuere feuda, nulla lex quidem scripta eorum alienationes interdicebat; ipsis tamen moribus interdictæ censebantur, cum ipsa feudorum natura suaderet, ea quoquo titulo per possessores abalienari non posse. Proinde cum Nortmannorum apud nos Principatus aristocratiae specimen ab initio exhiberet, si quæ feudorum alienationes si-

8 *Jus feud. Neap. ac Sic. L. III. T. I.*

ne assensu Principis in veteribus monumentis occurrant, eas jure summi imperii per veteres illos dynastas factas oportuit. Hinc intelliges tot eorum diplomata, quibus liberalitatem adversus Ecclesias ostentantes de feudis pro more sæculi *pro anima* judicabant. Enimvero ubi pacis interfuit, uni deferri omnia, ac primo per Ducem Robertum, mox plenius per Rogerium Regem Nortmannorum aristocratia fuit abolita, rebus tandem pacatis; scripta etiam lege feudorum alienationes prohiberi cœperunt. Ita idem Rogerius leges laturus, quibus pace, & Principe uterentur, ne quid usquam Respublica detrimenti caperet, feuda non solum per Regni barones, sed & per ipsos Principes se prognatos alienari vetuit. Labet ob rei celebritatem ipsamet constitutionis Rogerianæ verba hic exhibere ex *libr. constit. 3. tit. 1.* Sic igitur ibi Princeps, qui jura Majestatis appri-
me

me tueri norat . Scire volumus Principes nostros , comites , barones , archiepiscopos , universos episcopos , & abbates , quod quicumque de regalibus nostris magnum , vel parvum quid tenet , nullo modo , nullo ingenio possit ad nostra regalia pertinens alienare , donare , vel vendere in totum , vel in partem minuere , unde jura nostra regalia minuantur , aut subtrahantur , aut damnum aliquod patiantur .

VI. Jam vero ad Fridericum II. delato rerum arbitrio , per ejus fortasse ætatem non defuerunt , qui avi sui Rogerii legem calumniarentur , eamque de sola feudorum donatione , aut venditione accipiendam contenderent . Proinde idem Fridericus Rogerii constitutionem secundum regulas consuetudinum feudalium interpretatus non solum quamcumque feudorum alienationem prohibuit , sed & generatim contractus omnes , quibus aut jura feudorum , aut res ipsæ feudales immi-

minuerentur, nisi assensu Principis expressim firmati forent *constit. constitutionem divæ memoriæ. de revocat. feudor.* Ibidem quoque, ne quid fieret in fisci fraudem, si qua de feudis controversia suscepta foret, litigantium compromisso finiri vetuit; de ea vero dictum arbitrium nullius momenti censi jussit. Ibi baronibus id tantum concessum, ut *excedentias*, quas appellant, locare possent sub eodem tamen servitio, aut redditu, quibus, antequam baroni delatæ essent, concessæ forent. Ceterum præ Lothario, avoque suo Ænobarbo in lege sua baronibus humaniorem se præstitit Fridericus. Si qua enim feuda sine assensu Principis quoquo modo alienata forent, atque in eis contra constitutionem suam aliquid cœptatum esset, feuda fisco non statim committi voluit. Pœnitentiæ igitur loco relicto, contrahentibus licere jussit, ut a contractibus in fraudem legis initis re-
fili-

filire possent . Sic enim ibi Fridericus .
Eisdemque contrahentibus, & alienanti-
bis concedimus potestatem, jure proprio
predicta omnia revocare . Regium autem
assensum non solum in reliquis alienatio-
nibus , sed & in feudorum adjudicatione
a magistratibus fieri solita adhiberi pla-
cuit . Id ita cautum , ut persona non
ignoraretur , ad quam feudum rediisset
pragm. 23. de feud.


VII. Illud in disceptationem venire
queat , num aut dotis nomine feudum
dari , promitti possit , aut saltem dotis
præstandæ , restituendæ causa obligari .
Quod ad primum , cum pro dote datio
pura puta sit alienatio , jure quidem feu-
dali communi , licet ex lege investituræ
feudum ad ipsam foeminam fortasse per-
tineat , dotis nomine dari , promitti ne-
quit *consuet. feudal. 2. 9. §. 1. Conf.*
Camerar. ad c. Imperialem fol. 83. In
ea re tamen ab jure feudali communi
Gvi-

Gvilelmus I. recessit. Is enim edixit, ut, si in hereditate patris deessent allodia, ac fratres tria, vel plura feuda possiderent, eorum unum dotis causa dare sorori possent, modo matrimonii venia speciatim a Principe concessa foret *constit. fratribus. de fratr. oblig. part. feud.* Id ipsum tamen in fisci damnum facile redire poterat. Proinde a Carolo II. sine assensu Principis id fieri vetitum. Si quid secus coeptatum esset, feudum dotis nomine sorori datum fisco committi iussit *cap. item statui mus, quod licitum.* Inde autem inferre licet, ne hodie quidem apud nos sine Regis assensu dotis nomine in viros feuda transferri posse, ut recte statuit Camerarius *loc. cit. lit. I.* Id ipsum autem obtinere debet, licet ad ipsam foeminam feudum pertineat. Proinde, si, quod quidam admittunt, dotis nomine feudum inæstimatum viro tradatur a foemina, nullum in feudum ipsum
jus

jus in virum transfertur; in eum transit jus tantum percipiendi fructus, quamdiu constiterit matrimonium; fructus autem potius uxoris nomine, quam jure suo vir percipiet, eaque facultate excidet statim ab uxoris obitu. Conf. de Marin. ad *decis. Reverter. 45. n. 8. & sequ.* Quod ad alterum, in allodiorum defectu dotis causa ipsa feuda obligari concessit Gvilelmus II. *d. constit. fratribus.*

VIII. Ita quidem apud nos olim: Enimvero novissimis Regni legibus respectu dotium baronum facultas latius fuit extensa: in feudis enim pro dote obligandis assensus ab ipsa lege conceditur. Nam ad preces Urbis cautum per Ferdinandum Catholicum anno 1505. ut seu peregrinæ mulieres cum civibus Neapolitanis collocarentur in matrimonium, seu Neapolitanæ mulieres peregrinis enubarent, feudis pro dote obligatis, statim a dotalibus instrumentis, licet impetratus non

non esset assensus, eis dotis nomine feudalis hypotheca competeret *pragm. 3. de feud.* Hoc autem taciti assensus privilegium ad *antefati* quoque, quod ajunt, præstationem Carolus V. extendi jussit *pragmat. 8. eod.* Quatenus tamen hypotheca isthæc mulieribus, eorumque heredibus prodesse possit, & an fisco detrimentum afferre queat, mox liquebit insequenti titulo.



TITULUS II.

De assensu ob feudorum hypothecam præstari solito.

SUPRA ostendimus, non minus ipsa feudorum natura, quam Lotharii II. & Friderici Ænobarbi constitutione inspecta, feuda alienari non posse; alienationis vero vocabulo hypothecam etiam conti-

tineri. Hypotheca scilicet jus in rem ipsam creditori parit, eaque constituta, serius ocius res eo redit, ut aut distrahatur, aut adjudicetur: ita igitur contra investituræ legem, ac directi domini voluntatem in alienas familias feuda transferri possent. Ea ferme de causa cum jure feudali communi, cum patrio cautum, ne sine consensu directi domini jus esset feuda hypothecæ subijci. Inde fit, ut, licet alias in conventionibus, generali hypotheca inita, omnia debitoris bona obligata censerī debeant, eadem tamen a barone promissa, si Principis desit assensus, feuda hypotheca non afficiantur. Conf. Fleischer. *instit. feud.* c. 18. §. 13.

II. Jam vero si sine consensu directi domini feudum fuerit hypothecæ suppositum, jure quidem feudali communi id fisco committitur *consuet. feud.* 2. 55. Jure autem Neapolitano neque feudum hypotheca afficit, & a contractu recedere

re

re impune licet *constit. constitutionem di-
væ memoriæ . de revocat. feud.* Illud ta-
men disceptatum video, num, si de suf-
feudis obligandis agatur, unius immediati
domini consensus sufficiat, an & consen-
sus mediati domini requiratur, a quo feu-
dum ipsum in capite fuerit acceptum. Ea
de re ex jure feudali communi facile de-
cerni potest. Nam ex constitutione Lo-
tharii, immediati domini intercedente
consensu, suffeudorum alienatio non pro-
hibetur *consuet. feud. 2. 52.* Exinde ta-
men & alia controversia enasci queat,
utrum scilicet in defectu feudalis heredis
ad Principem redeunte feudo, ad eum
id redeat cum hypothecæ onere in suf-
feudum promissæ. Ea sane in specie de-
terior respectu feudi fisco conditio inferri
non potest. Proinde ipse quidem imme-
diatus dominus & ratam habere hypothe-
cam debet suo assensu initam, &, ad
eum suffeudo redeunte, cum onere hy-
po-

pothecæ redit. Si tamen feudum ipsum Principi deferatur, creditor ejus hypothecæ nomine non potest in fiscum agere. Interest igitur creditoris, ut in subfeudis obligandis non minus immediati domini, quam Principis etiam consensus obtineatur. Atque hic discrimen inter hypothecam, & alienationem per subinfeudationem fieri solitam juvabit advertere. Hypothecam enim, ut vidimus, in suffeudum sine Principis assensu contractam fiscus agnoscere non adigitur. Contra alienationem per subinfeudationem initam, quæ apud Neapolitanos, ac Siculos baroni permittitur in feuda, quæ *plana*, & *de tabula* dici solent, ratam fiscus habere debet, licet subinfeudatio sine assensu Principis facta ponatur. Id ipsum tamen ultra feuda, quæ plana & de tabula appellari diximus, extendi non debet. Vide *d. constit. constitutionem divæ memoriæ*, & quæ monuimus *libr.*

1. *tit. 4. §. 4. & sequ.*

III. Ex dictis liquet, utilem tandem in feudum hypothecam evadere, ubi Principis assensu firmata fuerit. Inde autem facile decerni queat de celebris usus in foro controversia, uter creditor scilicet in ipso pretio feudi sub hasta venditi potior sit habendus, qui priorne feudum sibi obligari curarit, an qui prior quidem impetrarit assensum, sed, obligationis inspecto tempore, sit posterior. Haud inepte quis dixerit, pecuniam ex feudi venditione redactam a feudo diversam esse, & ad res potius burgensaticas pertinere; in ea igitur præferendum, qui primus licet sine assensu hypothecam sibi in feudum quæsierit. Enimvero inficias quidem haud iverim, pecuniam ex feudo redactam inter res burgensaticas referri oportere: id ipsum tamen ad præsentem speciem extendi non debet, in qua ponitur, jussu ma-
gi-

gistratus feudum fuisse distractum. Iniquum enim esset, ut magistratus opera durior cuiquam conditio inferatur. Cum igitur feudalis hypotheca consistere tandem incipiat, ubi per assensum confirmata fuerit; in presenti etiam controversia feudi pretium ipsum veluti feudum repræsentet; qui assensum primus impetrarit, in ipso feudi pretio præferendum putem. Ea vero sententia ipsi Sacro Consilio se commendavit apud de Franch. *decis.* 75. *n.* 10.

IV. Porro veteri Neapolitano jure assensum ob feudalem hypothecam concedi solitum cum formula *pro hereditibus ex corpore* concedi oportebat. Proinde si feudum hypothecæ suppositum de jure Francorum esset, ante latam pragmaticam 27. *de feud.* ex creditoris liberis tantum filius natus major hypothecaria in feudum actione agere posse credebatur de Franch. *decis.* 41.

n. 1. Hinc & hodie si feudum de jure Francorum cum pacto redimendi sit venditum, in eo redimendo ex pluribus venditoris liberis filius etiam natu major præferri debet. Actio enim ob feudum eodem jure cum feudo censeatur, ut recte monuit idem præses de Franch. *decis.* 75. n. 4. Id cum regulis consuetudinum feudalium consonare videtur, & tota aberrat via Schraderus *tractat. feud. p. 7. c. 3.* edicens, actionem hypothecariam in feudum constitutam jure allodii censendam esse, & in heredem quemlibet transferri posse. Ut cumque ea de re jure communi sit cautum, apud nos ob prædictam in assensu formulam, si creditoris heres extra gradum successionis feudalis esset, adversus baronem, qui cum assensu feudum obligasset, hypothecariam instituire non poterat. Id ipsum tamen & nullum commodum fisco afferebat, & contra-

tractibus erat impedimento. Vix enim invenire erat, qui pecuniam baroni crederent, quam petere non possent heredes, qui intra gradus successionis feudalis non essent. Proinde Neapolitana Civitas Philippum II. precibus interpellavit, ut ab assensibus ob hypothecam in feuda præstari solitis tolleretur clausula illa *pro heredibus ex corpore*; actionis autem in feuda experiundæ causa agere possent heredes omnes, licet in gradu feudali non forent. Precibus autem Princeps indulgit, hanc tamen beneficio suo legem dixit. *Placet Catholicæ Majestati concedere dicto Regno, quod per ipsum supplicatur, dum tamen in hoc minime comprehendantur feuda devoluta, vel devolvenda ad Regiam Curiam, vel possessa a feudatario non habente successorem in feudo, pro quibus Curia nostra de evictione teneatur, minimeque ex quorum hypotheca, & alie-*

22 *Jus feud. Neap. ac Sic. L. III. T. II.*

natione aliquod detrimentum hac de causa Regiæ Curia generari possit : bis enim in casibus vult sua Regia Majestas interpretari, & declarari, assensum fuisse expeditum in antiqua forma reducente, & declarante pro heredibus ex corpore, non obstante clausula in assensu apposita, pro heredibus quibuscumque. Hodie igitur successoribus quibuscumque, seu universali, seu singulari titulo ii successerint, ob hypothecam in feudum licet agere, modo ne actio in fisci detrimentum cedat d. pragmat. 27. de feud.

V. Rursus veteri Neapolitano jure in feudis hypothecæ subjiciendis ordinaria erat in assensus præstatione clausula *in defectum bonorum allodialium*. Formula isthæc eo pertinebat, ut creditoribus ob hypothecam in feudum agere jus non esset, nisi prius bona allodialia excussa forent, atque inde solidum præstari
non

non posset *pragm. 4. de feud.* Id ipsum tamen contractibus erat impedimento, & rarissimi quique inveniebantur, qui sub ea lege pecuniam baroni crederent. Proinde Carolus V. precibus a Neapolitanis aditus generatim indulxit, ut porro ea clausula assensibus non apponeretur *pragm. 7. de feud.* Hodie igitur si cum Principis assensu hypothecæ fuerint feuda supposita, integrum creditori erit, statim ab initio hypothecariam actionem in feudum instituere, neque ad excussionem allodiorum devenire cogitur, modo nullum inde detrimentum in fiscum sit rediturum.

VI. Ex dictis liquet, in patrii juris ignorantia versari eos, qui in obligationibus cum Principis assensu contractis subsidiariam tantum actionem in feudum admittunt, neque ad eam deveniendum putant, nisi prius baronis allodia fuerint excussa. Ex quo enim

Carolus V. clausulam in assensibus illam adhiberi vetuit *in defectum bonorum allodialium*, liberum creditori fuit, feudis, & allodiis obligatis, seu in feuda, seu in allodia hypothecariam instituere. Id autem non minus cum jure Neapolitano novissimo, quam cum Romano convenit. Nam, ut scribit Modestinus *in l. 8. ff. de distract. pign. & hypoth. creditoris arbitrio permittitur*, ex pignoribus sibi obligatis, quibus velit distractis, ad suum commodum pervenire. Ita vero in ipso Collateralī Consilio judicatum docet Franciscus Reverterius *in decis. 459.* Neque regeas, fisci utilitatem exposcere, ut in feuda potius in subsidium creditores agant. Præsens enim controversia intra speciem coerceri debet, in qua nullum fisci detrimentum versatur. In ea vero positione fisci potius interest, ab initio hypothecariam in feudum instituere. Ven-
dito

dito enim feudo, hypotheca resolvitur; in persona igitur emptoris hypothecæ onere feudo liberato, fisci melior fit conditio. Quid quod aliquando æquitas ipsa suadet, ut creditor in feudum ipsum omnino actionem instituat? Si enim in creditorum concursu quidam tantum in allodia sibi actionem quæsierint, quidam & allodia, & feuda cum assensu sibi obligari curarint, hos æquus iudex compellet in feudum potius hypothecariam experiri. Si enim in allodia eis permittatur agere, facile res eo redit, ut, quibus tantum allodia obligata fuerint, pecuniam suam amittant: eam vero veluti receptam in foro sententiam ætate sua fuisse testatur de Marin. *resolut. libr. 2. c. 16. n. 15.* Ceterum ob singularem affectionem in feuda lubens ego concefferim, ubi creditoribus per allodialium distractionem possit sine ipsorum incommodo satisfieri, ad feudorum ver-

venditionem deveniri non oportere, ut recte ibidem monuit de Marin. *n.* 17. Id ipsum in Regia Camera in ipsa dotis causa judicatum tradit idem Reverterius *decis.* 579.

VII. His ita præstitutis, nodus hic occurrit interprete dignus. Finge enim feudum obligatum cum assensu seu *hominis*, seu quem *legis* appellant, ob defectum feudalis heredis ad fiscum redire, ea in specie disceptari queat, an in allodiorum defectu subsidiaria actio in fiscum ipsum possit institui. In proposita autem controversia magis se mihi adprobat eorum sententia, qui ne subsidiaria quidem actione fiscum conveniri posse censuerunt. Eo me trahit & præsumpta Principis in assensu concedendo voluntas, & ipsa feudalis instituti ratio. Nimirum assensus a Principe præstari solitus legis tantum impedimentum tollit, quo utile feudi domi-

minium quoquo modo baronibus alienare non licet : præsumi tamen haud potest , per eam veniam Principem dominio suo directo præjudicium creatum velle , si ad eum feudum redierit . Assensus enim est stricti juris , eoque directum ipsum feudi dominium obligatum videri nequit , nisi expressim a Principe concessum id fuerit . Ut id fiat , alterius legis venia impetrari debet , qua in feudo constituendo tacite placuit , ut in casu regressus ad fiscum , prout concessum ab initio fuerat , oneris cujuscumque expers Principi deferretur . Ut autem lex ea quoque remissa intelligatur , in assensu pro hypotheca concedendo Princeps expressim etiam indulgere debet , ut rediens ad fiscum feudum ad eum cum hypothecæ onere revertatur . Eo³ accedit , quod in assensu impertiendo Princeps promissoris jure censerî debet ; in dubio autem secundum

28 *Jus feud. Neap. ac Sic. L. III. T. II.*

dum promissorem interpretationem jus fieri jubet *l. 99. ff. de verbor. obligat.* Vid. Thom. Carleval. *disput. jur. libr. 1. tit. 3. disput. 23. n. 54.*

VIII. Jam vero, quod ad patrias Regni leges, ipsa in assensu impertiendo formula adhiberi solita in propositam sententiam decretoria videri queat, *juribus* scilicet *Regiæ Curiae semper salvis*. Nisi quis enim cavillari velit, verba isthæc id potissimum spectant, ut ob concessum assensum nihil fiscus detrimenti capiat, si quando feudum ad eum sit rediturum. Sed & ea in re palmarium pro fisco est, quod edicit Philippus II. in privilegio per Neapolitanos petito *in pragmat. 24. de feud.* Ibi scilicet a Principe Neapolitani petunt, ut legis assensus ob dotis securitatem concessus intelligatur concessus omnibus, quibus dotem restitui oporteret. Id quidem Princeps ipsis indulget, privilegio
ta-

tamen hunc modum imponit. *Placet Regiæ, & Catholicæ Majestati citra tamen præjudicium Regiæ Curiaë, quancumque, & quomodocumque dicta feuda ei devolventur.* Si quid video, ibi in ipsa dotis causa, quæ maxime favorabilis est, subsidiaria in fiscum actio denegatur, ubi feudum obligatum ad eum redierit. Generatim igitur, hypothecæ supposito cum assensu feudo, ne in subsidium quidem hypothecaria adversus fiscum actio videtur accommodanda. Hæc ferme perpendens Philippus IV. literis suis Proregem apud nos agentem monuit, ut, prædictis rationibus accurate perpendi jussis, fisci indemnitati consulendum curaret, ubi feuda hypothecæ supposita ad eum reverterentur. Memoratas literas exhibet Thomas Carlevalius *disput. jur. libr. 1. tit. 3. disput. 23. n. 71.* Eæ tamen fisco non profuerunt, ac recepta ferme est hodie
in

in foro sententia , ad fiscum reverso feudo , adversus eum saltem in subsidium agi jus esse . Vide Reverter. *decis.* 579. & de Marin. *alleg.* 116. *n.* 19. Recte igitur hodie ob feudorum obligationem vix assensum Princeps indulget : si vero præstet assensum , cautio in eo apponi solet , ne *in casu devolutionis* aliquid fiscus detrimenti capiat , ut rerum periti norunt . Si tamen factum id fuerit , contractus , ob quem concessus fuerit assensus , intra tres menses absolvi debet ; si secus fiat , res eo redit , quasi concessus videri non debeat . Id ita placuit , ne ob mutata rerum adjuncta assensus in fisci detrimentum cedat *pragm.* 10. *de feud.*



TITULUS III.

De feudi alienati revocatione.

Supra monuimus , feudum alienari non posse ; si vero sine consensu domini fuerit alienatum , in commissi causam venire : suo quoque loco docuimus , per consuetudines feudales jure veluti fiduciario feudum possideri , eoque non tantum primum quæsitorem investitum intelligi , sed & generatim omnes eo prognatos . Proinde in antiquis feudis alienandis non tantum domini , sed & agnatorum consensus impetretur , oportet . Si secus fiat , dominus ob illatam injuriam feudum vindicare potest : id ipsum & agnatis licet ob interceptam ipsis successionem per injustam alienationem . Ea vindicatio in jure feudali *feudi revocatio* dicitur . Hinc duplex feudi

di revocatio , prout eam instituit vel dominus , in cujus contemptum feudum alienatum fuerit , vel agnatus proximus , in cujus potissimum detrimentum alienatio cedit . Ratio igitur instituti flagitat , ut paucis enarremus , quid seu per jus feudale commune , seu per patrias Regni leges de utraque revocatione sit cautum .

II. Primo igitur , cum sine domini venia feudum vassallus alienans eum contemnere videatur , sine ipsius assensu alienato feudo , id per dominum revocari potest *consuet. feud. 2. 24. §. ult.* Cum tamen in pœnalibus latiore fieri interpretationem haud oporteat , ac feudi revocatio pœnæ rationem habeat ; alienationis vocabulo non nudus contractus hic intelligitur , sed quem & traditio cum animo transferendi domini sequuta fuerit . Alienatum enim proprie dici nequit , quod adhuc in dominio venditoris

toris manet *l.67. ff. de verbor. signif.*
Proinde & constituta sine assensu hypo-
theca, feudum a domino revocari non
potest, nisi per antichresin saltem id tra-
ditum creditori fuerit. Hinc cum feu-
dum plura plerumque prædia comple-
ctatur, eorum aliquo tantum alienato
sine consensu domini, id tantum in com-
missum venit. Indidem si ejusdem feu-
di plures sint domini, & unius tantum
assensus in alienatione defuerit, pro ejus
tantum rata feudum committetur *con-*
suet. feud. 2. 28. At vero ob illicitam
alienationem commissio feudo, cum feu-
dum ipsum, cum pretium ad dominum
redire debet *consuet. feud. 2. 52.* Tan-
tum bonæ fidei emptori concedi placuit,
ut evictionis nomine adversus vendito-
rem experiri posset. Ea igitur in specie
non tantum pretium consequetur, sed
& quatenus sua interest, sibi pro allo-
dio obtrusum non fuisse feudum *consue-*

34 *Jus feud. Neap. ac Sic. L. III. T. III.*
tud. feud. 2. 26. §. si vassallus feu-
dum.

III. At vero alienatione sine domini consensu inita , feudum novum inter , & antiquum interest . Nam , ob illicitam alienationem novo quidem feudo revocato , id liberum redit ad dominum , ac de eo pro arbitrio statuere potest , licet liberi alienanti superstites sint futuri . Nam primi quæstoris culpa omnibus nocet , qui ab eo causam habere quandocumque possint . Enimvero in feudo antiquo aliud obtinere placuit . Nam id quoque ob illicitam alienationem domino deferatur : verum in feudis id genus vassalli culpa agnatis obesse nequit . Igitur post alienantis obitum ab agnatis feudum vindicari poterit *consuet. feud. 2. 24.* Cum vero delicti pœna per pœnitentiam non remittatur , atque , ut ostendimus supra , statim post traditionem feudum deferatur domino ;
in-

inspecto jure feudali communi, denegatum baroni videtur, ut alienationem revocare possit; ita vero commissi poenam effugere, saltem si post traditionem intercefferit non modici temporis intervallum. Verum ea in re apud Neapolitanos, ac Siculos benigniorem baronibus se præstitit Fridericus II. Is enim feudum illicite alienatum statim a traditione in causam commissi venire vetuit. Loco enim poenitentiae patere jussu, contrahentibus ipsis indulgit, ut & rescindere contractum possent, eisque liceret acta, transacta omnia revocare *constit. constitutionem divæ memoriæ. de revocat. feudor.* Eo autem jure hodieque in Regno Neapolitano utimur nullo discrimine, seu de venditore, seu de emptore sit controversia.

IV. Prædicta autem Friderici constitutio juri feudali communi non omnino obrogavit, neque fisco facultatem

ademit, quominus feudum illicite alienatum vindicare posset. Ibi tantum concessum contrahentibus, ut *jure proprio* rescindere contractum possent; ita vero poenam, quam *caducitatis* appellant, efugere. Quamvis vero alterutrius contrahentis culpa assensus jam impetratus vitiosus evaserit, ille etiam, cujus culpa vis assensus fortasse corruit, & contractum rescindere, & revocationem instituere non prohibetur. Ita quidem si, assensu jam impetrato, intra legitimum tempus fidelitatis juramentum præstitum ab emptore non fuerit, ea quidem in specie ipsius emptoris culpa vitiatur assensus; is tamen & revocationem instituere potest. Vide de Marinis *resolut. libr. 1. c. 23. n. 22. & sequent.* Licet igitur in aliis juris articulis qui actum nullum reddidit culpa sua, eo vitio se tueri nequeat, atque æque adigatur ad omnia, ac si contractus vitiosus

sus non evasisset, id ipsum tamen contra emptorem revocationem instituentem allegari nequit. Posita scilicet commissi poena, quæ hodieque, assensu resoluta, evitari non potest, ne pretium amittat emptor, ei denegari non debet, quominus beneficio Fridericianæ constitutionis utatur, ac præoccupando fisci petitionem poenam effugiat, ubi in casum res incidit, in quo assensus pro non impetrato censeretur. Ita vero in proposita specie ipsum Sacrum Consilium pronuntiassse testatur Josephus de Rosa *consultat.* 15. n. 1. Nunc, quod superest, de revocatione, quæ agnatis competit, videamus.

V. Secundum consuetudines feudales non tantum dominus ipse sine sua venia feudum alienatum revocare potest, sed, si id fuerit antiquum, agnati quoque ex primo quæsitore exorti feudum recte revocant, licet cum assensu domi-

ni alienatum id fuerit. Enimvero quæ agnatis revocatio competit, vel ex succedendi jure promanat, atque ea, mortuo tandem alienante, potest institui; vel ex jure *πρωτιμυσιως*, seu prælationis oritur, eamque, vivo adhuc alienante, instituere licet. Ad rectam igitur juris intelligentiam de utraque revocatione pauca monebimus.

VI. Quod igitur ad revocationem, quæ ex successionis jure promanat, licet cum consensu domini alienatum sit feudum, agnatus proximus sine solutione pretii illud revocare potest *consuet. feud. 2. 39.* Feudi scilicet ex pacto, & providentia, quod sane feudorum genus in jure communi proponitur, facta censeatur investitura non primo quæritori tantum, sed & omnibus eo prognatis. Feuda igitur id genus jure fiduciario possidentur, & in ea jus possessoris cum facto mortalitatis extinguitur. Proinde si
per

per possessorem alienata fuerint, agnati, quos dominus in concessione respexerit, pretio non restituto, ea vindicare poterunt, modo alienantis hereditate se abstinuerint. Cum vero ob ipsum investituræ pactum post alienantis obitum agnato proximo feudi successio defertur, neque alteri per alterum iniquiorem inferri conditionem oporteat, non solum alienationem ipsam agnatus proximus recte rescindit, sed & si quid oneris per defunctum feudo fuerit impositum, id ratum habere non cogitur. Proinde, feudo revocato, & servitutes, & hypothecæ corruunt, licet cum assensu Principis id fuerit hypothecæ suppositum *consuet. feud. 1. 5. & 2. 8.* Aliunde, ut recte Camerarius monet ad *c. Imperialem p. 110.* in favorem cuiuspiam alienatione prohibita, hypotheca etiam interdicta censetur. Cum vero, résoluto jure dantis, accipientis quo-

40 *Jus feud. Neap. ac Sic. L. III. T. III.*

que jus perimatur, ipsam locationem a defuncto initam agnatus ratam habere non debet. Inde igitur argumento deducto recte Regia Camera nuper pronuntiavit, feudo ob heredis feudalis defectum ad Principem redeunte, locationem rescindi oportere.

VII. At vero quod diximus, successionis jure per proximos agnatos feudum antiquum revocari posse, ea quidem facultate ii uti possunt secundum proximitatis ordinem. Nimirum agnatis jus revocandi competit ob ipsam investiturae legem, & ex providentia concedentis. Atqui voluntate concedentis inspecta, feudum ad omnes simul agnatos pertinere non potest, ac tandem post possessoris obitum ad gradu proximum redire debet. Id aperte edicitur *consuet. feud. 2. 26. §. Titius filios*. Cum eo etiam loco consonat Papinianus ipse *in l. 69. §. 3. ff. de legat. 2.* Sed in re ce-
le-

leberrima ipsa jurisconsulti verba lubet
exscribere. Ita igitur ibi Papinianus in
specie haud absimili. *Fratre herede in-*
stituto, petiit, ne domus alienaretur,
sed ut in familia relinqueretur; si non
paruerit heres voluntati, sed domum a-
lienaverit, omnes fideicommissum petent,
qui in familia fuerunt. Quid ergo, si
non sint ejusdem gradus? Ita res tem-
perari debet, ut proximus quisque primo
loco videatur invitatus: nec tamen ideo
sequentium causa propter superiores in
posterum laedi debet. Quapropter agna-
tus gradu remotior revocationem insti-
tuere nequit, si alius gradu proximior
aut consensum alienationi præstiterit, aut
de jure suo experiri nolit: eo tandem
mortuo, agnatus gradu remotior revo-
cationem coëptare poterit d. §. Titius
filios, & d. l. 69. §. 1. ff. de legat. 2.
Id inde manat, quod agnato remotiori
non defertur jus succedendi, nisi post
al-

alterius obitum , qui eum ordine præcedebat . Conf. Hartmann. Pistor. *libr. 2. quest. 6. n. 59. & sequ.* Sed isthæc rectæ juris communis intelligentiæ tantum inservire queant . Nam in Regno quidem Neapolitano revocationi feudorum , quæ manat ex succedendi jure , jamdiu recepti mores obrogaverunt . An autem in Sicilia ea facultas in *capit. volentes* agnatis adempta fuerit , sententiam dixi meam *libr. 2. tit. 4. §. 12. & sequ.* Quod igitur magis refert , de facultate revocandi , quæ agnatis competit prælationis jure , pauca monebimus .

VIII. Præter revocationem , quam ex jure succedendi manare diximus , eam etiam agnati instituere possunt , quæ ex jure *participations* , seu prælationis oritur . Id ita placuit , quia qua ætate feudales consuetudines valescebant , in plurimis rerum articulis retractus legitimus passim

sim per Europam jam inoleverat. *Conf. jus Regn. libr. 4. tit. 2. §. 4.* Non mirum igitur, si in agnatorum favorem id quoque juris in feudis invaluerit *consuet. feud. 2. 26. §. Titius filios*. Quod tamen ad revocationem ex prælationis jure manantem, in diversas sententias abiere doctores. Complures Iferniam sequuti ad §. *Titius filios* existimarunt, filiis quidem, alienante vivo, revocationis postulandæ jus esse, agnatos tamen nisi post alienantis obitum eam postulare non posse. Alii contra censuerunt, generatim agnatos sine discrimine, vivo adhuc alienante, ad revocationem admitti oportere. Verum præstat asserere, vivo adhuc alienante, agnatum proximiorum ad prælationem per consuetudines feudales admitti. Id quidem explorati juris videri debet, neque ea de re dubitari patitur consuetudinum feudalium collector *libr. 2. tit. 3. §. 1.*

Et tit. 26. d. §. *Titius filios.*

IX. Sed & illud adhuc disceptari possit, an, feudo agnato remotiori vendito, agnatus ipse proximior uti possit prælationis jure, ac, restituto pretio, feudum vindicare. Ea in specie si quis ex jure civili argumentari velit, haud inepte dixerit, agnato proximiori prælationem denegandam esse. Aperte enim definit jurisconsultus in l. 67. §. 2. ff. de legat. 2. fundo extra familiam alienari vetito, agnato remotiori eo legato, per agnatum proximiorē ab eo fundum vindicari non posse. Verum in feudali-
bus controversiis nec tuto, nec semper ab jure civili argumentari licet. Sane non conveniunt juris feudalis interpretes, an adversus remotiorem agnatum eo nomine proximior possit agere. Dissidentium doctorum cohortes ea in re late producit Hartmannus Pistoris *libr. 2. quest. 12.* Verum, semoto partium studio,

dio , affirmans sententia , inspecto jure feudali communi , præferenda videtur . Sane id aperte liquet ex *tit. 26. libr. 2. §. Titius filios* . Sic enim ibi collector . *Titius filios masculos non habens partem suam feudi Sejo partem ejusdem feudi possidenti agnato suo concessit . Sempronius proximior agnatus , mortuo demum Titio , partem illius feudi , nullo dato pretio , recuperare potest . Quod si Titius filios proprios haberet , pretio reddito , etiam vivo Titio .* Inde scilicet duo liquent , nimirum & alienato feudo , pretio restituto , filios ad revocationem admitti , & adversus remotiorem agnatum prælationem proximiori non denegandam . Conf. *Thomas. de Marin. de feud. de pact. & provid. tit. 2. n. 68.* Ceterum nisi ea in specie , soluto pretio , proximior ad revocationem admitteretur , privilegium agnati remotioris & elusorium esset , & ei damnum
af-

afferret . Nam post alienantis obitum jure successionis , ac sine pretio agnatus proximus feudum revocaret . At vero cum jus prælationis in consuetudinibus feudalibus agnato tantum proximiori asseratur , egregie fallitur Afflictus ad *consuet. feud. sub rubr. per quos fiat invest. §. sed & res n. 4.* Nam ibi is quidem edicit , ad prælationem in feudis secundum edictum successorium agnatos admitti ; eam igitur , si proximior nolit , remotiorem postulare posse . Conf. Hartmann. Pistor. *libr. 2. quæst. 12. n. 64. & sequ.* Inficias tamen haud iverim , Afflicti sententiam ob fori æquitatem se magis pragmaticis commendasse .

X. Quod autem ad tempus revocationi postulandæ præfinitum , interest , num successionis , an prælationis jure ea institutur . Si successionis jure revocatio postuletur , ad tricennium usque postulari pot-

poterit . Primo enim actionibus in jure feudali concessis , nisi expressim aliud statuatur , tricennii tantum præscriptio opponi potest , ut passim doctores adnotant ad *consuet. feudal. 2. tit. 26. §. 4.* Deinde qui feudum jure successionis revocat , ejusdem juris cum eo censerī debet , qui hereditatem vindicat ; vindicatio autem hereditatis ad tricennium usque potest institui , nec longi temporis præscriptione perimitur *l. 8. C. de jur. deliber.* Cum vero tempus adversus eum non currat , qui nequeat per leges agere ; vivo autem alienante , eo nomine actio nondum agnato competat ; tricennium revocationi jure successionis petendæ ab ipsius alienantis obitu computari debet . Conf. Struv. *syntagm. jur. feud. c. 13. aphor. 18.* Secus placuit , si revocatio jure prælationis petatur . Ea enim in specie tantum intra annum a die scientiæ licebit agere *consuet. feudal.*

dal. 2. 26. §. Titius filios. Licet autem memoria nostra retractum legitimum intra arctiores limites coerceri placuerit, cum tamen in lege ea de re lata feudorum mentio nusquam injecta fuerit, in eorum venditione intra annum a die scientiæ prælatio denegari non debet, si eam postulet, qui ex Regni legibus ad feudalem successionem admittitur.



T I T U L U S IV.

De universitatum proclamatione ad Regium demanium ex jure Neapolitano, ac Siculo.

DEmanium sequioris ævi vocabulum dominum significat; κατ' ἐξοχὴν tamen & in Friderici constitutionibus, & apud sequioris ævi scriptores

res ipsius Regis dominium designare solet. Ita quidem Alexander Abbas *invit. Roger. Reg. Mandavit illis, qui castro ejus præerant, ut & ipsi Regis quantocius suscipiant demanium.* Sed in re maxime testata tempus non lubet absumere. Universitates igitur ad Regium demanium proclamare dicuntur, si in venditione feudi prælationem petant; ita vero ab utili baronis dominio in Regis ipsius potestatem, nullo minori domino intermedio, transferri postulent. Nimirum nota quædam servitutis oppidanos sequitur, qui baroni subsumunt. Id jure, an injuria passim scriptitetur, in præsentī definire non lubet. Ea igitur de causa universitatibus invideri non oportebat, ut sine baronis, ac Principis detrimento in Regis ipsius dominium, nulla intermedia potestate, migrarent. Eorum igitur exemplo, qui in servitute detenti proclamabant olim

ad libertatem, universitates etiam ad Regium demanium proclamare dicuntur, si in feudi venditione, veluti in libertatem se asserturæ, jure prælationis revocationem instituunt, atque, alio domino non intermedio, in Principis ipsius dominium transferri petant.

II. Jam vero universitatibus ad Regium demanium facultatem proclamandi competere, non minus oppidanorum, quam ipsæ Principatus rationes suadent. Exploratum est scilicet, per feudorum concessiones publicis redditibus imminutis, & Principatus veluti nervos incidi, & ob intermediam illam potestatem a Principe longius recedendo feudorum incolas baronum potius, quam Principis jussa expectare insuescere. Constat etiam, non raro feudorum incolas ob jurisdictionem baronibus concedi solitam & eorum potentatu vexari, & injustis oneribus atteri. His ferme de causis utriusque

que Regni lege primordiali placuit, ut feudi titulo privatis concessa oppida ad Regium demanium proclamare possent. Ad eam autem facultatem universitatibus asserendam perperam trahi video Friderici constitutionem *dignum. de jur. suo Cur. observ.* In ea enim de eo universitatum jure nec vola, nec vestigium. Ibi tantum a Friderico cautum, ut feudorum detentores, qui intra præstitutum tempus legitimas concessionem non adprobarent, ea Principis demanio restituerent. Multo minus in eandem sententiam argumentum desumi queat ex *constit. personas. eod.* Ibi enim id tantum Fridericus edixit, ne, qui barones viribus præcellebant, imbecilliores, qui minuscularia feuda a Principe impetrassent, ad jurandam sibi fidelitatem adigerent: quo quidem facinore cum Principatus periculo factiosi quidam vires suas augebant. Aliunde igitur ejus ju-

ris originem repetamus, oportet.

III. Ut eo autem perveniamus, illud in antecessum est advertendum, jus Regii demanii postulari posse vel per universitates, quæ ab utriusque Regni primordiis in Regio demanio relictæ fuerint, vel per eas, quæ feudi titulo concedi solitæ prælationem in venditione petant ad Regis demanium redituræ. Alia est autem demanii postulandi ratio in locis in demanio Principis ab initio fervari jussis, alia in locis titulo feudi concedi solitis. Utrumque juris articulum paucis enarrabimus.

IV. Quod igitur ad universitates, quæ in utriusque Regni primordiis in Principis ipsius demanio relictæ fuerunt, ipsa ratio Principatus suavit, ut, si quando ob publicas necessitates feudi titulo e publico patrimonio decerperentur, in venditione prælatione petita, ad Regium demanium provocare possent. Ita enim
&

& ipsarum universitatum indemnitati consulebatur, neque per infaustam illam oppidorum avulsionem a Principe vis Principatus deterebatur. Licet enim universitate in venditione prælata, Principis reditus adhuc imminuantur, interest tamen Principatus, eos potius ab universitate percipi, quam cum incolarum inopia in baronem confluere. Eo accedit, quod majorem ab oppidanis fidem Princeps expectare possit, si ei, nulla intermedia potestate, subsint, quam si mancipia baronum evadant. Prætereo, quod oppidani, si baronum opera non deglubantur, promptius Principi præstare possint auxilium. Hæc ferme perpendentes utriusque Regni primi conditores Nortmanni complura quidem oppida commilitonibus suis gratificati feudi titulo sunt elargiti, ad munimentum tamen Principatus oppida multa quoque in demanio suo retinuerunt. Ne qua vero

ex parte vis Principatus resolveretur, in utroque Regno primordiali lege caverunt, ne, quæ loca in communi ferme naufragio in demanio Principis servata forent, per infeudationem abalienari jus esset.

V. Facile autem evinci queat, lege sua primævâ cavisse Nortmannos, ne in demanio Principis relicta oppida feudi nexu, mancipioque alienari jus esset. Eo primo me ducit, quod de Innocentio III. memoriæ proditur apud Carusium *biblioth. histor. Sicul. tom. 2. pag. 648.* Constat scilicet, Innocentium Frederici II. balium per ejus infantiam in Neapolis, & Siciliae Regno legislatorem egisse. Is vero politicam utriusque Regni constitutionem restitutus cavisse narratur *loc. cit. ut demanium Regis nullatenus distraberetur, nec titulo quolibet obligaretur.* Id sane Innocentio non venisset in mentem, nisi
&

& complura oppida in demanio suo servassent Nortmanni, & sub ipsa novi Principatus auspicia eorum alienationem prohibuissent. Si secus statuas, novitatis invidiam Pontifex apud barones Neapolitanos, ac Siculos non potuisset effugere. Deinde eodem me trahit ipsum Friderici II. testamentum apud Muratorium *rer. Ital. tom. 10. pag. 803.* In eo scilicet Fridericus, Conradi baliatu Manfredo demandato, Regias eum vices ad absentiam illius usque exercere jubet, eique *castra, terras, ac villas* largiendi facultatem concedit; eo iure tamen ipsum uti vetat, si quid de Principis demanio elargiendum esset. Eodem pertinet, quod, iure summi imperii compluribus oppidis in eodem testamento Manfredi legatis, ea *de demanio in demanium, & de servitio in servitium* Fridericus perennare jubet. Id ita a Friderico cautum, quia ex Nortman-

nicis institutis, & utriusque Regni primæva lege oppida in Principis demanio posita abalienari non poterant. Hinc intelliges, cum Neapolitani ac Siculi juris ingenio convenire, neque quicquam iniquitatis complecti Alfonsi pragmaticam *post bella. pag. 107. edit. Panorm. ann. 1791.* Ibi enim veterem Regni Siculi politicam constitutionem is spectans edixit, ut, si quid in Principis demanio positum ob publicas necessitates distractum esset, pretio restituto, depositove per Principem, in illud statim fiscus redintegraretur. Indidem & facile evinces, Regii demanii alienatis oppidis, si revocationem Princeps institueret nolit, posse oppidanos ipsos, restituto pretio, ad Regium demanium proclamare. Nam neque regressus ad jus primævum interdicti debet, neque præsumi in alienatione potest, eam facultatem Principem universitatibus ademisse.

VI. Porro sub Nortmannis quidem , ac Suevis , cum iisdem legibus Regnum Neapolitanum , ac Siculum regeretur , ut apud Siculos , ita apud Neapolitanos quoque certum , ac discretum Regis demanium fuit . Oppida igitur , quæ sub tutela Regii demanii relinqui placuit , utrobique feudi titulo in alios transferri non poterant . Verum post Vesperum Siculum Andegavenſibus illum internecivum in Regno quidem Sicilienſi minus a veteri politica constitutione deſcivitum . Cum enim ipſo rerum uſu Siculi comperiſſent , cum Regio demanio publicis redditibus imminutis , ad tuendam imperii Maieſtatem novis oneribus populos atteri oportere , maxime adlaborarunt , ne in Regis demanio poſita ſeu feudi titulo , ſeu quoquo alienationis genere e publico patrimonio diſcerperentur . Et apud ipſos tamen exempla non deſuerunt , quibus ex diſcerpto demanio pri-

privati homines ditescabant . Proinde sub ipsa Principatus Aragonensis initia primordialem illam apud Siculos legem restituit Rex Jacobus *capit. 9.* eoque quicquam ex Regio demanio concedi vetuit . Verum publicarum necessitatum obtentu adversus saluberrimam illam Jacobi legem privatis non semel Regii demanii concessa sunt oppida . Quapropter in conventu Syracusis habito anno 1398. id potissimum malum per Martinum Regem Siculi arceri curarunt . Ea de re igitur eorum precibus Martinus interpellatus in se recepit , Regio demanio oppida restitutum iri , quæ inde per Principum concessionem avulsa forent, eorum in posterum alienatione interdicta *cap. 1. Reg. Martin.* Ne qua vero primævæ Regni legi fraus fieret, oppida recenseri placuit , quæ ad Regis demanium pertinerent, ac diserte vetitum, ne quoquo titulo ea in posterum alienati

nari jus esset *cap. 2. Reg. Martin.* Eo pertinet, quod scribit Fazellus *dec. 2. libr. 9. conventum postea Rex Syracusis habuit; decreto publico sancivit, quæ oppida Regis, quæ procerum essent.* Ibi scilicet ad tollendam juris incertitudinem declaratum, quæ oppida in Regio demanio tuenda forent, quæ feudi titulo proceribus concedi liceret. Neque tamen tam solemni decreto Regio demanio apud Siculos parta securitas. Nam post ipsum Martinum & oppida inde non pauca avulsa comperio. Proinde primævam illam Siciliae legem iterato firmavit Alfonsus *capit. 357. C. 423.* & Rex ipse Joannes *capit. 19.* Ab alienationibus tamen id genus ad felicissimum ferme Ferdinandum usque; ejusque Parentem optimum non omnino cessatum, neque alias patuit, non deesse in Civitate mala, quæ vetentur semper, & retineantur.

VII. Porro ob publicam causam Regii demanii tantus est favor, ut eo etiam præscriptionis ope universitates pervenire possint. Audi ea de re ipsum Iferniam ad *c. Imperialem*, §. *nec dominus feudi*. Sic enim is ibi infit, quamvis juris publici imperitissimus pro more sæculi. *Demania in Regno Siciliae dicunt antiqui nostri Civitates, castra, & bona alia retenta per antiquos Reges in potestate, & dominio suo non donata, & concessa aliis; & si sic steterunt per triginta annos, sortiuntur hanc conditionem, ut sint de demanio*. Ibi autem Siciliae vocabulo non minus Neapolitanum, quam Siciliense Regnum debet intelligi. Ceterum apud Siculos, cum oppida Regii demanii enumerata fuerint prædicto capitulo Martini Regis, facile hodie dignosci queat, quæ loca Regii demanii jure uti debeant, & quæ apud ipsos oppida ad Regium demanium pro-

proclamare possint, si adversus Siciliæ
leges alienata fortasse fuerint. Quod
tamen ad Regnum Neapolitanum, licet
ab initio olim Regium demanium inibi
certum etiam, ac discretum esset, ob
frequentiores tamen in eo Principum
mutationes omnia ferme oppida e Re-
gio demanio sunt avulsa, ac feudi ti-
tulo alienata. Neglecta igitur ejus con-
stitutione primæva, eo deventum, ut
pauca tantum oppida seu ob Principum
privilegia, seu ob pretium ab oppida-
nis solutum jure Regii demanii censean-
tur. Hinc inter pragmaticos enata quæ-
stio, num, si quæ loca ad Regium de-
manium in Regno Neapolitano perti-
nent, ea possit jure ordinario Princeps
baroni subicere: jure ordinario inquam.
Nam si in potestate Principis extraor-
dinaria species effingatur, ex patrono-
rum fiscii decantato carmine *sacrilegium*
esset ea de re dubitare. Controversia
ita

ita propofita , eorum fententia fe mihi commendat , qui diftinguendum exiftimant , utrum onerofò , an lucrativo titulo Regii demanii jure loca controverfa potita fuerint ; poftrema autem faltem in fpecie poffe jure ordinario Principem , fi ita flagitet ratio Principatus , Regii demanii privilegium revocare . Conf. Card. de Luc. tom. 2. de regal. difc. 148. n. 8. & fequ. & de Marin. ad decif. Reverter. 409. n. 4. & fequ. Id autem admittendum putarim , licet ob civium merita jus Regii demanii Princeps ipsis indulferit . Princeps enim fubditorum refpectu ad beneficia rependenda , feu ad *antidora* , quæ Græci vocant , non obligatur , eique cives ipfa vi Principatus , & ob Civitatis commune fœdus , non fpe præmiorum illecti operam fuam navare debent . Conf. Afflict. decif. 307. n. 13. & fequ.

VIII. Ex dictis liquet , jus ad Regium

gium demanium proclamandi ex ipsa primæva constitutione politica promanare, si de oppidis sit controversia, quæ ab ipsis utriusque Regni primordiis sub tutela Regii demanii perennarunt. Si tamen de oppidis agatur, quæ sub ipsa Nortmannici Principatus primordia feudi titulo concedi sunt solita, & ea quidem, si forte vendantur, ad Regium demanium proclamare non prohibentur; verum, ut passim doctores adnotant, non ob politicam constitutionem, sed ob favorem potius libertatis ipsis id juris concessum videri debet. Nimirum id in controversiam venire queat, vel si ab ipso barone vendantur oppida, vel si distrahantur a Principe, ubi forte ad fiscum ea redierint. Utraque in specie venditores parum a parentibus absunt, qui filios ob egestatem distrahunt. Atqui expressim in jure civili caveretur, ut, ea de causa vendito a parente filio, oblato em.

emptori pretio, filius proclamare possit ad libertatem *l. 2. C. de patrib. qui fil. suos distrax.* Ejus autem legis argumento facile inferri queat, ad prælationem Regii demanii causa postulandam neque comitiorum solemnitatem, neque totius universitatis consensum requiri; vel unum igitur ex civibus ad Regium demanium proclamare posse. Labet in re celeberrima ipsa ex prædicta lege Constantini verba producere. *Liceat autem ipsi, qui vendidit, vel qui alienatus est, vel cuilibet alii ad ingenuitatem cum propriam repetere.* Ibi autem ingenuitatis vocabulo ipsam libertatem significari, nemo non videt.

IX. Quod autem ad tempus, intra quod universitatibus ad Regium demanium proclamare licet, interest, num Regii demanii oppidum, an feudi titulo concedi solitum alienetur. Priori quidem in specie cum per alienationem ipsi

ipsi constitutioni politicæ aperta vis inferatur, perpetuo cives ad Regium demanum proclamare possunt; eis igitur agentibus nulla temporis præscriptio obesse debet. Cum enim ea in specie alienatio, tamquam adversus jus publicum inita, ab initio non consistat, neque tractu temporis convalescere potest, ejusque rescissionem petentibus quæquæ præscriptio frustra opponitur. Conf. de Marin. *ad Reverter. decis. 22. n.6.* Id ipsum admittendum putarim, si de oppidis sit controversia, quæ vel privilegio Principis, vel pecunia sua ad Regii demanii dignitatem pervenerint, si ob publicas necessitates alienata fortasse fuerint. Neque enim ipsis opponi potest anni præscriptio ex *pragm. 63. de offic. procurat. Cæsar.* Nam, ut infra liquet, oppida tantum lex illa respicit, quæ feudi titulo concedi solita a Principe, vel barone alienata fuerint.

X. At vero quod ad oppida feudi titulo concedi solita, discors apud nos olim doctorum sententia fuit, intra quantum temporis ad Regii demanii petitionem ea admitti oporteret. Alii plus æquo baronum studiis indulgentes vix mensis spatium eam in rem universitatibus tribuendum censuerunt. Alii, argumento deducto ex prælatione agnatis in jure feudali concessa, intra annum a capta per emptorem possessione universitates ad Regium demanium proclamare posse pronunciarunt. Alii denique quadriennium ipsum ad prælationem petendam universitatibus asseruerunt. Conf. Rovit. ad *pragmat. 4. de feud. n. 4. & sequ.* Enimvero nemo tantisper in jure versatus non videt, primam illam sententiam nusquam præsidium invenire; alteram ab agnatis ad universitates perperam quidem inferre. Æquum igitur juris interpretem tertiam
il.

illam sententiam amplecti oportebat, ut vidit ipse Præses de Franch. *decis.* 17. n. 17. Nimirum vici, pagi, civitates, collegia minorum jure censentur *l. 4. C. quib. ex caus. major.* Atqui minores, ex quo minorem ætatem exceſſerint, intra quadriennium restitutionem in integrum postulare possunt *l. 7. C. de tempor. restit. in integr.* Recepta etiam sententia fori est, quadriennium restitutioni petendæ præstitutum in collegiis, & corporibus a die læsionis computari oportere. Res igitur flagitabat, ut saltem intra quadriennium a capta possessione ad Regium demanium universitates provocare possent. Verum non alias patuit, quam impune sub imagine legum universitatum commoda possent intercipi. Nam in generalibus comitiis ann. 1588. baronum opera Joanni de Zunica sacras vices apud Neapolitanos agenti persuasum, ad lites præ-

cidendas universitatibus expedire, ut tantum intra anni spatium ad Regium demanium postulandum admitterentur. Ita pragmatica sanctione cautum, ne post annum a die captæ possessionis Regium demanium peti jus esset; adversus anni lapsum ne restitutio quidem in integrum universitatibus accommodaretur *pragm. 63. de offic. procur. Cæsar.* At vero cum non oporteat, non cessantibus præscriptionem officere *l. 16. C. de inoffic. testam.* cessare autem dici nequeat universitas, si post captam possessionem inter emptorem, & venditorem lis enascatur, quod ad contractus rescissionem; ea quidem in specie annus prælationi petendæ universitatibus præstitutus a die litis finitæ computari debet; in eam vero sententiam sæpissime judicatum, ut rerum periti norunt. *Conf. Rovit. ad d. pragm. n. 12.*

XI. Porro ut proclamatio ad Regium de-

demanium recte coeptata censeatur, accurate discutiendum, num pretium ipsum sine civium detrimento exolvi possit, eorumque re vera melior conditio fiat. Proinde in publicis comitiis universitatis ipsius voluntas exquiri debet, ubi, rebus accurate pensatis, de tam momentoso negotio suffragium quisque ferat. Hinc in ejusmodi petitione statim a baronibus solet opponi voluntatis in universitate defectus. Enimvero ad Regium demanium proclamatio ad liberalem causam videtur accedere. Quemadmodum igitur ob liberalem causam jus ipsos extraneos agere patitur *l. 6. ff. de liber. caus.* ita & quisque universitatis civis Regium demanium postulare potest, si paratus sit pretium ipse persolvere; ejus vero recipiendi gratia neque civibus, neque universitatibus ipsis molestiam creet.

XII. At vero universitatibus quidem favendum, quæ ad Regium demanium

proclamando se veluti in libertatem asserunt ; id ipsum tamen nullum fisco detrimentum afferre debet neque ratione adhoæ , neque relevii fisco persolvi soliti , neque regressus ad fiscum intuitu : eo enim , cum a natura feudi separari nequeat , Princeps defraudari non potest. Et quod ad adhoam quidem , nullum fisco periculum imminebat . Quod ad relevium quoque , solutio , quam *quindenniorum* appellant , a fisco damnum arcebat . Quod ad regressum tamen ad fiscum , maximum ei detrimentum inferebatur . Cum enim universitas in perpetuum vivere præsumatur , ea Regii demanii jus consequuta , feudum ad fiscum prorsus redire non poterat . Ne quid igitur eam ob rem Princeps detrimenti caperet , sub sæculi decimi sexti initia Regens Ferrarius per id temporis fisci patronus edicendum curavit , ut universitates , seu ad Regium demanium rediissent ,

fent, seu in posterum redituræ forent; feuda certæ familiæ addicerent; in ea vero herede feudali deficiente, feudum fisco deferretur. Ita & universitatum commodis, & fisci indemnitati consultum. Conf. Rovit. ad *pragm.* 63. de *offic. procurat. Cæsar. n. 29. & sequ.*

TITULUS V.

Quatenus de feudis Siculi statuere possint per contractus ex capit. volentes.

UBi feuda ad heredes etiam redire placuit, qui eorum usufructus cum primo beneficiario extinguebatur olim, pessimo publico in eorum etiam liberis perennare coepit. Enimvero eo privilegio concesso per Principes, primævam sui naturam feuda non exue-

runt. Proinde & eorum dominium per-
 mes Principem perrexit esse, & nudus
 ususfructus ad barones pertinuit. Præ-
 ter politicas igitur rationes ea quoque
 causa fuit, cur sine assensu Principum
 feuda alienari non possent. Ususfructus
 enim & personæ hæret, & invito pro-
 prietario in alium transferri non potest.
 Ita quamdiu sub Nortmannis, ac Sue-
 vis Neapolitanæ, Siculæque provinciæ
 iisdem Principibus paruerunt, utrobique
 feudorum alienatio verita, nisi ea per
 Principem expressim concessa foret. Sed
 & ego dejerem, numquam sub Nort-
 mannis, ac Suevis eam veniam fuisse
 concessam. Saltem ejus rei exemplum
 nullum produci video. Utcumque id
 fuerit; apud Neapolitanos quidem a
 primævo feudorum jure ea in re non
 recessum, neque apud eos hodie sine
 venia Principis feuda alienare licet.
 Quod ad Siciliam tamen, ubi, excus-
 so

fo Andegavensium jugo, in Aragonenses cessit, ut gratificeretur Siculis Fridericus Constantiæ Reginæ filius, Manfredi nepos, Friderici pronepos id etiam ipsis indulgit, ut sine assensu Principis quocumque alienationis titulo in alios feuda transferre possent *capit. volentes.*

II. Interest autem ex prædicta Friderici lege, num per venditionem, an alio alienationis titulo feudum in alium transferatur. Si enim per venditionem id fiat, prælatio fisco competit, modo pretium ab extraneo oblatum venditori solvatur. Sin fiscus præferri nolit, & pretii decima ei ab emptore persolvi debet, & ad directum dominium agnoscendum fidelitatis juramentum præstari. Si non per venditionem, sed alio titulo feudum abalienetur, fidelitatis tantum juramentum præstari oportebit. Quod si feudi permutatio fiat, & ad
fer-

74 *Jus feud. Neap. ac Sic. L. III. T. V.*

servandam æqualitatem pecunia etiam in permutatione intercedat, pro rata solutæ pecuniæ decima exolvi deber. Benigne tamen per mores obtinuit, ut intra annum a die venditionis pretii decima solveretur. Sed &, si intra semestre a venditione tempus solutio fiat, decimæ triens remitti solet. Quod autem ad feudorum alienationem, interesse placuit, utrius juris feudum esset. Nam feudum quidem de jure Francorum solidum Fridericus alienari jussit. Si vero feudum de jure Longobardorum esset, idque ob plurium heredum concursum in plures partes discerptum fortasse foret, pars ejus quotacumque ad quempiam pertineret, eam & solidam alienari voluit *d. cap. volentes*. Id ita ab eo cautum, ne quid fiscus detrimenti caperet, neu qua ex parte imminuta in casu devolutionis ad eum feuda redirent. Viderint igitur de Siculo foro

foro rabulæ, an infinitam feudorum alienandorum licentiam ea lege concesserit Fridericus, eorumque regressum ad Principem omnino præciderit. Sed quoniam celeberrimi usus apud Siculos argumentum aggressuri sumus, juvabit penitius investigare, quatenus a Friderico facultas statuendi de feudis per contractus Siculis concessa fuerit, & an eo quoque respectu in Sicilia feuda *caudam*, quam Siculi dicunt, *serpentinam* habeant.

III. Ea in re igitur primum omnium satis constat, perperam inter pragmaticos Sicilienses quosdam baronum offis illetos existimasse, infinitam feudorum alienandorum licentiam Siculis fuisse concessam *in capit. volentes*; ita vero in Sicilia feuda allodia evasisse. Quem modum beneficii sui esse jussent Fridericus Aragonensis in eo privilegio Siculis concedendo, ex ipsis capituli verbis de-

definiamus, oportet. Quæ autem in eo fuerit Friderici sententia, ex ipsis initialibus verbis facile intelligere licet. Ibi scilicet Fridericus Siculis de se merentissimis gratificaturus id potissimum agit, ut Friderici II. proavi sui constitutionem corrigat, qua cautum ab eo fuerat, ne sine assensu Principis feuda quoquo modo alienare jus esset *constit. constitutionem divæ memoriæ. de revocat. feudor.* Nusquam ibi in mentem Friderico venit, feuda in allodia convertendo, ac devolutionis spem præcendendo causam fisci pessumdare. Quam alienus ab ea monstrosa feudorum conversione is fuerit, ipsamet capituli verba palam ostendunt. Ibi enim & sub initium, & sub calcem privilegii sui Fridericus edicit, se id Siculis indulgere *sine suorum jurium læsione; servitiis, & integris juribus curiæ semper salvis.* Ex sane formulæ palam evincunt, feu-

feudorum alienandorum licentiam ita Siculis concessam intelligi, ne quid inde ad fiscum detrimenti redeat. At vero si ponas, ab eo alienari feudum, qui serius ocus sine feudali herede sit decessurus, jus fisci periclitabitur, spe regressus ei prærepta. Ut igitur & ratio legis, & secum ipse Fridericus constet, necessario affirmari debet, neque infinitam feudorum alienandorum licentiam *benedicto* illo capitulo Siculis concessam esse, neque ea in allodia fuisse conversa. Quapropter si quis sine feudali herede sit decessurus, per eam Friderici legem feudum alienare non potest. Si secus statuas, jus fisci in discrimen adduxeris, quod expressim a Friderico vetitum.

IV. Ut autem in præsentis juris articulo nullus supersit dubitandi locus, opportunum fuerit advertere, primævo quidem instituto feudorum inspecto, cum
vix

vix in nudo usufructu confisterent, eorum per leges alienationem omnino fuisse vetitam; ob Principum tamen partim infirmitatem, partim ab Italia absentiam ea in re complures abusus invaluisse. Sane ex ipso jure communi feudali constat, quod ad feudorum alienationem, in Italia Transiberina diversas curiarum fuisse sententias; alibi quidem, quæ consuetudo *optima* dicitur 2. *consuetud. feud. 9.* eorum alienationem omnino interdictam, alibi seu *ad proprium*, seu *ad libellum*, ut dici solebat, alienationem ad dimidium usque concessam *consuet. feudal. 2. 28.* alibi vel totum feudum alienandi facultatem sibi barones afferuisse. Ejus vero notæ Mediolanenses fuisse narrat collector *consuet. feudal. 1. 13.* Eam in Italia Transiberina consuetudinem contra feudorum naturam increbrescentem frustra prohibuerunt constitutionibus quisque suis Lotha-

tharius, & Fridericus I. & recte dixeris, jure feudali communi non prohiberi barones sine voluntate domini feuda alienare, ubi recepti mores id finant. Apud Neapolitanos, ac Siculos per Rogerii, ac Friderici II. constitutiones feuda alienari vetitum. Iis tamen in Sicilia Rex Fridericus antiquari jussis, ibi intra juris communis feudalis regulas rem redegit *capit. volentes*. Quatenus igitur apud Siculos sine assensu Principis feuda alienare liceat, in re dubia ex jure feudali communi definiendum. Videamus igitur, quibus legibus feudorum alienationem per consuetudines feudales concedi placuerit.

V. Jure communi feudorum, ut vidimus, alibi ad dimidium usque, alibi solidum feudum sine venia Principis alienare jus fuit. Eo tamen inspecto, qui sine liberis decessisset, feudum frustra alienasse credebatur; ita post ejus
obi-

obitum feudum redibat ad dominum. Aperte rem loquitur collector *consuet. feudal. l. 13.* Sic enim ibi. *Et si clientulus fecerit libellum, vel aliud de medietate feudi sine domini voluntate, eo mortuo sine legitimo herede masculino, revertitur feudum ad dominum.* Apertius idem edicitur in Joannis Ardizonis, & Jacobi Alvarotti fragmentis apud Cujacium *feud. libr. 4. c. 73.* Luber in re celeberrima ipsum inde locum hic exhibere. *Qui investitus fuerit, non potest per proprium vendere, nec pro levissima re locare, nec infeudare, nisi majorem partem apud se retinuerit; & si in desperatione filiorum fuerit, nulla ratione, nec quolibet modo dare potest. Quæ si facta fuerint, nullius momenti erunt, & eo defuncto, omnia ad priorem dominum revertuntur.* Facultate igitur alienandi feuda sine voluntate Principis ita uti in Sicilia barones oport-

portet , ut nullum inde in fiscum detrimentum redeat ; ex regulis vero consuetudinum feudalium , si venditor sine feudali herede decesserit , feudum a Principe vindicari potest . Sed quoniam ad rectam legum intelligentiam maximi est momenti æqualium scriptorum auctoritas , videamus , quomodo doctores Siculi vetustissimi controversum Friderici capitulum interpretati fuerint .

VI. Licet consuetudines feudales in Sicilia , ut passim in Europa alibi , sæculo decimo tertio receptæ jam forent , quæ tamen erat sæculi ruditas , ibi potissimum jurisprudentia feudalisi, veluti in incunabulis , vix primos vagitus edebat . Inter res domi turbidas rarissimi ibi jurisconsulti , rariores adhuc , qui feudorum mysteria arcana nossent . Nam per id temporis apud Siculos tam pauci operam juri navabant , ut Siciliæ Civitates pecunia sua juvarent adolescentes ,

qui in Bononiensi , aliove Lyceo leges addiscerent , ut liquet ex chartis a Canonico Gregorio nuper productis in *append. introduct. ad jus publ. Sicul. pag. 226.* Sæculo tamen decimo quarto vertente , ut scientia isthæc apud Neapolitanos cultores suos nata jam fuerat , eorumque feudalis schola in dies inclarescebat ; ita apud Siculos quoque rerum feudalium periti viri non defuerunt . Ad id temporis igitur scholæ feudalis Siculæ natales referri debent . Per eam ætatem apud Siculos in feudali jurisprudentia palmam reliquis præripuerant Bernardus de Medico subtilitate sua *Saccurafa* a Siculis dictitari solitus , Gvilelmus Paternionensis , & Ubertinus de Marinis maximam nominis celebritatem adeptus cum singulari juris peritia , cum sanctitudine morum . Ea enim adeo in eo emicuit , ut Panormi Episcopus renunciatus fuerit . Prædicti

au.

autem triumviri scholæ Siculæ feudalis primi conditores , ac Friderici Aragonensis ferme æquales veluti ex compacto docuerunt , capitulum *volentes* naturam feudorum nusquam apud Siculos immutasse ; feudum igitur alienatum ad fiscum reverti oportere , si in alienantis obitu ei feudalis heres superstes haud foret . Neque vero ad sæculum decimum quintum usque quisquam ex doctoribus Siculis produci potest , qui in eo juris articulo diversas rationes iniecit . Rem totam , præeunte doctissimo Marchione Simonetta , peroravit Dragonettus noster *in origin. feudor. part. 2. tit. 2.* Sed videamus , quo primum auctore , & quibus argumentorum ambagibus infinitam illam feudorum alienandorum licentiam doctores Siculi baronibus asseruerint , licet alienanti deesset feudalis heres .

VII. Primus , quod sciam , apud Si-

culos causam fisci prodidit Gvilelmus Pernus. Homo scilicet suopte ingenio argutulus, & baro ipse, ac baronum causas tueri solitus subtilitatibus suis eorum redegit, ut spem regressus feudorum ad fiscum omnino præcideret. Is Ubertini de Marinis præceptoris sui sub initia sæculi decimi quinti vestigiis hærens avide arripuit feudorum distinctionem ab eo primum excogitatam. Primus scilicet Ubertinus apud Siculos feuda distinxerat, in ea, quæ *latæ*, ac *strictæ formæ* dicuntur esse: quam recte id ab Ubertino factum, & in rebus feudalibus initiati norunt, & in præsentī non quæram. Nusquam in mentem Ubertino venit, in feudis formæ latæ reversionem ad fiscum denegari oportere, ubi feudalī heres superstes baroni non foret. Quo tamen studio Pernus in barones abripiebatur, ea feudorum commentitia distinctione abusus omnem lap-

pidem movit, ut in feudis formæ latæ
jus reversionis ad fiscum omnino inter-
ciperet. Is scilicet non diffitetur, jure
communi feudali inspecto, heredis vo-
cabulo tantum liberos designari; verum
in jure Siculo pro legum diversitate eam
vocem diverse intelligendam esse pro-
nunciat; in Friderici II. constitutione,
filiis fratrum admissis, eos generatim
complecti, qui ex obliqua linea in ter-
tio cognationis sint gradu; per Jacobi
capitulum, admissis fratrum liberis ad
trinepotem usque, heredis vocabulum
latius extendendum; eo autem conti-
neri omnes, qui in sexto cognationis
sint gradu; per Fridericum tandem A-
ragonensem in *benedicto* illo capitulo
feudorum alienandorum promiscua facul-
tate concessa, heredis vocabulum ad ex-
traneos quoslibet extendi oportere. Ita
bonus sophista eo rem deducit, ut feu-
da formæ latæ ab allodiis differre ne-

get. Argutiolis autem suis veluti triumphans confidenter statuit, non minus testamento, quam per contractus in extraneos quoslibet id genus feuda apud Siculos transferri posse, utut desit feudalis heres. Conf. ipsum Pernum *consil. 8. pag. 11. & sequ.*

VIII. Porro qui post Pernum apud Siculos scripsere doctores, eum, velut vervecem agni, sunt complures sequuti, quippe qui aut barones erant, aut baronum offulis alebantur. Ita in Sicilia feudalisi jurisprudentia plane corrupta, & ante clarissimi Simonettæ Siculam præfecturam cum fisci fraude omnium ferme fermone vulgata parodia juris erat, in Sicilia feuda jure nudi allodii censerì oportere; de iis igitur pro arbitrio barones seu testamento, seu per contractus statuere posse, licet eis deessent heredes in gradu feudali positi. Fisci quidem causam in eo juris ar-

articulo strenue egerunt apud Siculos
melioris fidei homines, & baronibus mi-
nus obnoxii: ii tamen præ aliis docto-
ribus fordescebant præsertim pragmati-
corum opera, qui baronum salariis &
victitabant, & ditescabant.

IX. Enimvero argumenta, quibus ab-
surda isthæc doctorum Siculorum sen-
tentia refelli potest, adeo solida, adeo
firma sunt, adeo cum ipsa feudorum
natura conveniunt, ut cæcutire eum o-
porteat, cui fraus ea in re fisco facta
non subolescat. Si enim Fridericus feu-
dorum alienandorum facultatem indul-
sit *sine suorum jurium læsione*; jus ve-
ro regressus ad fiscum in defectu feuda-
lis heredis, ut supra evicimus, inter ipsius
Principatus jura referri debet; si sine
feudali herede alienans obeat, feudum
ad fiscum reverti oportebit. Ea de re
rectissime omnium Josephus Cumia ad
capit. si aliquem. v. antiquis. n. 245.

Licentia, is inquit, *alienandi data per capitulum volentes est legis assensus, qui nihil aliud operatur, quam ut alienatio valeat sine metu caducitatis, quia olim licentia Principis in alienatione specialiter requirebatur; sed non operatur, ut acceptor efficiatur vassallus cum diversis qualitatibus, quam esset in persona alienantis . . . ut mortuo venditore sine descendantibus, feudum Curiae aperiatur, & non attendatur persona, seu descendentes emptoris. Ei prævit Antonius Cannetius ad capit. volentes pag. 206. Sic enim ibi inquit vir doctus, neque corruptus baronum offis. Quamvis expressa licentia Principis circa alienationem feudi faciat, quod feudum non revertitur ad dominum, etiam quod deficiat, vel moriatur venditor sine herede legitimo; quamvis secus sit, quando consensus est tacitus, prout ex ista lege inducitur. Nam tunc nullum præjudicium*

resultat domino, quia revocat, si moriatur venditor sine legitimo herede.

X. At vero perperam adversus isthæc regerunt conductitii quidam ex foro rabulæ in imperitorum aures infusurrando, vel ideo præsentis Friderici lege feuda in Sicilia allodia evasisse, quia decimæ in venditione solutio directi domini a Principe abdicati sit veluti compensatio, ac pretii decimam accipiendo Princeps ejusmodi dominio sponte renunciaret. Ut enim præteream, directum feudorum dominium inter potissima Majestatis jura referri oportere; Principatus autem rationem non pati, ut eo dominio se Princeps abdicet; ea in venditione præstatio alio pertinet, neque directi domini hostimentum videri potest. Ipsi accuratiores Siculi passim docent, eam in feudis decimæ solutionem laudemio respondere, quod in prædio emphyteutico in alium transferendo exolvi jussit Justinianus

nus in l. 3. C. de jur. emphyteut. Ea de re testimonium denunciare lubet eidem Antonio Cannetio inter doctores Siculos facile principi. Ita enim is scribit ad *extravag. volentes. pag. 196. Præterea considerandum est, quod duabus de causis solvitur ista decima, una propter licentiam præstitam alienandi feuda, altera, quæ est expressa in ipsa lege, scilicet ob recognitionem directi dominii Regis. Cum eo præter alios consonat Josephus Cumia ad capit. si aliquem. pag. 325. Nimirum cum exemplo prædii emphyteutici directum feudorum dominium ad Principem pertineret, in feudis etiam alienandis passim in Europa receptum, ut certa pars pretii & pro consensu Principis impetrando, & directo ejus dominio agnoscendo fisco persolveretur. Conf. Fleischer. institut. jur. feud. c. 15. §. 34. & sequ. Laudare apud scriptores sequioris ævi est adprobare, af-*

assentiri. Ob consensum igitur in feudorum alienatione a Principibus præstari solitum, quæ pro eo impetrando rata pretii solvebatur, *laudemium* est appellatum. Hinc *pro laudibus, & vendis* illud præstari dixit sequior ætas. Ita charta apud Ducang. ex *tabul. S. Flor. in Arvern. ann. 1282. Confirantes, nos inde habuisse pro laudibus, & vendis, & investitura duodecim libras Turonenses* Indidem, & in eandem sententiam excusa vocabula *laudationes, laudamentum, laudaticum*. Exempli prostant, ut passim alibi, apud eundem Ducang. in *allatis vocib.*

XI. In decima autem exigenda benigniorem Siculis se præstitit Fridericus. In emphyteusi scilicet *laudemium* directo domino exolvi debet non tantum in venditionis causa, sed & quocumque singulari titulo prædium emphyteuticum in alium transferatur. In plerisque quoque

que provinciis , in quas feudorum institutum fuit invecum, laudationes exolvi oportebat, quaque de causa in alterum feudi translatio fieret, veluti si legato, donatione, & ipsa *vadii*, seu pignoris datione factum id esset. Res liquet ex chartis a Ducangio productis *voc. laudemium*. Id ipsum inculcat Guntherus *libr. 8.*

Si quis habens, feudum, pretio seu vendere totum,

Seu dare, seu vadio supponere cogitur, ille

Qui dedit, amittet, nec, qui suscepit, habebit;

nisi scilicet solitæ præstationes domino directo fierent. Verum in suo capitulo Fridericus remittens de fisci jure tantum in venditione decimam pretii præstari jussit; in casu vero permutationis tantum pro ratione pecuniæ, quæ soluta foret, decimæ ratam exolvi, Sed
&

& eam pretii decimam intra æquiores
modum redegerunt apud Siculos recepti
mores . Si enim intra sex menses ab em-
ptione ea solvatur , decimæ triens remitti
solet , ut supra monuimus . Vides igitur
quam vigilantes Siculi somnient jacti-
tando , propter decimæ solvendæ neces-
sitatem directum feudorum dominium a
Friderico fuisse abdicatum , & quam ve-
re apud imperitos clamitent , intra cen-
tum annorum spatium ob frequentissi-
mas feudorum alienationes solidum feudi
pretium ad fiscum redire . Quam recte
id asseratur , facile definieris ex claris-
simo Simonetta in plena opinione sua
de æquilibr. oner. in Sicil. Ibi enim
advertit , facta coacervatione decennii ,
ex relevio , & decima vix uncias 3759.
quotannis in fiscum inferri . Neque vero
regeras , immunitatem baronum Neapo-
litanorum a feudali laudemio in feudis
alienandis argumento esse , decimæ præ-
sta-

statione per Fridericum imposita; directo feudorum dominio in Sicilia renunciatum intelligi oportere. Plures enim causæ produci queant, cur ab ea necessitate Neapolitani præ Siculis immunes evaserint. Primo enim feudorum alienandorum facultate Siculi pro arbitrio uti possunt; eam veniam habent ab ipsa lege: ejus vero facultatis pretium est decimæ præstatio, ut ipsi scriptores Siculi profitentur. Neapolitani eam facultatem jure ordinario usurpare nequeunt. Si quando eam exercent, beneficio Principis illam acceptam referre debent: eis igitur non invidendum, si Principes concessum extra ordinem beneficium gratuitum esse jufferint. Aliunde per eam tempestatem id non adeo fisco grave, cum per Friderici Aragonensis ætatem feudorum alienandorum facultas in Regno Neapolitano vix concedi so-
leret. Deinde cum relevium longe ma-
jus

jus a Neapolitanis in baronum obitu
fisco præstetur, eo quoque intuitu for-
tasse a feudali laudemio eos eximi pla-
cuit. Quid quod adhuc ratione, seu do-
nativi, quod ad rationem adhuc solvi
solet, baronum in Regno Neapolitano præ
Siculis durior est conditio? Ea igitur
quoque de causa adversus barones Nea-
politanos fisci patroni humaniorem men-
tem induerunt. Respectu autem adhuc,
ac militaris servitii quam melior Sicu-
lorum baronum conditio fuerit, osten-
dit Jacobi *capit. barones, & alii.* 39.
Sed ea de re infra figillatim.

XII. Ceterum his quidem accurate
perpensis, clarissimo Simonetta viam
monstrante, atque augustissimi in Re-
gno Neapolitano Senatus plena opinio-
ne prævia, recte cavit felicissimus Fer-
dinandus pragmatica sanctione Panormi
edita pridie idus Novembris anno 1788.
ob facultatem feudorum alienandorum ba-
ro-

conibus Siculis in capitulo volentes a Friderico concessam ea in Sicilia allodia non evasisse, eorumque naturæ nil quicquam fuisse demptum; eorum igitur feuda, qui sine feudali herede decessuri forent, ad fiscum reverti oportere, quæcumque foret investituræ formula, seu stricta esset, seu quam latam appellant, nullo feudorum discrimine seu mixta, seu hereditaria esse dicerentur; barones etiam herede feudali carentes nil quicquam in fisci fraudem seu testamento, seu per contractus statuere posse; si quid adversus isthac ii cœptassent, irritum haberi oportere. Confer, quæ supra commentati sumus *libr. 2. tit. 4 §. 11.*

XIII. Antequam hinc discedamus, haud inutile fuerit advertere; in memorata pragmatica recte Principem edixisse, ob feudorum alienandorum copiam Siculis a Friderico factam eorum
na-

naturam in Sicilia non fuisse immutatam. Neque regeas, feuda sponte sua alienari non posse; eorum igitur alienatione permiffa per leges, apud Siculos a feudi natura recessum. Si enim post ipsum Friderici capitulum feuda in Sicilia allodia non evaserunt, atque ibi barones eorum tantum usumfructum habent; feudorum in Sicilia alienatio proprietatem non afficit, ac per eam non aliud agitur, quam ut consensu Principis in ipsa lege concessa ab alio in alium ususfructus migret. Proinde a vero aberrat ipse Cannetius asserens, respectu liberæ alienationis Siculis per Fridericum concessæ feudorum naturam in Sicilia fuisse mutatam *in capit. volentes. pag. 6. n. 10.*


XIV. At nondum hic finis. Quid enim, si feudum pactitium fuerit, & ipsis etiam liberis facta dicatur in investitura concessio, licetne possessori il-

Iud alienare? Communis ferme Siculo-
rum pragmaticorum sententia est, alie-
nandi veniam a Friderico factam locum
quidem habere, modo tamen, ut dici
solet, *forma feudi non repugnet*. Eam
exceptionem ita passim interpretantur,
ut feudi pactitii alienationem prorsus in-
utilem putent; eam igitur capituli sen-
tentiam sustinere non posse, ne quam-
diu quidem alienator sit superstes futu-
rus. Cum tamen præsens Friderici ca-
pitulum feuda generatim omnia alienari
finat, possessori non denegandum vide-
tur, ut ipsum feudum pactitium alie-
net. Ea vero in specie & decima fisco
persolvi debet, & ad obitum vendito-
ris usque in possessione tuendus est em-
ptor. Eo respectu igitur falso asseritur,
forma repugnante, feudum alienari non
posse. Enimvero post venditoris obitum
ejus in feudum pactitium jus omnino
resolvitur, idque ex investituræ lege li-
be-

beris, aut agnatis statim defertur. Exinde igitur & statim jus emptoris perimitur, & feudum a liberis, aut agnatis vindicari poterit. Quapropter eo tantum respectu verum erit Sicularum vulgatum carmen, *forma repugnante, feudum alienari non posse*. Conf. Cannet. ad cap. volentes. pag. 6. & sequ. n. 19. & sequ.

XV. Haëtenus in jure feudali veluti privato versati sumus. Porro, quod in ipsa hujus libri fronte promissimus, jus feudale publicum enucleabimus. Hoc autem argumentum vel eorum respectu spectari potest, quæ directo feudorum domino præstari debent, vel eorum intuitu, quæ in ipsa feuda, eorumque incolas baroni competunt. Ad ea, quæ directo domino præstari debent, potissimum pertinet militiae personale servitium, eique suffeeta quæ apud nos adhoa dici solet, relevium etiam, & si quæ alia directi do-

mini commoda complectuntur. Ad ea, quæ in ipsa feuda, & eorum incolas baroni competunt, præ reliquis referri debent jurisdictio, adjutoria a baronibus exposci solita, ac jura illa sat portentosa, quæ *prohibitoria* dici queant, & quæ commoda quidem baronum augment, naturalem tamen oppidanorum libertatem imminuunt. Ea igitur, quatenus ratio instituti patitur, sigillatim edisseremus. Sit igitur



TITULUS VI.

De militari servitio, & ad hoc ejus loco præstanda.

A Libi advertimus, ea potissimum de causa feudorum institutum evaluisse, ut Principibus milites præsto forent, quorum opera per belli tempus præ-

prælia depugnarent. Barones igitur, si bellum ingrueret, eadem olim sub armis munia subire oportebat, quæ per milites sub signis hodie haberi solitos præstari solent. Proinde ubi expeditio in hostem decreta foret, quisquis de militari servitio interpellatus bellum detrectaret, nulla spe reliqua, feudum amittebat *consuet. feudal. 2. 28. princ.* Et olim quidem id genus servitium per semet quisque præstare adigebatur. Mox tamen benigne placuit, ut, qui expeditionis incommodum subire nollit, vel per alium Principi acceptum inserviret, vel certam partem feudalium reddituum fisco solveret *consuet. feudal. 2. 55. §. 1.*

II. Ex primævo autem feudorum instituto barones exemplo militum, qui stipendia merent hodie, perpetuo in expeditionem paratos oportebat esse, neque eorum militare servitium intra certum aut tempus, aut locum coerceretur.

tur. Sane in jure feudali communi militandi necessitas infinite præscribitur, neque ea usquam certo loco, aut tempore definitur. Id ipsum sub Nortmannis, ac Suevis apud nos servatum oportuit, neque sub Rogerio, ejusve nepote Frederico, qui vim Principatus nusquam imminui patiebantur, cuiquam in mentem venisset, Principis delectum ad prælia indicentis jussa contemnere, quoquo bellum inferendum esset. Ipsa fidelitas in feudorum investituris jurato promitti solita infinitam militandi necessitatem sub Rogerio complectebatur. Sane in ejus privilegiis Civitatibus quibusdam concessis, si ibi barones essent, sine temporis, locive discrimine militiæ munus præstare jubentur. Ita quidem in privilegio immunitatis per Rogerium Melfanæ concessio reliqui quidem cives militia pronunciantur immunes, baronibus tamen bellandi necessitas non remittitur.

tur. Sic enim in diplomate suo pro
Messana Rogerius apud Bonfilium. *Ad-*
dimus, quod nullus civis Messanensis ad
stolum, seu exercitum ire cogatur invi-
tus, præter ad hoc opus manere ad sti-
pendia sublimatos. Ibi sane ad *stipendia*
sublimati dicuntur, qui feudo donati
sublimiores præ reliquis evasisent. Fri-
dericus quoque II. nullo cum tempo-
ris, aut loci discrimine militiæ munus
barones subire jussit. Ita quidem is
Abbati Casinati præcepisse traditur, *ut*
centum servientes bene paratos inveniat
cum expensis, & armis per annum ne-
cessariis apud Riccardum a S. Germano
ad ann. 1228. Idem Riccardus memo-
riæ prodit, a Friderico *summonitos ba-*
rones, & milites infeudatos de Regno
per Justitios singulos, ut se in armis,
& equis præparent *ad ann. 1239.* In ea
igitur infinita militiæ necessitate sub Fri-
derico decepti Honorii IV. capitulis vi-

deri debent, qui scriptitarunt, sub Gvilelmo II. non ultra tres menses, ac tantum intra Regni fines ad bellum barones adigi potuisse. Vulgatus doctorum error inde manavit, quod sub Gvilelmo II. trimestre militiæ tempus definitum existimarint, quod, ut baronibus gratificaretur, primum definivit seu Honorius IV. seu Carolus II. Andegavenfis.

III. Ita quidem in Regno jus fuit ad Andegavenfes usque. Amiffa sub eis Sicilia, audentiores etiam facti Neapolitani barones, ac periculum erat, ne & ipsi Siculorum uterentur exemplo. Ita eorum sibi devinciendorum gratia Carolus II. per patris absentiam ejus in Regno Vicarius vim Principatus ferme resolvit. Nam inter capitula in S. Martini planitie edita ea de re ita cavit. *Item statuimus, quod comites, barones, & alii feuda tenentes ultra tempus trium men-*

mensium non teneantur servire Curia sumptibus propriis: sed si eos ultra prædictum tempus Curia voluerit in suo servitio retinere, ipsis gagia debeat ministrare. Adeo verum est illud, jura Majestatis Andegaveses susque deque habuisse, ac provinciarum Neapolitanarum fuisse pestem.

IV. At vero licet prædicta lege Carolus II. Principatus causam prodiderit, majus ei tamen vulnus infixit Honorius IV. ab ipso, ejusque parente electus querelarum arbiter barones inter; ac Principem ob arbitrium ea de re susceptum ab ejus decessore Martino. Is scilicet in capitulis suis per Caroli captivitatem editis, quod ad baronum militare munus, ipsis ferme Caroli verbis utitur; ejus tamen sententiæ laciuiam hanc præmisit. *Barones, vel alii EXTRA REGNUM nec servire personaliter, nec adboamentum præstare cogantur. Id,*
qua

qua pollebat regnandi arte , maturiori consilio ab Honorio additum . Cum enim Pontificis territorium a Neapolitanis provinciis nullo intermedio Principatu determinaretur , periculum præcavebat , quod haud ita multo post sub Ladislao Pontifices sunt experti , ne scilicet Neapolitanæ copię in regiones Romanas irrumperent . Sed ea de re plura desino , cum Neapolitani Principes Honorii IV. capitula apud nos numquam obtinere sint passi .

V. Supra monuimus , ex jure communi feudali integrum fuisse baronibus , si in expeditionem itare nollent , præstatione pecuniæ a militiæ munere se redimere . Quæ summæ ab iis persolvebantur , qui bella defugerent , *hostenditiæ* dicebantur , quippe ab iis persolvi solitæ , qui in hostem ituri non forent *consuet. feud. 2. 40.* Hostis autem vocabulo hic ipsum exercitum , & expeditionem

nem intellige: in eam vero sententiam & apud Italos hodie vox isthæc passim accipitur, & in legibus sequioris ævi frequenter occurrit. Conf. Struvium in *syntagm. jur. feud.* 11. 5. Quantitas hostenditiarum pro locorum olim diversitate diversa fuit. Sane in Italia Transiberina denarios duodecim pro singulis terræ modiis solutos comperio, licet apud Teutonas tertiam fructuum feudaliū partem eo nomine persolutam narret collector *consuet. feudal.* 2. 4. Et tamen de re vide Cujacium ad 4. *feudor. rit.* 49.

VI. Porro Fridericus I. generatim edixit, ut, qui se expeditioni vellet eximere, vel per alium Principi acceptum militiæ munus præstaret, vel reddituum feudaliū semissem solveret *feudal. consuet.* 2. 55. §. 1. Ita quod ob prædictam Friderici legem in Italia Transiberina, & passim in Europa alibi rece-

ceptum jam fuerat, ex jure feudali communi etiam apud Neapolitanos obtinuit, ut barones scilicet vel per se ipsi subirent militiæ munus, vel ad prædictam rationem hostenditias fisco solverent. Id tantum interfuisse videtur Italiam Transiberinam inter, ac patrios Regni mores, quod ibi quidem barones ipsi pro arbitrio eligere poterant, num per semet militare vellent, an hostenditiarum solutione eo onere se liberare. Verum apud Neapolitanos electio isthæc ad Principem pertinebat, ea scilicet ratione, quia cum in ea debiti alternatione veluti creditor Princeps esset, ipsius arbitrio definiri oportebat, hostenditiasne, an ipsum militiæ munus præstari mallet. Ea in re ipsos pragmaticos ferme consentientes invenire licet, eamque sententiam veluti communem, ac veriore ipsam Collaterale Consilium agnovisse testatur Præses Amatus *consil. 12. n. 8.*
 Conf.

Conf. de Marin. *allegat.* 116. n. 5.

VII. Rursus inter jus feudale commune, ac Neapolitanos mores & illud interfuit, quod in Regno Neapolitano, quod pro immunitate militiæ præstabatur, non voce quidem hostenditiarum est designatum, sed primum *adhoamenti*, mox & *adhoæ* vocabulo designari coepit. Quod autem ad adhoamenti, atque adhoæ originationem, nescio, quæ portentosa procudere doctores, præsertim Andreas Capanus, quem, ut vervecem agni, sequuntur omnes. Nimirum is ponit, *adhoare* esse conjungere, adhoam vero conjunctionem. Positionem suam & inde firmat, quod vernacule *docha* dicuntur tabellæ illæ ita conjungi solitæ, ut inde dolia compingantur. Ita rem eo deducit, adhoamentum, atque adhoam fuisse dicta, quia cum in tenuioribus, & minusculariis feudis vel trientem exempli causa, vel
sex.

sextantem militis dari oporteret, plures simul barones possessores feudorum id genus conjunctim unum militem per delectus occasionem præstabant *de jur. adboæ quæst. 2. n. 5. & sequ.* Ea tamen vocis originatione sua sponte ruit, si advertatur, adhuc non milites ipsos per barones in delectu habendo præstari solitos designare, sed pecuniarium adjumentum, quo a belli necessitate barones se redimebant, & quo, ut verbis pragmaticorum utar, *personale servitium* in reale transmutabatur. Eo accedit, quod quo tempore adhuc vocabulum effingebatur, quod fortasse per Joannæ I. ætatem fuit excusum, barones minuscularia feuda possidentes, si quam ratam hominis deberent, eam non in militibus, sed in pecunia pensabant. Sane sub ipso Carolo I. ordinarii apud nos juris erat, ut, si quis quadrantem, trientem, sextantem militis deberet,

non,


non, rata quidem aliorum minutalium
baronum conjuncta, militem ipsum præ-
staret, sed ratam ipsius pecuniæ fisco
solveret. Id aperte liquet ex tabulario
Regiæ Camerae *fascicul. 12. fol. 136.*
usque ad 177. Ibi enim anno 1272. sub
Carolo I. Andegavenfi scilicet, barones
exhibentur Neapolitani, Campani, & A-
versani; minuscularii autem barones non
in hominibus ipsis, rata cujusque con-
juncta, sed in pecunia servitium præ-
stare dicuntur. Ita quidem ibi *pag. 22.*
Dominicus Ligorius Barrile tenet feuda-
lia, de quibus pro prædicto servitio ta-
renorum decem & octo, & grana se-
ptem, sicut prædicitur, deberentur. Sta-
tim ibidem. *Henricus Brancatius tenet*
feudalia, de quibus pro prædicto servi-
tio tarenorum quindecim, & grana duo-
decim, sicut prædicitur, deberentur.
Passim id genus præstationes ibidem in-
venire licet.

VIII. His præstitutis, potius existimari, ab initio *adhoamentum* barbare dictum *adjuvamentum*; inter sæculi vero barbariem *adjuvamentum* in *adhoamentum*, & adjuvare in *adhoare* conversum. Mirum id non vidisse Capanum ipsum, qui post Afflictum recte scribit, *adhoamentum adjumentum esse*, &, baroni remisso in investitura adjumento, *adhoam*, seu *adhoamentum* ipsum remissum intelligi *de jur. adhoæ quest. 3. n. 5.* Eo accedit, quod ejus ætatis scriptores, per quam levamentum illud militiæ *adhoamentum* appellari coepit, passim *adjumentum* pro *adhoamento* dicunt. Instar omnium sit Rex Jacobus, qui apud Siculos Regnum obtinuit ab ipso anno 1286. Ita enim is infit. *de adhoamento cavens in capit. 39. Barones, & alii extra Regni confinia nec servire personaliter, nec adjumenta præstare cogantur.* Quod autem animadversione dignum,

gnum, ea Jacobi lex ad verbum excripta fuit ex Honorii IV. capitulis §. *barones*. Id tantum inter utrumque discriminis intercedit, quod præstatio isthæc in Jacobi capitulo adjumentum dicitur; verum ab Honorio adhoamentum vocatur. Stet illud igitur, adhoam, primo *adjumentum*, mox barbara voce *adjuvamentum*, denique, sermonis magis decollante elegantia, vocabulo illo cerebro conficto, *adhoamentum* dictitatam fuisse. Inde autem intelliges, cur adhoamenti quidem vocabulum ad hostenditias designandas vetustius in Regno fuerit: nam eo utitur ipse Fridericus II. in charta anni 1221. Vide Ducang. *in voc. adhoamentum*. Contra serius in eam sententiam vox adhoæ usurpari coepit, ejusque primum exemplum producit idem Ducangius ex charta Joannæ I. ann. 1366. *in voc. adhoa*. Verum ab Iserniæ ætate vox isthæc apud Neapolitanos

Tom. III. H nos

114 *Jus feud. Neap. ac Sic. L. III. T. VII.*
nos communi usu recepta jam fuerat .
Nunc videamus , quomodo ex patriis in-
stitutis adhoꝝ quantitas definita fuerit,
& quatenus ea in re ab jure feudali
communi recefferint Neapolitani mores.



T I T U L U S VII.

*De adobæ quantitate ex jure
Neapolitano .*

Supra monuimus , per Fridericum I.
hostenditiarum , seu adhoꝝ summam
ad semissem usque reddituum feudalium
productam fuisse constitutione , quæ ex-
tat 2. *consuet. feud.* 55. §. 1. Sub Nort-
mannis , ac Suevis igitur in legum pa-
triarum defectu apud nos id ipsum fer-
vatum oportuit . Per ea tempora in eo
tantum a prædicta Friderici constitutio-
ne desciverant recepti mores , quod ali-
quid

quid ultra redituum semissem in fiscum inferendum esset. Ex singulis enim viginti unciis, quæ ex feudo redirent, decem cum dimidio adhoæ nomine solvi oportebat. Ita passim post Iferniam veteres Regni doctores. Conf. Capan. *de jur. adb. quæst.* 1. n. 2. & 5. & Regent. Moles de eodem argumento latius differentem, ac post ipsum Capanum impressum pag. 335. Decem unciis dimidium fortasse additum, ut salarium præsto foret iis, qui per provincias adhoas colligebant.

II. Enimvero id perpetuum in Regno non fuit, & non minus cum fisci fraude, quam cum eorum injuria, qui feuda incolerent, adhoarum præstatio novam faciem induit. Nam per Andegavensium tempora potentatui baronum doctores inservientes tria feudorum genera distinxerunt, prout ea aut in locis cum oppidanis inhabitantibus, aut in præ-

prædiis sine incolis, aut in nudis vectigalibus, ac fiscalibus functionibus constituta forent. In feudis cum oppidanis inhabitantibus adhoæ nomine ex singulis viginti reddituum unciis decem cum dimidio solvendas pronunciarunt. In feudis in prædia sine incolis constitutis reddituum quadrantem, & aliquanto plus solvendum edixerunt, sex scilicet ex singulis viginti unciis. In feudis denique, quorum in redditu nuda vectigalia forent, minus adhuc solvendum putarunt. Nam ex singulis viginti unciis quinque cum dimidio solvi voluerunt. Ejus differentiae rationem inde repetit Moles *loc. cit.* quod in feudis cum civibus non solidam quidem adhoam sustinebat baro, sed ejus dimidium a feudorum incolis is exigebat. Ita feuda cum incolis cum feudis in vectigalia constitutis, quod ad adhoam, ferme æquabantur, unde, ut vidimus, ex singulis viginti unciis quinque

que cum dimidio fisco præstari oportebat. Aliquanto plus ex feudis in nuda prædia constitutis, sex scilicet ex singulis viginti unciis, exactum is docet, quia inibi per baronis industriam redditus augeri poterant.

III. At vero eo feudorum discrimine per doctores invecro, ii non minus fisci, quam universitatum causam prodiderunt. Nam fisci quidem causa est prodita, quia nulla in Regno lex unquam juri feudali communi obrogavit. Eo autem inspecto, sine feudorum discrimine hostenditiæ, seu adohæ in ipso feudalium reddituum semisse per barones præstari debent. Universitatum quoque causa pessumdata, quia adversus constitutionem Regni primævam baronibus ipsis adhoæ dimidium sunt adaçtæ persolvere. Ut autem liqueat, quo jure, quave injuria commentitia isthæc doctorum portenta apud nos invaluerint, ipsa Nort-

mannici Principatus primordia paulisper memoria recolamus, oportet, & quem modum in novis provinciis ordinandis publicarum functionum respectu Rex Rogerius fervari jusserit. Ita enim facillime decerni poterit, an monstrosa isthæc doctorum commenta cum ipsa nostrarum provinciarum primæva constitutione conveniant.

IV. Ut autem eo perveniamus, advertendum in primis, in legibus scribendis Rogerium aliorum Regum, & Gentium leges diligentissime inquire curasse, atque inde, quod pulcherrimum, atque utile videretur, in suas provincias transtulisse, ut testatur Hugo Falcandus *hisor. Sicul. apud Carus. tom. I. princ.* Facile autem ostendi queat, in novo suo Principatu constituendo Rogerium, quod ad publicas functiones, Wilelmi potissimum leges sequutum, qui haud pridem Anglia potitus fuerat, & ipse gen-

gente Nortmannus erat. Ea in re constat, Wilelmum, Anglis subactis, ut ratio quæstuum, & necessitas erogationum congrueret, prædiâ generatim omnia in provinciis bello partis in tabulis censualibus describi jussisse; ex singulis quoque prædiis secundum ipsos Nortmannorum mores, ut infra liquet, vestigal in fiscum inferri mandasse. Passim id memoriæ produnt scriptores Angli. Ea sane de re ita Ingulfus Wilelmo coævus pag. 908. *Totam terram descripsit, nec erat hida in terra Anglia, quin valorem ejus, & possessorem scivit, nec locus, nec lacus aliquis, quin in Regis Rotulo exitit descriptus, ac ejus redditus, & proventus, ipsa possessio, & ejus possessor Regiæ notitiæ manifestatus juxta rannatorum fidem, qui electi in qualibet patria territorium proprium describerent.* Rotulus liber erat ferme rotundus, & veterum

voluminum conflatus in morem. Vide Ducang. in *voc. rotulus*. Inde & *inrotulare* in acta referre apud sequioris ævi scriptores, ut idem advertit. Hinc idem Ingulfus mox addit. *Ipse Rotulus vocatus est Rotulus Wintoniæ, & ab Anglicis pro sua generalitate omnia tementa totius terræ integre continente domesdei cognominatur*. Eum Rotulum *Wintoniæ* vocatum advertit idem Ducangius, quia ab initio quidem asservabatur apud Wintoniam; at hodie Westmonasterii asservari in fisci tabulario idem monet in *voc. domesdei*. Ne quid autem fraudis fisco fieret, omnium oppidorum prædia in tabulas censuales Wilhelmus referri curavit, & accurate describi, quot terræ *hidæ*, seu jugera, in singulis oppidis continerentur. Sane ex Spalmano Ducangius oppida refert quatuor supra triginta, ac numerum in singulis oppidis *hidarum* affert in *voc. hidæ*.

da. Hinc apud Anglos soli tributum *bidagium* appellatum, ut in ea voce idem Ducangius observat. Sed & *hida-*
gii quantitatem apud cœvos scriptores invenire licet. Sane Simeo Dunelmen-
sis de eodem Wilermo anno 1084. ita memoriæ prodit. *Rex Anglorum Wil-*
elmus de unaquaque hida per Angliam
sex solidos accepit. Censum autem in
fiscum inferri jussit Wilermus non tan-
tum ex burgensium, ac baronum præ-
diis, sed Abbatum, & Episcoporum
quoque. Ita enim ea de re Matthæus
Parisius in *Wilel. conqu. Episcopatus,*
& abbatias omnes, quæ eatenus ab omni
servitute seculari libertatem habuerant,
sub servitute statuit militari innotulans
singulos Episcopatus, & abbatias pro
voluntate sua, quot milites sibi, & suc-
cessoribus suis hostilitatis tempore voluit
a singulis exhiberi pag. 8. edit. Pari-
siens. Id autem apud Anglos Wilermus
in-

instituit ob patrios mores , & ex *consuetudine Nortmannorum* , ut constat ex Rogerii privilegio Barenfibus concessio apud Hughell. *rom. 6. pag. 613.*

V. Porro facile evinci queat , nostrarum provinciarum potitum Rogerium , quod ad publicas functiones , eas iisdem legibus ordinasse , quibus ex Nortmannorum more apud Anglos usus Wilelmus fuerat . Proinde recte edixit doctissimus Simonetta , *defetarios* , quos appellamus , in tumultu sub Gvilelmo I. Panormi deperditos ipsas tabulas censuales fuisse , in quibus non tantum feuda , eorumque onera , sed & prædia generatim omnia descripta forent , & quas ex singulis collationes in fiscum inferri oporteret . Vide ipsius quantivis pretii opus *de æquibrand. donativor. oner. in Sicil. pag. 30.* Sed & eo me trahit Hugo Falcandus *hisor. Sicul. tom. 2. pag. 440. ap. Carus.* Ibi enim is tradit , *defeta-*
ta-

tarios illos *terrarum, feudorumque distinctiones* fuisse complexos ; ii autem cum post Panormi tumultum magno cum fisci malo inveniri non potuissent , ea de causa consilium Gvilelmo datum , ut Matthæum notarium , qui res defetiorum apprime norat , carcere liberaret , ac libros illos ejus opera restitueret . Eodem pertinet Regis Rogerii privilegium , quo Barenfibus concessit , ne ab ipsis collecta exigeretur apud Hughell. *ad Episc. Barenf. tom. 6. pag. 613.* Ejusmodi quoque privilegium & Messanæ concessum ; quod exhibet in historia sua Bonfilius *part. 1. libr. 4. pag. 217.* Si igitur singularis beneficii titulo immunitas isthæc Barenfibus , ac Messanæ concessa fuit , ab aliis oppidis collectam generatim solutam oportuit . Dignum autem memoratu est , quod in Barenfi privilegio eadem collecta *ex consuetudine Nortmannorum* soluta dicitur .
Inde

Inde igitur inferre licet, ex patriis moribus eam præstationem apud Anglos instituisse Wilelmum, ac sub ipsa Nortmannorum primordia apud Neapolitanos, ac Siculos eandem exactam. Quapropter falsus est Annibal Moles, qui post Iserniam docet, primum a Friderico eam apud nos institutam *de Reg. fisc. §. 1. n. 25.*

VI. Ex dictis liquet, sub ipsa initia Nortmannici Principatus soli tributum, quod *collectam generalem* per id temporis appellarunt, in Regno Neapolitano indictum nullo discrimine, seu in feudis, seu in oppidis demanio Principis reservatis prædia constituta forent. Ita ad Principis Majestatem tuendam per id temporis conspirabant omnes. Barones præstabant militare servitium, nisi adhoam Princeps mallet; burgenses soli tributum, quod *jugationem* veteres appellarunt. Perperam vero id munus sub Gvilelmo II. remissum quis dicat. Ejus enim

enim remissionis vestigium nusquam occurrit; aliunde eo facinore vis Principatus ipsius resoluta foret. Eo accedit, quod Fridericus II. a veteri Nortmannorum constitutione ea in re non recedens id tributi genus generatim exigit, eamque ob rem nemo eum novitatis arguit. Ejus rei illustre monumentum, & a nullo hactenus memoratum in regeſto Friderici II. ſuperioribus annis Regiis typis edito deprehendere licet pag. 306. Sic autem ibi Fridericus ad *Aprutii Juſtitiarium*. *Cum igitur velimus in præſenti, ut Regnum noſtrum nobis ſubventionem faciat, colligendam, poſtpoſita tarditate, in ea quantitate, & forma, quæ in collecta anni præteriti ſtatuta extitit, & ſervata, ecce mittimus ad te judicem M. de Juvenatio fidelem noſtrum, qui ſuper quantitate, & forma colligendæ collectæ noſtræ tibi patefaciet voluntatem . . .*

ita

ita quod quantitas imposita anno prae-
vito in Justitiariatu tuo in nullo peni-
us minuatur. In divalibus Friderici li-
 teris duo quidem velim adverti, pri-
 mo scilicet ibi de collecta ordinaria agi,
 cum non dissimilis ab ea jubeatur esse,
 quæ superiori anno fuerat exacta; de-
 inde eandem generalem fuisse. In ipso
 enim regesto memorantur reliqui Regni
 Justitiiarii, ad quos eadem a Friderico
 literæ missæ dicuntur. Constat igitur,
 ex primæva Nortmannorum lege per
 Friderici ætatem prædiorum intuitu col-
 lectam generalem in Regno solutam;
 oppidanos feuda inhabitantes eam di-
 recto præstitisse Principi; per id quo-
 que temporis nusquam adhuc dimi-
 dium baronibus pensitasse feudorum in-
 colas, ubi a baronibus ipsis eam præ-
 stari oporteret. Sed videamus, quibus
 initiis adhuc dimidium oppidani baro-
 nibus exsolvere adacti fuerunt.



TITULUS VIII.

*Quibus initiis barones ab oppidanis
exegerint adhoc dimidium.*

UT constet, quo jure, quave injuria
barones adhoc dimidium a feudo-
rum incolis extorquere cœperint, remi-
nisci hic quidem oportet, post Vesperum
Siculum Andegavenfibus illum interne-
cium Neapolitanos quoque per Caro-
lum I. avidioris ingenii Principem du-
rius habitos tumultuari cœpisse, at-
que eo res ferme redactas, ut adver-
sus Andegavenfes fidem exuere medi-
tarentur. Carolus II. inter patris ab-
sentiam ejus in Regno vicarius in re-
bus trepidis consultissimum censuit, con-
troversiarum arbitrum Pontificem Mar-
tinum IV. eligere, qui Neapolitano-
rum expostulationes audiret, de grava-
mi-

minibus a patre Neapolitanis illatis cō-
 gnosceret, &, quod in concessione Si-
 ciliæ Carolo I. facta placuerat, omnia
 intra modum redigeret, qui sub Gvil-
 elmo II. servatus in Regno dicebatur.
 Ita enata Martini, seu potius Gerardi
 ejus in Regno Neapolitano legati capi-
 tula, licet ea perierint. Nam post Mar-
 tini obitum de iisdem articulis Hono-
 rius IV. capitula sua & ipse scripsit,
 quo tempore Carolus II. apud Arago-
 nenses captivus agebat. Ita factum, ut
 Honorii IV. capitula Martini, seu Ge-
 rardi capitulis obrogarent, atque ea ho-
 die nusquam occurrant. Cum vero in-
 crebescerent in dies in Regno Neapoli-
 tano motus, ante ipsius Martini capi-
 tula Carolus II. interea temporis no-
 vis suis legibus tumultuantes animos
 sedandos suscepit iis indulgendis, quæ
 tempus monebat. Anno igitur 1383.
 ut Jannonius rationes init, Episcopo-
 rum,

rum, baronum, & syndicorum universitatum in planitie S. Martini apud Brutios conventu habito, ad demerendos potissimum baronum animos capitula sex supra quadraginta scripsit. Per id temporis vis armorum penes barones erat: ab iis igitur periculum imminebat. Proinde in iis scribundis baronum potissimum rationem habuit; reliquis fusque deque habitis, id unice egit, ut eorum animos sibi conciliaret. Ita Caroli II. capitula baronum favorem ubique spirant. Inde factum, ut adhuc dimidium ab oppidanis barones extorquere coeperint infauſto illo capitulo *comites, barones, feudatarii*. Ibi quidem retenta collecta generalis ab ipsis feudorum incolis persolvenda, baronibus tamen concessa & facultas fuit, ut adhuc dimidium ab ipsis possent exigere. Labet in re celeberrima ipsa Caroli II. verba hic exhibere. Sic igitur ibi Princeps, Co-

mites, barones, feudatarii, si subventionem a vassallis eorum deposcunt pro servitio debito, quod fecerunt anno illo, quæ subventio semel tantum in anno præstetur dominis a vassallis, habeant, & exigant a vassallis ipsis medietatem pecuniæ, ad quam ascendit servitium præstitum nostræ Curia, dum tamen non excedat medietatem collectæ generalis pro nobis, & Curia nostra vassallis ipsis impositæ anno ipso. Sed videamus, quibus technis barones id facinus aggressi fuerint, & quo ii argumento usi Carolum II. eo perduxerint.

II. Quibus artibus barones dimidium adhuc a feudorum incolis coeperint exigere, innuit idem Carolus II. in capit. item statuimus, quod comites, barones, & alii feuda tenentes. Ibi nimirum baronibus Princeps indulget, ut in casibus Regni constitutionibus permisis possint moderatum adjutorium petere,

re, nec necesse habeant super hoc literas impetrare, cum sufficiat prædictæ constitutionis edictum. Nemo non videt, ibi indicare Carolum Gvilelmi I. constitutionem *quamplurium. de adjutor. exigend. ab homin.* Eam sane constitutionem a baronibus allegatam oportuit ad id privilegium extorquendum. Neque enim alius ex jure feudali seu communi, seu patrio locus produci potest, quo monstrosum id privilegium tueri liceat. Videamus igitur, an inde desumptum argumentum firmo stet talo, & quam recte Carolus II. ea lege innixus semissem adhuc ab oppidanis petendi baronibus facultatem indulserit.

III. Ut igitur veluti in re præsentī de tota controversia decernatur, ipsa constitutionis verba hic producemus. Sic autem ibi Gvilelmus edicit. *Quamplurium Regni nostri fidelium ad nos quævela pervenit, quod prælati Ecclesiarum,*

comites, barones, & milites in necessitatibus suis pro suæ voluntatis arbitrio ab hominibus suis adjutoria exigunt, & extorquent. Volentes igitur tam duræ subjectorum nostrorum oppressioni misericorditer providere, statuimus, dominos non nisi in subscriptis casibus tantum ab hominibus eorum adjutorium petere. Mox casus fuddit, in quibus adjumenta a baronibus peti jus foret. De hostenditiis occasione belli petendis, seu adhoa, nusquam in ea constitutione mentio. Perperam igitur & barones, & Carolus eorum dolo circumventus pro rata adhoz ab oppidanis petenda eam constitutionem in medium protulerunt. Sed tantisper penitius ipsam constitutionis sententiam investigemus, ut apertius liquet, an quicquam præsidii pro jure suo tuendo inde barones mutuari queant.

IV. Ut controversæ constitutionis sententia plane intelligatur, advertendum
in

in antecessum est , baronibus in capite a subvassallis suis adjumenta præstari oportere iisdem ferme de causis , ob quas alias respectu summi Imperantis subsidia subditi præstare debent : licet perperam , & contra jus publicum Honorius IV. casus ipse definierit , in quibus Regibus Neapolitanis adjumenta præstari oporteret . Ea enim facultas jure Majestatis Principi in Civitate competit , neque ab alio Principe aut coerceri , aut legem potest accipere . Principis ea de re causam doctissime peroravit Marchio Simonetta in consultatione ad Siciliæ proregem scripta , atque publici juris facta per Carolum Pechiam *in histor. civil. tom. 3. pag. 186.* Porro sub Gvilelmo I. potentatu suo abusi barones in capite levissimis quibusque de causis a vassallis suis , quibus fuffeuda concessissent , adjumenta & efflagitabant , & extorquebant . Eorum igitur

tur complures precibus Gvilelmum interpellarunt, ut eam injuriam ab ipsis arceret, ac lege sua causas ipse definiret, quarum respectu baronibus in capite adjumentum a fuffeudatariis præstandum esset. Id æquissimum Gvilelmo visum, ac precibus eorum indulgens in præsentì constitutione casus recensuit, quibus intervenientibus, baronibus adjumentum petendi jus esset ab iis, quibus fuffeuda largiti forent. In prædictis casibus recensendis adhuc mentio nusquam occurrit, & iniquissimum fuisset per belli tempus barones in capite a fuffeudatariis exigere semissem adhuc, quæ pro fuffeudi accepti ratione & integra pro fuffeudo a fuffeudatariis ipsis præstanda foret. Ita enim totum ferme belli dispenlium in fuffeudatarios recidisset. Sed pone, quod falsum est tamen, de adjumento etiam per adhoam præstari solito constitutionem intelligendam

dam esse, eo sane onere feudorum incolas gravari non oporteret, cum ibi Gvilelmus de iis tantum caveat, qui a baronibus ipsis feudum accepissent. In eam vero sententiam tam aperta sunt argumenta ex ipsa constitutione desumpta, ut mirari subeat, cur inter recentiores nemini suboluerit fucus ea in re factus feudorum incolis. Sane Gvilelmi constitutionem de suffeudatariis intelligi oportere, cum voces ibi usurpatæ, cum veterum glossatorum auctoritas, cum primæva Regni constitutio prorsus evincunt.

V. In ea re igitur primo ipsam constitutionis rubricam adverti velim. Sic enim ibi. *De adjutorio præstando ab hominibus*. Dupondii norunt, per Gvilelmi ætatem homines appellatos, qui feudis donati forent. In jure communi feudali quoque, quod sub Gvilelmi tempora collectum constat, eo vocabulo in

eam sententiam adhiberi solito nil sane frequentius. Inde vocabula in re feudali celeberrima *hominium*, *homagium*, *hominiscum*, *hominatus*, *hominagium* apud sequioris ævi scriptores pro professione fidei, & obsequii, quod jurato domino promittebat, qui feudum accepisset. In re tam vulgata non lubet aliorum scripta expilare. Conf. Ducang. in *voc. hominium*, & *sequ.* Ne quis vero regerat, ex glossatorum fortasse cerebro id vocabulum constitutioni præfixum, ipsa constitutio eam exceptionem præcidit. In ea enim vox isthæc bis adhibetur. Eo accedit, quod in constitutione homines *dominis* opponuntur; domini autem per Gvilelmi ætatem, ut in ipso jure feudali communi passim videre licet, appellabantur, qui feuda concessissent. Conf. eundem Ducang. in *voc. dominus*. Quid quod in constitutione *tantum ab hominibus suis* baronibus conceditur adjuto-

rii petendi facultas? *Tantum* apprimè probat, a solis fuffeudatariis adjumenta præstari oportere. Alias *tantum* illud ineptum efferet. Nam posito, quod feudorum incolæ ad adjumenta adigendi forent, exploratum erat, ab aliis, qui feudum non incolerent, adjumenta peti non posse, neque addi oportebat, ea *tantum ab hominibus suis* peti jus esse. Sed ea in re ipsa constitutionis initialia verba decretoria videri debent. Sic enim Gvilelmus infit. *Quamplurimum Regni nostri fidelium ad nos querela pervenit*. Atqui nemo unus ignorat, feudatarios, ac fuffeudatarios ipsos, non vero feudorum incolas fidelium vocabulo designari.

VI. Ne quis vero, quam appingimus constitutioni, sententiam novitatis arguat, vetustissima glossatorum natio, & quæ parum abfuit a Gvilelmi ævo, eam de fuffeudatariis tantum accepit.
Ita

Ita quidem Marinus de Caramanico optimus ille constitutionum interpres, & Friderico II. ferme coævus¹ aperte docet, eam constitutionem de feudatariis intelligendam esse. Ad verba enim, *moderate tamen in his, quæ pro nostro corrodo dantur*, hæc adliniit; *idest secundum qualitatem, & quantitatem feudi*. Ipse autem Andreas Isernia baronum alias fautor acerrimus a Caramanici sententia non recedit, licet per ipsius ætatem ob Caroli II. capitulum adhuc dimidium ab oppidanis baronibus solveretur. Atque ea causa fortasse Matthæum de Afflictis movit, cur ad *d. constit. n. 30.* scriberet, feudorum incolas de jure quidem adjumenta baronibus præstare cogi non posse, ob vetustissimam tamen baronum possessionem ei necessitati subjiciendos. Sed & ad Afflictum usque vix quemquam inter doctores invenire licet, qui Gvilelmi

con-

constitutionem aliter sit interpretatus, Primus Marinus Freccia, quod sciam, inde fortasse deceptus, quod pridem in Regno a feudorum incolis in donativis rata etiam solvebatur, alias rationes coepavit. Is enim *de suffend. libr. 2. auctor. 2. n. 10.* totus in eo est, ut probet, Gvilelmi constitutionem de feudorum incolis scriptam esse, eosque inibi ad ad hoc semissem præstandum compelli. Verum quæ pro tuenda sententia sua profert, & auctoris imperitiam ubique producit, & sine jactu pulveris facile refelli queant: adeo inficeta, adeo futilia sunt, ut in iis confutandis operam abuti pigeat.

VII. Ex dictis liquet, Principi obrepisse barones ei doctorum opera suadendo, vassallorum vocabulo contineri ipsos feudorum incolas; ab ipsis igitur barones rite petere, quæ a vassallis dominis leges præstari juberent. Ita a Carolo fatale illud universitatibus capitulum facile

140 *Jus feud. Neap. ac Sic. L. III. T. VIII.*
cile extortum *comites, barones, feudatarii*. Inde sexcenta incommoda adversus feudorum incolas, & qui cum in jure feudali communi, cum patrio domini appellabantur respectu vassallorum, quibus feuda concessissent, domini credi coeperunt eorum intuitu, qui feuda inhabitarent. Ita vero maximo cum Regni malo & colonis suis privatæ provinciae, & nota veluti servitutis illis iniusta, qui oppida baronum incolebant. Quæ sane cum adversus jus Regni primævum e baronum astu processerint, & inde provinciae incommoda complura sentiant, publice expediret, ut omnia restituerentur in integrum, & cum barones in feudis domini oppidanorum non sint, sed Regis veluti magistratus, æquaretur conditio civium; abolita igitur falsa illa servitutis imagine, feudorum incolis natalium macula prorsus elueretur. Sed eam
in

in rem publica potestas inquirito. Quod superest, videamus, an ipsa primæva constitutio Neapolitanis provinciis a Nortmannis imposita præsentem Gvilelmi legem aliter interpretari sinat.

VIII. Supra vidimus, ipsum Regem Rogerium & ex veteribus Nortmannorum moribus, & Wilelmi apud Anglos exemplo prædia generatim omnia publicis functionibus subjecisse, seu in feudis, seu in locis demanialibus posita ea forent. Ita vero per bella Principem adjuvabant omnes, barones quidem personali servitio, oppidani, ubicumque lares fixissent, pecunia ob generalem illam collectam in fiscum inferri solita. Ipsa igitur politica constitutio non ferebat, ut adhuc remissum a feudorum incolis barones exigent, ne cum baronum compendio oppidani duplici onere attererentur. Aliunde per Gvilelmi tempora barones maximi quidem possessores

res erant , nullam tamen in feudorum incolas jurisdictionem usurpare poterant. Nam per eam tempestatem aut per justitarios, aut missos dominicos, aut per bajulos jus dicebatur, neque, qui feuda inhabitarent, obsequium ullum necessitate juris baronibus præstare adigebantur. Nam, nullo inferiori domino intermedio, a Principe & ipsi pendebant. Ipsum juramentum fidelitatis, quod hodie a feudorum incolis præstari solet, baronibus per id temporis præstari non oportebat. Is enim abusus ex Friderici constitutione perperam intellecta processit *domini a vassallis. de assecurat. domin. a vass.* Ibi enim id juramentum Princeps baronibus præstari jubet tantum a vassallis, iis scilicet, qui ab ipso barone feudum accepissent. Nam per Nortmannorum, ac Suevorum ætatem nusquam inveniēs, feuda inhabitantes vassallos fuisse appellatos. Ita nullum
juris

juris vinculum suberat , cur baronibus oppidani aut semissem adhoꝝ , aut alia adjumenta præstarent . Ipse Pontifex Honorius IV. qui in capitulis suis baronum causam unice fovet , in casibus a se præstitutis ipsi Principi quidem , non vero baronibus adjumenta præstari jubet . Stet illud igitur , ad Carolum II. Andegavensem usque ipsam politicam Regni constitutionem pati non potuisse , ut semissem adhoꝝ ab oppidanis barones exigèrent . Nunc , quod supra promisimus , videamus , quanta quoque cum fisci fraude adhoꝝ dimidium a feudorum incolis fuerit extortum .

IX. Supra monuimus , inspecto jure communi feudali , hostenditias , quæ in Regno adhoꝝ sunt appellatæ , ad dimidium reddituum feudalium pertigisse . In jure autem feudali communi seu in prædia , seu in oppida feuda constituta forent , æquæ conditio baronum erat , & ab omni-

omnibus in semisse reddituum hostenditiæ solvi jubebantur. Id ipsum sub Nortmannis, ac Suevis apud nos servarum oportuit. Enimvero ubi adversus feudorum incolas per Caroli II. capitula instructus dolus baronibus ex voto cessit, doctores, qui eis plerique erant abnoxii, alio se converterunt; ac fisci causam veluti per consequentiam pessumdare sunt aggressi. Nimirum ad solvendum adhuc dimidium adauctis feudorum incolis, durior videbatur baronum conditio, quibus aut in nuda prædia, aut in vectigalia feuda concessa forent. Ita cerebrosa æquitate sua doctores horum quoque conditionem æquandam cum illis censuerunt, qui in oppida jus feudi acceperant. Proinde maximo cum fisci malo pronunciarunt, adhuc tantum dimidium ab iis solvi oportere, qui aut nudis prædiis, aut vectigalibus feudi titulo potiti forent. Inter patronorum fi-

fisci negligentiam id quoque facinus baronibus late cessit. Ita eo perventum, ut feuda in vectigalia habentes adhoam solverent ad eandem rationem cum illis, qui feuda haberent in oppida constituta, scilicet 26. 1. 5. in centena singula; licet feuda in prædia habentes tantisper ultra fructuum quadrantem solvere adacti fuerint, triginta scilicet in centena singula. Conf. Annib. Mol. apud Capan. *de jur. adh. pag.* 338. & *sequ.* Ita qui jus feudale penitus investigat, fraudes ubique deprehendit cum adversus oppidanos, cum adversus fiscum instructas. Sane his quidem initiis factum, ut donativi rata, quam *vassallorum* appellant, cum baronum compendio a feudorum incolis exigi cœperit. Id apertius liquebit, si de *donativo* apud nos ad rationem adhoæ solvi solito sermonem instituamus.



TITULUS IX.

De donativo ad rationem adhoæ in Regno hodie præstari solito, & rata vassallorum, quam vocant.

Supra ostendimus, quanto cum fisci, & oppidatorum malo semissem adhoæ feudorum incolæ solvere adacti fuerint. Verum Alfonso Aragonensi apud nos rerum potito, qua fisci, qua feuda, inhabitantium tristiores fuere vices. Nimirum ad Alfonso usque adhoæ indicendæ occasiones non adeo frequentes fuerunt; ut proinde feudorum incolæ eo onere prægravari non viderentur: fisco autem sat consultum videbatur per generales illas *collectas*, quæ ab omnibus Regni provinciis in eum inferri jubebantur. In ea rerum facie, debellato Renato Joannæ II. ex testamento herede

de præsertim baronum opera, Neapolitanæ provinciæ eidem Alfonso cesserunt anno ferme Christi 1442. Is importuna sua liberalitate baronum studiis gratificaturus, quorum copiis potissimum e Regno Renatum expulerat, privilegiorum prodigus non solum collectas omnes remitti jussit, sed & barones ab adhois perpetuo fecit immunes *capit. & grat. Civit. pag. mib. 6. a terg.* Ibidem ad publica onera sustinenda vix fisco promissi asses centum per singulos *focos*, quos dicunt, quotannis ei solvendi. Ita primum publicæ functiones reales abolitæ, atque ejusmodi in Regno præstationes personales cœperunt esse. His initiis cum fisci detrimento tributis levati, qui prædia possiderent, ac præter fas, & æquum, qui carebant prædiis, tributis afflictæ; ingenti igitur cum pauperum damno ipsa ferme Principatus vis resoluta. Nemo per id temporis Al-

fonso in memoriam revocavit, quod respondit Neroni Senatus tributa remittere meditati apud Tacitum. *Imperum ejus, multum prius laudata magnitudine animi, attinere Senatores, dissolutionem imperii dicentes, si fructus, quibus Respublica sustinetur, diminuerentur: plerasque vectigalium societates a consulibus, & tribunis plebis constitutas, acri etiam populi Romani tum libertate; reliqua mox ita provisa, ut ratio quæstuum, & necessitas erogationum inter se congruerent.*

II. Jam vero fisco inflicto ab Alfonso vulnus in rebus pacatis sub ipso latuit, cum ei non deessent & Siciliæ, & Aragoniæ redditus, quibus & pacem, & Majestatem imperii sustentaret. Enimvero, eo mortalitati cedente, statim innotuit, quam vere pronunciarit ille, *neque quietem Gentium sine armis, neque arma sine stipendiis, neque sti-*

stipendia sine tributis haberi posse. Proinde inter res domi turbidas cernens Ferdinandus I. abolitis ab Alfonso collectis, ac tributis, quæ prædiorum intuitu in fiscum inferebantur, Majestatem suam se tueri non posse, anno 1467. pro ratione bonorum extraordinariam collectam indixit *prag. i. de appret. seu æstimat. bonor.* An eum censum & barones præstare sint jussi, ex prædicta pragmatica aperte non liquet. Iidem tamen in rerum mutatione sibi non defuerunt. Nam, per Ferdinandum Catholicum e Regno expulsa Alfonsi I. progenie, eundem Ferdinandum precibus adierunt, ut ex privilegio Alfonsi I. ab ipsis adhuc exigere jus non efferet. Is tamen vetus regnandi per pacem quidem eos ab adhois esse jussit immunes; si tamen bellum ingrueret, Regni constitutiones, & capitula observari. Neque tamen destitit barones rem suam agere. Nam haud

multo post Honorii fortasse capitula ob-
tendentes Carolum V. interpellarunt, ut
saltem ab adhois immunes fierent, si
extra Regni fines bellandum esset. Ex
quidem preces altius penetrabant. Proin-
de a Carolo V. rescriptum, ut ea quoque
in specie Regni constitutionibus locus
esset *capit. 8. ann. 1532.* Cum vero per
id temporis ordinarius Regni reditus pu-
blicarum erogationum necessitati non re-
sponderet, frequentibus *donativis*, quæ
dici solent, ab ipso anno 1521. publi-
cis necessitatibus Neapolitani Principes
consulendum curarunt. Ea autem ab ini-
tio quidem non eadem in quantitate exi-
gebantur, ut sane liquebit, si conferan-
tur donativa, quæ per barones, & Re-
gni universitates sunt præstita a prædi-
cto anno cum iis, quæ insequentis tem-
poribus ad Philippum II. usque sunt
persoluta. Sub eo Principe tandem do-
nativa isthac ordinaria, ac certa evase-
runt.

runt. Exinde enim ad publicas necessitates sustinendas invaluit, ut donativum solveretur necessitate juris, idque pertingeret ad ducatorum duodecies centena millia singulis bienniis persolvenda; singulis vero annis fena centena millia inferrentur in fiscum. Onus ita divisum, ut ejus summæ dodrans per Universitates Regni solveretur, per barones quadrans. Conf. Capan. *de jur. adb. quæst.* 14. n. 4. & sequ. Quod per fiscum ipsum ab universitatibus exigebatur, *rata vassallorum* est dicta; quod per barones solvebatur, *rata baronum* est appellata. Ratam suam præstitere barones ad rationem adhoæ. Hinc donativum id genus vocabulo quoque adhoæ designari solet. Et nos igitur cum vulgo doctorum id ipsum adhoæ aliquando vocabulo designabimus, licet singulis annis, & per pacem solvatur. Id ipsum autem ne decimam quidem partem ejus summæ complecti-

tur, quam solvi oporteret, si vera ad-
 hoe solvenda foret.

III. Porro passim tradidere doctores,
 ob perpetuam illam, & numquam in-
 interruptam præstationem ab anno 1560.
 jure præscriptionis id donativum fisco de-
 beri; eo sublato titulo, illud a baroni-
 bus non posse exigi. Si igitur a præ-
 scriptione recedas, vix sinunt, ut tan-
 tum per belli tempus secundum jus Re-
 gni primævum ipsa adhoe a baronibus
 exigatur. Conf. Joseph. de Ros. *con-*
sult. 12. n. 11. Ea tamen pragmatico-
 rum sententia nil quicquam neque in-
 eptius, neque quod juris publici igno-
 rantiam in ipsis magis ostendat. Neque
 enim id juris vindicat sibi fisco ob ima-
 ginariam illam pragmaticorum præscri-
 ptionem, sed quia ipsa feudorum natu-
 ra, & mutata rerum in Europa facies
 necessaria veluti consequentia ita suavit.
 Plus nimio etiam baronibus fisco in-
 dul-

dulfit, ubi cum oppidanorum damno a baronibus ejus donativi tantum quadrantem exegit. Sed lubet in tam momentoso juris articulo rem accuratius enarrare.

IV. Ut igitur de tota re liqueat, recolendum in primis memoria est, feuda ab initio in Europæ Principatibus instituta, ut perpetuo præsto forent, qui pro securitate publica perpetuo excubarent, seu expectandus hostis, seu invadendus esset. Hinc, ut alibi monitum, militare servitium in ipsa natura feudi continetur, neque eo quisquam se potest eximere, modo ne in investitura ipsa militiæ munere expressim fuerit exemptus. Quamdiu Europæ Principes longiori veluti intervallo disiti inter se erant, neque quisquam viribus adeo præcellebat, ut alienum territorium invadere impune posset, barones, qui ex primævo instituto milites erant, perpetuo sub numeris esse non oportebat.

Enim.

Enimvero sæculo decimo quinto vertente, ac sub seculi insequentis initia, exemplo tristissimo illo quidem humano generi prodito per Carolum VII. Galliarum Regem, eoque prognatum Ludovicum XI. ubique in Europa mercenarios milites ali oportuit, qui militari disciplinæ insuescerent, & quoquo Gentium jussu Principum bellum inferrent. Ita excitæ ferme omnes in Europa Principes militem mercenarium aluerunt, ut collatis viribus servari posset æquilibrium illud tacito veluti ipsorum foedere constitutum, & quo labante Europæ libertas periclitabatur. His initiis Principes quoque Neapolitanos sæculo decimosexto milites sub numeris alere oportuit cum ad propulsandos hostes, cum, ubi opus, ad bellum in alienas provincias inferendum. Per id temporis barones jam imbelles evaserant, atque inter eos vix pauci militaribus laboribus ex-

exantlandis ob invalescentem mollitiem
suffecturi erant. Receptum pridem in Re-
gno fuerat, ut pro arbitrio Principum aut
personale servitium, aut adhoc a baroni-
bus præstaretur. Ita, aliorum exemplo
mercenaria militia instituta, Neapolita-
ni Reges donativum illud ad rationem
adhoc præstari solitum exegerunt, &
hodie exigunt non jure præscriptionis
quidem, sed quia & baronibus necessitas
militiæ remissa fuit, & ratio Principarus
aliter constare non potest. Id ipsum cum
jure communi feudali convenit. Cum
enim barones militiæ sint immunes, do-
nativi modicâ illa præstatione inter fre-
quentissimas bellorum occasiones veluti
hostenditias solvunt. Exinde tamen illud
fisco calamitosum, quod ad veteris ad-
hoc rationem donativum plerique sol-
vunt. Inde fit, ut quos adhoc nomine
decem millia præstare oporteret, vix cen-
tum præstare soleant. Sed in isthac sum-
ma

ma potestas inquirito ; ea de re privato homini mutire periculosum .

V. Porro summa ex adhoarum præstatione in fiscum redire solita pro diversitate temporum diversa fuit , & in diversis cedularibus diverse exhibetur . In cedulari Joannæ II. jussu confecto , quod in Regiæ Camerae tabulario hodieque asservatur , rata baronum pertingit ad uncias Neapolitanarum decem millia & septuaginta septem cum dimidio , rata vassallorum non computata . Summa isthæc tantisper major apparet in cedularibus postea initis . In cedulari enim Ferdinandi Catholici jussu confecto ea pertingit ad ducatorum 75616. 1. 4. Cedulare vero anni 1564. ut narrat Regens Moles apud Capan. *de jur. adh. pag.* 339. pertingit ad ducatorum 130103. 4. 14. Cum tamen anno 1564. rata baronum in donativo ad ducatos 150000. producta foret , eorum rata ad rationem ad-

adhoæ præstari solita major evasit. Conf. Joseph. de Ros. *consult.* II. n. 5. & 6. At in postremis Cameræ cedularibus summa adhoæ est longe major, ut rerum periti norunt. Facile autem intelligitur, cur tractu temporis adhoæ quantitas major evaserit. Nimirum ab Joannæ II. ævo feuda complura redierunt ad fiscum seu perduellione baronum, seu quia sine herede feudali ii decesserant. Tractu temporis & majores fructus e feudis percepti, &, mutatis specierum pretiis, eorum uberiores fuere redditus. In novis autem concessionibus adhoæ haud semel æstimatæ ex fructibus percipi solitis novæ investituræ tempore. Sæpe enim fiebat, ut exempli gratia ex quo feudo Joannæ ævo vix ducatorum duo millia redibant, per ætatem Philippi II. ducatorum viginti millia perciperentur. Ita adhoarum adaucta quantitas, licet in earum æstimatione non alius a veteri

teri calculus servaretur, ducatorum scilicet 26. 1. 5. in centena singula.

VI. Ex dictis liquet, quid in hoc argumento *taxæ novæ*, ac *veteris* vocabulo apud nos designetur. Facile autem ostendi queat, melius fisci rationibus consuli, si in novis feudorum investituris cum onere *taxæ novæ* feuda concedantur, quicquid ob causæ studium secus statuatur de Marinis *alleg. 116. n. 13*. Si enim id fiat, redditus Principatus certiores augentur, Certiores inquam. Neque enim aliud præter adhoas excogitari potest, unde redditus æque certos Princeps expectet. Proinde stomachum mihi movent, qui publice expedire clamitant, ut ad adhoarum redemptionem barones adigantur: inde autem redacta pecunia distracta vestigalia fiscus redimat. Ita, ut scite dictitare solet vir ille πολιτικωτατος, ac juris Neapolitani publici peritissimus, Principem apud

apud nos *vectigalium Regem* ii constituunt. Saltem, per adhoarum distractionem directo feudorum dominio ab ipso recedente, Principem eo deducunt, ut vectigalibus, quorum reditu nihil incertius, Majestatem suam, & securitatem publicam tueatur. Ne isti aut literas ignorant, aut prima πολιτικῆς, seu civilitatis, quam Quintilianus appellat, elementa non didicerunt. Sed e diverticulo in viam. Neque vero in cujusquam injuriam redit, si cum nova taxa feuda vendantur. Cum enim, ad fiscum redeunte feudo, feudum esse designat, & recte observet Montanus *de regal. n. 36. vers. sed penes Reg.* id necessario fieri, ne cui res propria servire dicatur; fisco liberum esse debet, quam velit legem, in nova investitura dicere. Enimvero ea quoque de causa contendeant fisci patroni, in feudorum etiam alienationibus a baronibus fieri solitis
posse

posse fiscum novam taxam exigere , Cum tamen , rite alienatione facta , res in emptorem transire debeat eadem cum causa , qua fuisset apud venditorem futura , ea fisci molimina recte subruit Carolus V. ann. 1535. *capit. 10. grat. pag. mib. 104.* Ibi enim baronibus concessum , ut , quod ad æstimationem adhoæ , inter venditionem , aut alterius alienationis speciem , ac successionem ipsam nil interesset.

VII. His ita præstitutis , nodus hic occurrit interprete dignus . Finge enim , in heredis feudalis defectu ad fiscum redire feudum hypothecis rite constitutis affectum ; finge adhuc , id vendi oportere , ut creditoribus satisfiat . Pone etiam , eo vendito cum taxa veteri , omnibus in solidum satisfieri posse ; cum taxa nova venditione inita , solidum singulis non posse persolvi . In ea specie disceptatum video , an recte contendat fiscus ,

fiscus , ut cum nova taxa feudum alienetur. Contra pragmaticorum commune scitum supra evicisse videor , assensum in feudorum hypothecam a fisco præstari solitum in ipsius fisci præjudicium converti non oportere ; per feudi igitur regressum ad fiscum rem eo redire , quasi præstitus non esset assensus. Si id admiseris , integrum in ea specie fisco erit , vel sibi feudum retinere , vel ei , quam in venditione velit , taxam imponere. Cum tamen plerique doctorum baronibus sint obnoxii , vix quemquam inveneris , qui eo usque fisco indulgere velit. Proinde si dicas , fiscum ob præstitum assensum creditoribus obligari , ratio juris exposcit , ut in ea rerum positione feudum cum veteri taxa vendatur. Conf. de Marin. *alleg.* 117. n. 11. & sequ.

VIII. Antequam hinc discedamus ,
haud inutile fuerit advertere , dona-
Tom. III. L ti-

tivi juxta adhoam taxari soliti diversam fuisse rationem olim, diversam hodie esse oportere. In eo olim rata baronum quotannis, ut vidimus, ad ducatorum 150000. pertingebat. Si quis igitur in primæva donativi præstatione symbolam suam non contulisset, id damno baronum cedebat, qui ad summam prædictam usque quisque pro rata solvere adigebantur. Proinde per id temporis ob symbolas non solutas non fisco quidem, sed baronibus ipsis competeabat actio. In eam vero sententiam judicatum refert Regens de Curt. *in diversor. feud. p. 1. fol. 41.* Enimvero ob regressum tot feudorum ad fiscum, feudis secundum taxam novam rursus concessis, barones non amplius ad veterem rationem donativum solvere oportuit, sed unumquemque, prout feudum in cedula descriptum esset. Ita hodie ultra veterem donativi ratam plerique solvunt; si quis vero ratam in ce-

cedulari præscriptam haud solvat, non in baronum, sed in fisci detrimentum id cedit. Proinde eo nomine actio non baronibus quidem, sed fisco competit. Ea vero de re ita judicatum refert Josephus de Rosa *consult.* 14. n. 12.



TITULUS X.

*De militari Sicularum servitio,
seu adboa.*

UBi; Neapolitanis provinciis bello subactis, Sicilia quoque Nortmannorum virtuti cessit, eadem utriusque Regni fuit politica constitutio, idem & regimen. Sub Nortmannis igitur, eorumque successoribus Suevis eadem utrobique & instituta, & leges. Si deessent omnia, id prorsus evincerent constitutiones Friderici II. jussu collectæ, quæ

non minus Neapolitanis , quam Siculis regionibus ordinandis , regundis ab eo sunt promulgatæ . Proinde nemo sanus inficias iverit , sub Nortmannis , ac Suevis Sicilienses barones militare servitium Principi præstitisse , neque ab eo diversum , quod superiori titulo a baronibus Neapolitanis ostendimus fuisse præstitum . Id ipsi pragmatici Siculi & agnoscunt , & scribunt . Instar omnium fit Josephus Cumia ad capit. si aliquem in voc. servitii consueti . n. 19. Sic enim ibi . *Jure vero antiquo Siciliae , quod huc usque Neapolis in Regno obtinet , inter feuda distinguitur . Nam si feudum in vassallis consistit , de singulis unciis viginti redditus exiguntur uncia decem cum dimidio , quia in hac servitii præstatione fit subventio a vassallis ; & si consistit in territorio , exiguntur uncia sex , ex quo non fit sibi aliqua subventio . Et si consistit in annuo redditu pecunie super*

per aliquam doanā, vel gabellā, fit solutio adboamenti, vel servitii, quod vulgo lo adogo nuncupatur, pro quarta parte redditus.

II. Jam vero rerum apud nos potito Carolo I. Andegavenſi, ut a Nortmannorum institutis is in Neapolitanis provinciis non recessit, ita &, quamdiu Sicilia ei paruit, ad veterem modum barones Siculos sibi militare servitium præstare jussit. Ad id autem usque temporis apud Siculos Neapolitanorum exemplo militare servitium præstitum in infinitum fuit, neque certo aut loco, aut tempore coerceretur. Vide, quæ supra monuimus *libr. 3. tit. 8.* Enimvero uti post Vesperum Siculum apud Neapolitanos Andegavenſes baronum sibi devinciendorum gratia certum tempus præſcripserunt, intra quod tantum militare servitium præstandum esset, ita Aragonenſes apud Siculos, ut in se ba-

ronum studia conciliarent , non solum intra certum tempus , sed & intra solos Siciliae fines id servitium a baronibus exegerunt . Rex enim Jacobus ipsis ferme Honorii IV. verbis usus ea de re ita cavit capit. 39. *Barones , & alii extra Regni confinia nec servire personaliter , nec adjumenta prestare cogentur . In casibus quoque , in quibus intra Regnum servire , & adjumenta prestare tenentur , servitia exhibeant , & adjumenta praestent antiquitus consue- ta , videlicet , quod personaliter serviant annis mensibus cum numero militum debitorum . Et si forte ex aliqua justa , rationabili , & evidenti causa , vel impedimento aliqui ex eis personaliter servire non possunt , tunc in ipso necessitatis casu pro singulis militibus , ad quos tenentur , pro quolibet praedictorum mensum uncias auri tres , & dimidium nostrae Curiae ponderis generalis evolvant .*

Ita aliud veluti agendo Jacobus & ipse
velificatus est Honorii IV. consilio, quod
eo spectabat, ne in Principatum Roma-
num alieni milites ingrederentur. Idem
Jacobus nervos Principatus incidit, ac mi-
litum robore se privavit, si bellum aut
diuturnius, aut extra Regni fines susti-
nendum esset. Id ipsum autem confir-
matum ab ejus germano Friderico Re-
ge *capit. 29.* Tantum ibi additum, ut
si intra Regni fines belli causa Princeps
ultra tres menses barones sub signis de-
tinere vellet, ipsis, eorumque comita-
tui *stipendia comperentia* largiretur. Vul-
nus autem longe majus Principatui in
Sicilia inflictum ab Joanne Rege *capit.*
71. Cum enim ex primævo instituto ob
singulas viginti uncias reddituum feuda-
lium equitem cum duobus armigeris per
belli tempus a baronibus præstari oporteret,
ibi ab eo cautum, ut ad prædi-
ctam reddituum rationem unum equum

cum equite præstari sat esset.

III. In ea apud Siculos militaris servitii ratione per sæculum decimum quintum, ut monuimus superiori titulo, Europæ Principes antea inter se longe diffusi veluti propiores facti virium illud æquilibrium meditari jam videbantur. His initiis in Europæ provinciis post triste illud exemplum Caroli VII. eoque prognati Ludovici XI. nova rerum facies se prodebat, & hodierna militia passim inducebatur. Ita aliorum in Europa Principum exemplo Siciliae Reges excitati, cum ad molliem educati barones militiae muniis sustinendis evasissent impares, & ipsi milites mercenarios coeperunt alere, qui in pace decus, in bello præsidium & militari disciplinæ infusescerent, & sub numeris perpetuo forent. Supra advertimus, sub ipsa Northmannici Principatus auspiciis in Regno Neapolitano barones aut ipsum militare ser-

servitium, aut hostenditias, seu adhoas præstare oportuisse. Id ipsum in Sicilia institutum obtinuisse dubitare non fiunt, quæ monuimus *libr. 3. tit. 8.* Hoc ipsum Regum Aragonensium leges confirmarunt apud Siculos. Ita sane a Jacobo Rege barones *servitia* exhibere, & *adjumenta*, seu adhoas præstare jubentur *capit. 39.* Cum vero, quod de Regno Neapolitano vidimus, in Sicilia quoque non minus barones, quam oppida seu feudi titulo concessa, seu relicta in demanio Principis aut militare servitium, aut adhoam præstare adigerentur, inde excusum *collecta* vocabulum. Ita Principem adjuvabant omnes, ac pro prædiorum modo pecunia colligebatur, quam per barones, aut oppida militiæ muniis sustinendis in fiscum inferri oportebat. Proinde, quod sub Suevis, atque Andegavensibus in Neapolitanis provinciis factitatum, apud Siculos quoque

que per generales illas collectas & bellorum necessitatibus, & Principum dignitati consultum. Ita vero generatim omnes ex primæva Nortmannorum lege ad militare servitium adigebantur.

IV. In eo rerum apud Siculos habitu ob Ferdinandi I. Aragonensis obitum in Alphonsum cognomento *Magnanimum* ejus filium natu majorem cessit Siciliæ Regnum anno 1416. Is suapte ingenio in liberalitatem proclivior, ac novitatis avidus, quemadmodum apud Neapolitanos, collectis abolitis, quod ad publicas functiones, alias rationes instituit, & a veteribus plane diversas, id ipsum, antequam Neapolitanis provinciis potiretur & apud Sicilienses egit. Nimirum Alphonfus, ut titulo superiori vidimus, Regno Neapolitano potitus anno 1443. publicis functionibus generatim abolitis, per *donativa*, quæ vocant, & quæ ipsa tamen juris necessitatem habere ceperunt,

runt, seque, & milites mercenarios sustentavit. *Conf. capitul. Civit. pag. 5. a terg.* Id ipsum ab eo in Sicilia factum. Et ibi enim, veteri collectarum instituto exolescere jussu, ac Nortmannorum ea in re legibus abrogatis, per donativa quoque, quæ & necessaria apud Siculos evaserunt, pacis, ac belli necessitatibus succurrendum curavit. *Conf. Jannon. libr. 26. c. 1.* His initiis apud Siculos hodie per donativa fiscus tributa exigit. Ea in *ordinaria*, & *extraordinaria* dividuntur. Illa vetustioris sunt instituti; hæc ordinariis sunt superaddita, ac veluti superindicta videri queant. Extraordinaria igitur sunt appellata, non quia extra ordinem tantum indici soleant, sed quia, cum vetera illa ordinaria Principatus rationi tuendæ ob supervenientes necessitates non sufficerent, contra veterem ordinem, & antiquam illam fungendi consuetudinem postrema ist-

isthæc veteribus accesserunt. Et ipsa igitur apud Siculos hodie ordinarii juris censerī debent. Donativa ordinaria apud Siculos tredecim, extraordinaria quinque sunt numero. Ea, ut monuimus, in veterum collectarum locum sunt substituta. Inde vero & Principis dignitas, & militares copię sustinentur.

Lib. V. His ita præstitutis, Domitiana quidem, ac prorsus inepta disceptatio videri debet, qua quis in dubium revocavit, an ad donativa barones in Sicilia obligentur. Ea in re tamen adversus Sicilienses longa injuria, longæ ambages. Pragmaticorum enim studiis adjuti barones rebus, ac verbis contendunt, se donativis quidem ordinariis prorsus immunes esse: tantum extraordinariis vix delibari se sinunt. Nimirum, qualis hætenus baronum potentatus in Sicilia fuit, in ipsis donativis extra-
or-

ordinariis minus sextante, seu parte sexta pensitant. Nam in sexta, quam barones solvunt, imputantur minuscule illæ symbolæ ab illis conferri solitæ; qui titulo aliquo honorifico insigniti fuerint, ut advertit Siciliensium bono natus vir clarissimus Marchio Simonetta in plena sua opinione *de æquilibr. oner. in Sicil. pag. 3. & sequ.* Ita maxima cum reliquorum Sicularum injuria barones, quos partem longe maximam publicorum onerum ferre oporteret, in Sicilia ferme evaserunt immunes; publicæ autem functiones maximam partem in eos reciderunt, qui feudis carent. Videamus, igitur, quo jure, quæve injuria hæc Siculi barones contendunt, & an firmo stent talo, quæ in eo juris articulo pro ipsis produci solent.

VI. Ex quo mutata rerum in Europa facies in singulis Principatibus mili-

lites sub numeris perpetuo haberi suafit, barones, ut & in primævo ipsorum instituto, milites veluti natos cenferi oportuit. Proinde, si personale servitium per se hodie ipsi non præstent, ad hoc eorum necessitatem subire debent, quibus sibi Princeps milites & legat, & alat. Ita cum apud Siculos tantum ex donativis stipendia militum expectari possint, ipsa juris publici Siciliensis ratio suadet, ut barones bellorum immunes a donativorum tributo non eximantur. Aliunde absurdum esset, & mali exempli reliquos quidem cives ad donativorum necessitatem adigere, inde vero barones eximere, qui naturali suo instituto, ac potiori jure præ reliquis ad militiæ munia obligantur. Perperam vero pro Siculis baronibus jactitari solet, eos ab ea necessitate vel inde eximendos, quia, si bellum ingruat, servitii militaris onus declinare nequeunt. Nam
&

& omnia Siciliae oppida per bellorum occasionem militare servitium ex Northmannorum primævo instituto præstant; ea tamen de causa a donativorum necessitate non eximuntur. Si igitur ob fortuitum belli periculum ab ea necessitate barones eximi oporteret, actum de fisco esset, ejusque necessitatis omnia in Sicilia oppida immunia pronuncian-
da forent. Eo accedit, ut advertit doctissimus Marchio Simonetta in sua plena opinione *de æquilibr. oner. in Sicil.* pag. 5. quod Neapolitani barones, ingruente bello, militare servitium subeunt præstatione equi, quem *montatum* appellant, & ipsi tamen perpetuum donativum juris necessitate solvunt, quod ad rationem adhuc præstitum ab initio supra docuimus.

VII. Quod autem diximus, barones donativorum, quæ *ordinaria* vocant, necessitatem subire oportere, non solum
ra-

ratio juris publici apud Siculos, sed & ipsa historia rerum apud eos gestarum, suadet. Nimirum ubi, primum Alfonsus per donativa ab initio temporaria Principatum in Sicilia sustentare coepit, in ipsis Regni comitiis definitum, ut id genus tributum ab omnibus *bracbiis*, quæ Sicilienses appellant, sine discrimine præstaretur, neque inde quisquam immunis esset. Id quidem a Siculis ipsis postulatum in donativo anni 1446. id ipsum vero, utpote juri consonum, expressim jussit Alfonsus solemnibus suis *placet in capit. 503.* Hoc ipsum in posterioribus donativis & a Siculis petitis, & ab Alfonso eodem modo concessum, ut liquet ex donativis anni 1451. & 1457. de quibus *in capit. 448. & capit. 542.* Utrumque enim per totum Regnum solvendum promittitur. Nisi igitur se Regni partem esse barones negent, & ipsos ratam suam conferre per eam


eam occasionem oportuit. In donativo quidem anno 1452. sub eodem Alfonso barones adlaborarunt, ut ejus immunes essent; ipsorum tamen molimine in ipsis comitiis fortasse detecto, novis conatibus statim obviam itum. Nam ea de re Princeps interpellatus statim edixit, ut in id quoque donativum barones symbolas suas quisque conferrent, ut liquet ex Alfonsi *capit. 488.* Sic enim ibi. *Regia Majestas acceptat hujusmodi oblationem, ad cujus solutionem, consideratis considerandis, decrevit, & declarat, praelatos omnes, & etiam Ecclesiasticas personas, nec non barones, & universitates tam demaniales, quam non demaniales, nemine excepto, temerari, & contribuere debere.* In eo autem Alfonsi scito *declarat* adverti velim. Si enim eam baronum obligationem declarat, non jubet Princeps; vel inde liquet, eam ex ipsa feudorum natura

manare. Proinde somniando vigilabat Siciliensis ille *deputatus*, qui garriebat, publico Siculorum jure barones ad ordinaria donativa non adigi, atque obligationem in prædicto capitulo ipsis impositam ordinarii juris exceptionem fuisse. Vide eundem Marchionem Simonettam juris publici Siciliensis faciem in plena opinione *de æquilibr. oner. in Sicil. pag. 12. & sequ.*

VIII. Quæ hætenus exequuti sumus, palam evincunt, perperam quidem, & pessimo publico barones in Sicilia a donativis ordinariis sibi immunitatem asserere. At qui factum quis inquit, ut contra juris publici rationem, & ipsam feudorum naturam inibi barones eo tributo ferme immunes evaserint. Ejus facinoris causam repetendam putarim ex modo, quo postremis temporibus tributa isthæc cœperunt exigì, longe ab eo diverso, quo in primævo instituto olim
exi-

exigebantur . Olim scilicet ab ipsius Alfonso ævo tributa isthæc colligebantur per *deputatos* , quos appellant , in ipsis Regni comitiis eligi solitos : in ratæ autem æstimatione ab unoquoque præstandæ cum Prorege Magister Justitiarius, & cum Conservatore Rationales aderant, ut liquet ex Alfonso *capit.* 452. De singulis quoque *brachiis* deputati terni eligebantur . Id eo pertinebat , ut ordines omnes se mutuo observarent , atque conjunctim caverent , ne cuiquam gravior conditio inferretur , ut constat ex ejusdem Alfonso *capit.* 513. Tractu temporis generalis Regni Deputatio in Sicilia Civitate principe instituta : inter *deputatos* vix alii præter barones asciti . Ii igitur commilitonibus suis gratificati eo rem deduxerunt , ut ipsis immunitatem a donativis ordinariis procurarint . Ita qui res Siculorum tantisper altius rimatur , ubique fraudes adversus

fiscum , injurias adversus universitates ,
& , ut verbo rem absolvam , grassantis
potentatus vestigia deprehendit .



TITULUS XI.

*De relevio , quindenniis , aliisque
baronum præstationibus .*

UBi liberis , aliisve cognatis in gra-
du feudali positis successio defer-
ri cœpit , apud omnes ferme Gentes
feudorum institutum amplexas invaluit ,
ut feudalis heres aut definitas in inve-
stitura species , aut certam pecuniæ sum-
mam domino directo solveret , quo tem-
pore in ejus favorem investituram ipsam
confirmari oporteret . Quod autem per
eam occasionem aut ex præscripto juris ,
aut ex investituræ lege , aut ex loci
consuetudine præstandum esset , *relevium*
est

est appellatum. Id passim receptum docent exemplo laudemii, quod prædii emphyteutici causa solvi jussit Justinianus, si id in alium transferretur. Id ipsum tamen quam recte scriptitent, ego non video. Qui enim in emphyteusim hereditario jure succedit, ad solvendum laudemium non adigitur. Proinde rectius fortasse dixeris, laudemium a relevio diversum esse; in eo tantum utrumque convenire, quod cum relevium, cum laudemium solvi placuerit, ut in concedente directum dominium agnoscat. Sed & piget in vocabulis immorari, & de minimis non curat Prætor.

II. Jam vero præstatio isthæc relevium est appellata, quia, ut recte observat *in voc. relevare* Ducangius, cum jure primævo feudum titulo potius usufructus penes possessorem esset, ac per baronis obitum veluti caducum ad fiscum redire oporteret, ea præstatione

feudalis heres feudum relevabat, ac, ne caducum fieret, impediēbat. Ejus præstationis nusquam apertus in jure communi feudali locus: ad eam tamen cum Cujacio haud absurde retuleris *tit. 25. libr. 1. consuet. feud.* Sic enim ibi ex ejus recensione. *Si quis sine filio masculino mortuus fuerit, & reliquerit filiam, filia non habeat beneficium patris, nisi a domino redemerit.* Ut enim infra liquēbit, relevium ipsum redemptionem etiam appellarunt sequioris ævi scriptores. Sed quicquid mores ea de re in Italia Transiberina apud Longobardos recepti fuerint, mox ostendemus, relevii solvendi necessitatem ubique ferme Gentium cum ipsis feudis obtinuisse.

III. Porro summæ, aut speciei præstatio relevii causa fieri solita diversa fuit, & alicubi pro diversa investituræ lege aut levissimæ, aut ridiculæ id genus præstationes fuerunt. Ut enim o-

sten-

stendit Ducangius in *voc. relevium* aliquando ex investituræ lege soleæ ferreæ, aliquando cervus, aliquando accipiter præstabantur. At illud plane ridiculum, quod producit idem Ducangius in *voc. bombulus*. Ibi enim ob legem in investitura dictam Balduinus quidam debuit facere in die natalis Domini coram domino Rege unum saltum, unum suffletum, & unum bombulum. Id post Camdenum idem Ducangius eo pertinere scribit, ut tempore condictionis memoratus baro semel saltaret, buccas inflaret, & crepitum ventris ederet. Sed in re seria neque joculari lubet, & in eo argumento sexcenta id genus ludicra produci possent.

IV. Enimvero licet aliquando relevia aut leviuscula, aut ludicra fuerint, tuto tamen licet asserere, ea apud Francos passim fuisse gravissima, & baronum heredes maxime prægravasse. Hinc re-

levii divisio in *rationabile*, ejusque, quod *ad misericordiam* appellavit sequior ætas, & quod *relicf a mercy* dixerunt Gallicani scriptores. *Rationabile* distictarunt, quod vel ipsa lege, vel loci consuetudine præfinitum esset. Ita quidem *rationabile* relevium erat, quod ex charta Joannis Regis memoriæ prodit Matthæus Parisius *ann. 1215*. Sic enim ibi pro feudorum diversitate relevii quantitas diverse definitur. *Heres comitis de baronia integra centum libras; heres baronis de baronia integra per centum marcas; heres militis de feudo militis integro per centum solidos ad plus, & qui minus debuerit, minus det secundum antiquam consuetudinem feudorum.* Contra relevium *ad misericordiam* dicebatur, cujus summa ipsius domini arbitrio definiri oportebat, neque lege, vel consuetudine intra certum modum coercebatur. Proinde *relevoison a plaisir*

sir appellatur in consuet. *Aurelianens.* artic. 115. & sequ. Hinc feudi *rachetum*, celeberrimi usus apud sequioris ævi scriptores, quo ab herede ipsum ferme feudi pretium domino offerri oportebat, licet id redigi intra æquitatem soleret. Inde autem intelliges celeberrimum illum in jure communi feudali locum *libr. 1. tit. 24.* ubi filia patris *feudum redimere* dicitur. Sed videamus, ad quam rationem in subactis provinciis apud nos a Nortmannis relevium solvi placuerit.

V. Alibi advertimus, eodem ferme tempore, quo in potestatem suam Anglos redigebat Wilelmus, Neapolitanis, ac Siculis provinciis potitum fuisse Robertum, ejusque fratrem Rogerium. Uterque ut plurimas Nortmanniæ consuetudines in debellatas provincias inrulerunt, ita ex vetustissimis Nortmannorum moribus relevii necessitatem indi-

dixere victis. Nam & in Nortmannia barones ad relevii præstationem adactos liquet ex *consuetud. Nortmann. cap. 34.* Ea in re tamen durius apud Anglos Wilhelmo; humanius apud Neapolitanos, ac Siculos Robertum, ac Rogerium egisse comperio. Cum per Willemi ætatem seu per quorundam locorum consuetudines, seu ob receptas investituræ formulas in possessoris obitu ipsum ferme feudi pretium domino offerre cogere retur heres, is avidioris ingenii Princeps, & qui baronum vires contemnere impune poterat, feudorum *rachetum* apud Anglos indixit. Heredes igitur ad feudorum redemptionem adegit. Ea in re tandem se baronibus humaniorem præstitit Henricus I. Wilkelmo prognatus. Is enim licet exemplo patris militari servitio possessores omnes subesse jussit, & non minus ad relevium ex feudis, quam ad *sokagium* ex nudis prædiis

diis Anglos adegerit , ut ex Cowello
liquet *libr. 2. instit. Anglie. tit. 3. §.*
17. & 19. ita tamen edixit in sua char-
ta de libertat. *Angl. Si quis baronum*
meorum , seu comitum , sive aliorum ,
qui de me teneat , mortuus fuerit , heres
suus non redimet terram suam , sicut fa-
ciebat tempore patris mei , sed legitima ;
& justa relevatione relevabit eam . In-
tra quem modum relevii summam rede-
gerit Henricus apud Anglos , licet ad-
discere ex charta Joannis Regis apud
Mattheum Paris. ad ann. 1215. supra
producta .

VI. Ita quidem Wilelmus , ejusque
in Anglia successores de præstatione re-
levii statuerunt . Enimvero apud Nea-
politanos , ac Siculos Robertus , ac Ro-
gerius alias rationes coeparunt . Li-
cet enim uterque nossent , apud Fran-
cos alibi per successorem feuda redimi
solere , & jus racheti per Principes usur-
pa-

pari, alibi totum anni redditum in fiscum inferri, quod advertit Ducangius in *voc. relevium ad misericord.* modestius tamen apud nos agentes semissem tantum redditum, quo anno baro decederet, feudalem heredem persolvere voverunt. Ita apud Neapolitanos, ac Siculos sub ipsa Nortmannici Principatus auspicia in dimidio fructuum relevium est constitutum. Ex dictis autem facile est intelligere, an recte post Iferniam edixerit Marinus Freccia, relevii solvendi necessitatem *ex improbo more manasse de suffeud. libr. 2. auctor. 3. n. 1. & sequ.* Illud tamen lubens ei concesserim *loc. cit. n. 6.* duplex relevium solvi oportere, si eodem anno plures successiones contingant. Ita quidem si pater, & filius eodem anno mortem obierint, duplex relevium solvi oportebit. Cum enim ea præstatio pro investitura, ejusve confirmatione fiat, ubi

co-

eodem anno duo fortasse investituram acceperint , relevii solvendi necessitati neuter se potest eximere . At vero si per annum , & diem neque investituram confirmari curarit feudalis heres , & cessaverit a solutione relevii , rigore juris inspecto , feudo privandus esset *consuet. feudal.* 2. 4. Apud nos tamen ab ea severitate descitum . Per mores enim in Regno receptos obtinuit , ut ea in specie ad duplex tantum relevium adigatur heres . Conf. Frecciam *loc. cit.* n. 7. At vero , quod diximus , relevii summam ad reddituum semissem pertingere , id quidem intellige , si feudum in capite ab ipso Principe fuerit acceptum . Si enim de subvassallis agatur , ii ultra decem uncias persolvere relevii nomine compelli nequeunt *constit. post mortem . de mort. baron. nunciand. Reg.* Ibi tamen peccatum librariorum incuria . Adjumento igitur Græci codicis superiori-
bus

bus annis Regiis typis editi mendosum in calce locum per me ita restitue. *Accipiens aliquid, ut est mos, quod quantitatem decem unciarum non excedat.* Ita enim in memorato codice; δεχομενος τι ως ἐστὶ συνηθες, ὅπερ τὴν ποσότητα τῶν δεκα οὐκίων ἢ ὑπερβηται.

VII. Licet autem relevium dimidium fructuum complectatur, æquissime tamen statuere doctores, id, deductis expensis in perceptionem fructuum impendi solitis, & reliquis feudi oneribus intelligi oportere. Ita passim omnes post Capanum *de jur. relev. p. I. quest. 13.* Id ipsum tamen ad onera coerceri debet, quæ prædiorum feudalium conservatio exposcit. Proinde audiendus baro non est, si in relevii ratione ineunda vitam, & militiam imputandam contendat, seu ea fratribus in feudis de jure Francorum, seu patruo debeatur. *Conf. de Marin. ad Revert. decis. 371. n. 5.*

n. 5. Quapropter in Camera Summaria recte judicatum, nil quicquam de relevii summa demendum, si aut in feudo novo pars pretii fratribus natu minoribus sit exolvenda, aut annui redditus sint præstandi, quibus defunctus baro se obligarit ob debitum cum assensu contractum. Vid. Regent. de Curt. *resolut. feudal. c. 3. n. 69. & sequ.* Dubium tamen videri queat, an saltem in solutione relevii ipsa adhoa sit imputanda, &, an quo anno relevium solvitur, a præstatione adhoæ immunis sit baro. Doctores ferme omnes existimarunt, quo anno relevium solvi oportet, ad adhoæ solutionem successorem non adigendum, ne quis præter æquum duplici prematur onere, & duplici illa præstatione omnes feudi fructus compellatur in fiscum inferre. Conf. Frecciam *de suffeud. libr. 2. auctor. 3. n. 26.* Ea suborta controversia in Camera summaria, qui-

quidam distinguendum putabant inter veram adhoam, quæ legis necessitate solvitur, eamque, quæ apud nos hodie præstatur, & quam voluntarii donativi rationem habere dicebant; hujus vero solutionem cum relevio cumulari oportere. Enimvero adhoa apud nos hodie neque nudum donativum censeretur debet, & ut supra ostendimus, præstatur necessitate juris. Proinde recepta hodie sententia in foro est, per annum relevii heredem feudalem a præstatione adhoæ immunem esse oportere. Conf. Frecciam *loc. cit.*

VIII. At quæ de relevio addam, supersunt adhuc. Nam & illud disceptatum hic video, an si qua ob jura, vel prædia relevii, vel adhoæ solutio per baronem producta fuerit, jura, vel prædia controversa feudalia vel censeretur, vel præsumi debeant. Aiunt doctores plerique omnes, eoque tradunt *consuet. feud.*

feud. tit. 26. §. 4. Sic enim ibi collector. Si quis per triginta annos rem aliquam, ut feudum, possedit, & servitium domino exhibuerit, quamvis de ea re non sit investitus, præscriptione tamen triginta annorum se tueri potest. Enimvero si id admiseris, prorsus actum erit de feudorum incolis, neque ulla erit injuria, quæ eo sub obtentu per barones oppidanis inferri non possit. Quid enim baroni facilius, quam ob prædia, vel jura aliqua relevium, adhoamve solvere; ita vero vel demania universitatum invadere, vel jura in feudo quælibet sibi asserere? Ea in re igitur diverse rationes inierim, prout vel cum fisco, vel cum universitatibus controversia suscepta fuerit. Si enim inter baronem, & fiscum controversia sit instituta, nullus dubito, fisco litem addici oportere. Neque enim baronem inveni-
beris, qui prædium ultro velit servitio

feudali subdicere, quod liberum sit ipsius allodium. In eam igitur sententiam recte judicatum apud Reverterium *decis.* 280. Enimvero si inter baronem, & universitatem ea de re controversia enata fuerit, se baronibus faciles nolum præstare judices, neque, quia fortasse relevii, aut adhoc præstationes per eos fuerint exhibitæ, prædia, aut jura controversa baronibus adjudicare, si ex cedula haud appareat, ea illis fuisse concessa. Nimirum, ut alibi advertimus, universitates & in jure Gentium fundatam intentionem habent, prædia demanialia ad se pertinere, & liberæ a servitutibus quibuscumque baroni deberi solitis præsumi debent. Proinde nisi expressus concessionis titulus, productus a barone fuerit, neque demanialia prædia, neque controversa jura ei debent addici. Neque regeas, ea in specie, si præscriptio a barone allegetur, præscriptione
sal.

saltem tueri se posse. Ut enim alia præ-
reream, in ea quidem controversia aut
oppidanorum libertas, aut res univer-
sitatis periclitantur; neutro autem in
articulo baroni præscriptio prodesse pot-
est *arg. l. 9. ff. de usurpat. & usucap. &*
l. 2. C. de præscript. long. tempor. quæ
pr. libert. Locum autem consuetudinum
feudalium quomodo intelligi oporteat,
late enarravimus *libr. 1. tit. 6. §. 1.*
& sequ. actum non lubet agere. Quod
igitur polliciti in rubrica sumus, de
quindenniis videamus.

IX. Supra ostendimus, feudis per
Nortmannos in Regnum illatis, in pro-
vincias Neapolitanas, ac Siculas relevii
quoque institutum invecum. Utrius-
que igitur Regni respectu relevii qui-
dem solvendi necessitas in ipsa natura
feudi continetur, neque eo quisquam
censetur immunis, nisi id onus expres-
sim remissum in investitura fuerit. Pro-

inde somnians vigilat Marinus Freccia
de suffeud. libr. 2. auctor. 3. n. 15. &
sequ. ubi ob juris Neapolitani publici
 ignorantiam enixe adlaborat, ut adpro-
 bet, relevii solutionem ad feudi *natu-*
ralia, quæ vocant, non pertinere. Quæ
 igitur ratio barones reliquos relevii so-
 lutioni subjecit, eadem & Ecclesias, si
 feuda penes eas essent, quindenniis ex-
 olvendis adegit. Relevium id genus
 quindennio quoque in fiscum inferri
 placuit, quia præter propter quindenis
 quibusque annis ob baronum obitum
 relevia exolvi solerent. Ejusmodi au-
 tem institutum his ferme initiis apud
 Neapolitanos invaluisse putem. Roge-
 rius scilicet in provinciis Neapolitanis,
 ac Siculis ordinandis, ut supra vidimus,
 exemplo Wilelmi apud Anglos est usus.
 Wilelmus autem apud Anglos *Episco-*
patus, & abbatias omnes sub servitute
statuit militari inrotulans singulos Epi-
sco-

scopatus, & Abbatias pro voluntate sua, ut narrat Matthæus Parisius in *Willelmo conquest.* pag.83. Ita jussu Rogerii sub ipsa incunabula Nortmannici Principatus, si feuda penes Ecclesias essent, eas & adhoas, & relevia pensitare oportebat. Quæ autem adversus isthæc post Iserniam, & Afflictum oblateral Antonius de Marinis juris Neapolitani publici pro more sæculi imperitissimus ad *Reverter. decis.* 403. n. 6. & sequ. sine jactu pulveris facile refelli possint. Falso enim is ponit, relevii solvendi necessitatem ex consuetudine profluxisse, quæ Episcopos, ac prælatos alios non obligarit. Ea enim necessitas non ex consuetudine apud nos promanavit, sed cum ipso feudorum instituto in provincias bello partas per Nortmannos fuit invec̃ta; ut proinde in ipsa natura feudī contineatur. Sed recepta fori sententia ea de re hodie dubitari non sinit;

in eo etiam juris articulo doctis otium fecit Seraphinus Biscardus *in jurid. respons. pro Reg. fisc. sup. præstat. servit.* Ita in Regno Neapolitano hodie Ecclesiæ, & Universitates feuda possidentes quindecimo quoque anno relevium fisco solvunt, quod proinde *quindennium* appellatur. Quod tamen ad universitates, solidum relevium & ipsæ solvunt, ut barones reliqui, si in feudo coemendo, quod fieri solet, certam personam, per quam in possessione sint, nominarint, ut rerum periti norunt.

X. Quæri hic tamen opportune possit, cur quindenis quibusque annis a prælatis Ecclesiarum apud nos relevium exolvi placuerit. Nam haud absurde regerat fortasse quispiam; eam fisco pensionem centesimo potius quoque anno fieri oportere. Ecclesiæ scilicet eodem jure cum municipiis uti debent. Si municipio legatus sit usufructus, mu-
ni-

nicipes centum annis in usufructu tuendos respondet jurisconsultus ; id ita placuisse, quia longævus homines centum annos vivere jus præsumit *l. 56. ff. de usufruct.* Cum igitur Ecclesiæ veluti feudorum usufructuariæ videri debeant, & ipsæ centum annis vivere præsumendæ forent ; ita centesimo quoque anno ab Ecclesiarum prælatis relevium solvi porteret. At cum prælatus ipse, non Ecclesia, usumfructum percipiat, & pro fisco produci posset *l. 68. ff. ad l. Falcid.* Ibi scilicet & ususfructus intuitu vita hominis præfinitur ; ab annis vero triginta ad sexaginta usque tot anni in vita hominis computantur, quot ad sexagesimum defunt. Proinde si quinquaginta annos quis vixisse ponatur, decem annos victurus præsumendus esset. Cum igitur Episcopi, & prælati reliqui plerique omnes eligi soleant post quinquagesimum ætatis annum, ea lege fiscus

innixus contendere haud absurde posset, decimo quoque anno relevium ab Ecclesiis pensitandum. Proinde & demptum de jure fisci, & cum praelatis benignius actum, ubi ipsis quindennia generatim indicta. Nunc reliqua raptim subjiciamus, quæ fisco a baronibus præstari oportet,

XI. Supra ostendimus, per indulgentiam quidem Alfonsi I. barones immunes ad hoc fuisse factos. Id privilegium tamen, utpote primævo feudorum instituto contrarium, non minus a Ferdinando Catholico, quam a Carolo V. ita coercitum, ut barones ad hoc pensitare adigerentur, ubi bellum ingrueret, ut liquet ex *grat. & privil. Civit. c. 8. pag. mih. 88. a terg.* Supra quoque monuimus, ad hoc, quæ hodie solvitur, veram ad hoc non esse, eamque donativi potius necessarii rationem habere; donativum id genus ad hoc
hoam

hoam dictitari , quia ad rationem ad-
hoæ ab initio pensitatum ; id ipsum pro
ratione temporum in summa longe mo-
dica constitutum , præsertim si cum ho-
diernis feudorum redditibus conferatur .
Specierum enim pretiis in immensum au-
ctis , id donativum , si veræ adhoæ re-
sponderet , ad summam pertingeret lon-
ge majorem , & quæ fortasse vel decu-
plo major esset . Proinde , inspecto me-
morato Ferdinandi , & Caroli V. privile-
gio , per belli tempus summas quidem
maximas a baronibus solvi oporteret ,
si veræ adhoæ præstationem exolve-
rent . Omnium enim feudalium in Re-
gno reddituum semissem excederent . E-
nimvero æquo temperamento usi Nea-
politani Principes in prædicti donativi
veluti hostimentum ne per belli qui-
dem occasionem veram adhoam exege-
runt . Cum tamen , si bellum immineat ,
barones equis , & armis instructos signa
Prin-

Principis sequi oporteat, ingruente bello, equum, quem *montatum* appellant, a baronibus præstari placuit. Occasio vocabuli inde enata, quia præter equum *eques* etiam bello instructus præstandus esset. Id Principi subsidium bis præstitum ego memini, primo per belli Velitrensis occasionem, deinde inter hodiernos concussi orbis motus sub Optimo Principum Ferdinando. Per Velitrense bellum equi montati ita inita est ratio, ut ex quibusque ducatis trecenis, quos occasione relevii solvi oportebat, octoginta eo nomine solverentur. Ita sub felicissimo Ferdinando eadem ferme summa perfoluta, licet, ob mutata specierum pretia quantitate hodie releviorum aucta, longe majorem esse oportuisset, si ad hodierni relevii rationem is equus præstitus per barones esset.

XII. Denique inter baronum præstationes ex Regni Neapolitani institutis etiam

etiam *jus tapeti*, quod vocant, referri debet. Id autem fisco præstandum est hodie, quo tempore ob confirmationem investituræ relevium ei solvitur. Ex moribus vero receptis obtinuit, ut ex centenis singulis, quæ relevii nomine inferuntur in fiscum, ducati tredecim, & asses quinque supra triginta tapeti causa pendantur, licet olim quantitatem longe minorem præstatio isthæ complecteretur, ut liquet ex ritu R. Cameræ sub titulo *de offic. M. Camerari.* Jus istud in M. Camerarii emolumentum cedebat olim ad ejus fortasse operam rependendam, cum in homagii promissione tapetum ante pedes Principis ipse sternerbat, ut liquet ex R. Cameræ prædicto ritu. Ea solemnitas tractu temporis exolevit, & in homagii renovatione alio ritu Regi fidelitas promitti cœpit. Proinde, Magni Camerarii ea in re opera amplius non intercedente,
ad

204 *Jus feud. Neap. ac Sic. L. III. T. XII.*
ad prædictam rationem jus tapeti hodie ipsi Principi persolvi solet.



TITULUS XII.

*De relevio ex jure Siculorum
novissimo.*

CUM sub Nortmannis , ac Suevis provinciæ Neapolitanæ , ac Siculæ sub eodem Principe iisdem legibus uterentur , quæ supra de relevio commentari sumus , non minus apud Neapolitanos , quam Siculos perinde olim obtinuerunt . Sub ipsa autem Principatus Aragonensis initia a veteri ea de re jure nusquam apud Siculos recessum comperio . Per ea igitur tempora in Sicilia quoque ob feuda quaternata a Principe accepta relevii nomine semissem reddituum ab heredibus præstari oportebat .
Eo

Eo me deducit Rex Fridericus , qui Aragonensium primus legem apud Siculos de relevio scripsit . Is enim eos tantum coercet , qui per simulatos contractus relevio fiscum fraudare satagerent , de ejus tamen quantitate veteribus moribus apud Siculos præstituta nil quicquam innovat *capit. 110.* Perperam igitur scribit Franciscus Testa ad Regis Martini *capit. 55.* apud Sicilienses olim ultra decem auri uncias relevium non pertigisse ; perperam etiam , ut eam sententiam tueatur , Friderici legem producit *in constitut. post mortem . de mort. baron. nunciand. Imperat.* Neque enim ibi de feudis quaternatis a Principe concedi solitis Fridericus cavet , sed de illis tantum , quæ ab ipsis baronibus concessa forent . Et hoc igitur veluti e tripode effatum Testæ extorsit studium illud immane , quo is baronum demerendorum gratia abripiebatur . Sed nolo quid
gra,

gravius in eum dicere; pax mihi cum mortuis. Stet tantum illud, ad Regem Martinum usque ratione relevii barones Neapolitanos inter, ac Siculos nil quicquam interfuisse.

II. Jam vero, ut in aliis juris articulis Principibus adrependo privilegia adversas leges expressere Siculi, ita & relevii imminuendi causa sibi non defuerunt. Nam inter res adversas Martini Regis infirmitate ejus abusi rem eo deduci curarunt, ut ingentes illæ summæ relevii nomine ad ejus Principatum usque in fiscum inferri solitæ ad quantitatem longè minimam redigerentur, ut recte rationes init doctissimus Marchio Simonetta in plena opinione sua *de æquilibr. oner. in Sicil. pag. 34.* Ibi enim computatis, quæ ex releviis, ac decima per decennium apud Siculos in fiscum redirent, vix uncias 3759. quotannis in eum inferri docet. Contra
apud

apud Neapolitanos ducatorum ferme centum millia ex folis releviis singulis annis fiscus percipit, ut rerum periti norunt. Quod autem ad Martini Regis de relevio legem, in ea distinctum, num liberi, & fratres, eorumve filii primo feudi quæsitore prognati, an alii cognati remotiores successuri forent. In priori specie si in tria, aut plura feuda succedendum esset, decem argenti marcas in fiscum inferri placuit; ob singula autem oppida marcas argenti quatuor; ob feuda sine incolis marcas argenti duas; ob minuscularia vero feuda, quæ *plana*, & *domus*, seu *membra curtis* a Martino dicuntur, marcam argenti unam. In altera vero specie si successores exorti non forent ex ejus stipite, in cujus hereditate feudum esse diceretur, Rex Martinus jus vetus servari jussit, ac dimidium reddituum feudaliū fisco persolvi *capit. 55.* Argenti

ti marcam duabus unciis, seu Siciliensibus scutis quinque æstimari scriptores Siculi passim monent, idque advertit ipse Franciscus Testa ad *d. capit. 55.* Numisma tamen id genus numquam in Sicilia, neque, quod sciam, alibi cussum. Quapropter marca apud Siculos imaginaria moneta fuit ad supputationis, & calculi commoditatem efficta. Ea igitur ab uncia Neapolitana diversa non fuit, quæ & apud nos imaginaria ab initio erat, neque olim extabat. Per eam autem Martini legem facile intelligere est, quanta fisco calamitas illata fuerit. Pone enim, apud Siculos filium in feudum succedere, unde unciarum decem millia redeant, eum non ultra ducatos viginti quatuor in fiscum inferre oportebit. Macte liberalitate tua Martine, atque ob tantum in Principatum facinus terram tibi levem barones Siculi apprecentur.

III. At vero, prædicta posita Martini lege, consonum sane videbatur, ut semel eis delato feudo, qui primo ejus quæsitore prognati non forent, eorum liberi & ipsi privilegiarii essent, neque fructuum dimidium relevii nomine cogerentur exolvere. Recte igitur Rex Joannes Siculis indulgit, ut successor quidem in feudum ultimum possessorem ex transverso contingens semissem reddituum relevii causa in fiscum inferret; verum, ad cognatum e latere semel delato feudo, ejus porro liberi relevium præstarent non diversum ab eo, quod alii primo feudi quæsitore progeniti præstare solerent *capit. 66.* Quid de feudis, quæ in francum allodium concessa fuerint? Feuda ita concessa servitio militari non subsunt. Proinde haud inepte quis dicat, eorum respectu successores quoscunque relevium præstare non oportere. Enimvero relevium & a militari

servitio diversum est, & ab eo diversam rationem habet. Nam, ut supra quidem ostendimus, relevium ob renovationem investituræ solvitur, Si igitur feudum jure franci allodii sit concessum, id servitio quidem militari non subest, a relevio tamen immune censerì non oportebit. Recte igitur idem Rex Johannes edixit, ut in ejusmodi concessionibus relevio successor tandem immunis esset, *si simpliciter allodiata alienari contingeret capit. 67.*



TITULUS XIII.

*De juribus baronum intra feudi
territorium.*

Jura baronum intra feudi territorium
bifariam discesci queant. Quædam
enim personas feudum incolentes respi-
ciunt; quædam rebus ipsis feudi titulo
acceptis hære creduntur. Prioris sunt
generis, quæ personæ respectu oppidani
præstant. Ejusmodi sunt angariæ, pa-
rangariæ, & si quæ alia personarum in-
tuitu ab ipsis extorqueri solent. Alte-
rius sunt generis onera, quibus ob res
ipsas feudi titulo concedi solitas subsunt
feudorum incolæ. Ejusmodi sunt panis
excoctio in baronum furnis, frumenti
terendi necessitas in eorum pistrinis, olei
in ipsorum trapetis expressio, esculenta,
poculenta in eorum tabernis coemen-

di obligatio , & si quæ alia commodâ quidem baronum augment , naturalem tamen oppidanorum libertatem imminuunt. Jura prioris generis *personalia* recte dixeris ; jura alterius generis *realia* dici solent. Ut apte igitur destinata componam , primo de juribus personalibus , deinde de *realibus* , quæ appellant , sermonem instituam .

II. Quod igitur ad baronum jura in ipsas oppidanorum personas , eo potissimum pertinet præstatio , quam *angariarum* , ac *parangariarum* appellant . Angariarum , & parangariarum necessitas memoratur etiam in jure civili sententia tamen longe ab ea diversa , quæ in jure patrio , & apud pragmaticos usurpari solet . Angariæ scilicet in jure civili sunt bovum protela , seu tardigrada , & clabularis vehiculatio , quam ad publicas evectiones provinciales præstare adigebantur , ut late ostendit Jacobus Go-

Gothofredus ad l. 4. C. *Theodos. de curs. publ.* Angariæ autem dicebantur, si boves agerentur per vias publicas, seu consulares, per quas dispositus publicus cursus foret: parangariæ appellabantur, si per vias quidem publicas agerentur boves, per eas tamen dispositus publicus cursus haud esset. Vide Bergierium de *public. & militar. Imper. Roman. viis*. Angariarum autem appellatione non clabularis tantum vehiculatio, sed & equorum præstatio ad cursum publicum in jure civili continetur, ut passim liquet ex legibus sub titulo *de curs. publ.* Hinc sub Principibus celeberrimi usus literæ illæ tractoriæ, quibus eorum jussu ad iter faciendum non solum equi, sed & mansiones, & viatica certis personis præstari jubebantur, ut liquet ex l. *unic. C. de tractor. & stativ.* Cum vero in angariarum præstatione ultra modum pro-

vinciales vexari solerent, inde factum, ut in monumentis sequioris ævi angariarum, ac parangariarum vocabulo continerentur onera præter leges imponi solita, quibus misere quidam afflictabantur. Conf. Ducang. in voc. *angaria*. Ita, feudorum instituto recepto, oppidani angariis, ac parangariis subesse dicuntur, si baronibus certis anni diebus operas suas præstare eos oporteat. Medii autem ævi scriptores angarias appellarunt, seu baronum, seu ipsorum angariorum sumptibus operæ præstandæ forent. Ita sane Ranfridus jurisconsultus, qui, ut ipse testatur, scriptitabat anno 1215. *Angarii sunt, qui servitium faciunt propriis expensis, puta tot operas in septimana, & sic vulgariter dicuntur in multis partibus angarii: & tales villani, qui propriis sumptibus faciunt operas, dicuntur angarii.* Enimvero post Iferniam ad constir. prosequen-
tes.

res. de pugn. sublat. angarios pragmatistici dictitant, qui baronum sumptibus ad operas adiguntur. Parangarios vocant, qui sumptibus suis baroni operas præstare debent. Sed videamus, quibus initiis in provinciis Neapolitanis, ac Siculis a feudorum incolis onera isthæc barones exigere cœperint, & an, ut sunt res hodie, ea ab oppidanis recte petantur.

III. Ea in re primum omnium injurios adversus barones illos ego crediderim, qui onera isthæc a subdolis eorum artibus unice repetenda censent. Sæpe potentatu quidem aliquando barones abusi feudorum incolis eam conditionem imposuerunt; in ipsis tamen feudorum investituris olim jura isthæc haud infrequenter ipsi Principes sunt elargiti. Nimirum angarios, parangarios inter, & adscriptitios haud multum interest. Totius inter utrosque dif-

ferentiæ ratio eo redit , quod hi quidem perpetuas operas seu feudis , seu allodiis præstare adigantur ; illi & feudis tantum , & certis tantum diebus operas præstare debent sumptibus aut baronum , aut suis . Hinc angarios cum adscriptitiis conjungit Fridericus II. *in constit. prosequentes . de pugn. sublat.* Perperam enim ibi Latina exemplaria passim exhibent *angarius, vel villicus* . Nam rectius in Græco codice *μνδης αγγαριος, η αναπογραφος* ; *angarius, vel adscriptitius* . Si hinc discedas , æqua ferme erat eorum conditio , & utrique seu allodio , seu feudo originario jure tenebantur . Utrosque jure belli in eam conditionem rede gere Principes ; utrosque etiam militibus seu cum feudis , seu cum allodiis concesserunt . Si quid igitur ab initio in eo instituto peccatum , non per barones quidem , sed per Principes ipsos peccatum , qui ei juri

vi-

viſtos ſubeſſe juſſerunt. Scilicet apud Neapolitanos, ac Siculos, Nortmannorum præſertim vaſcente potentia, frequentiffima fuere bella. Iis autem depugnatis, ſi qui perduelles, aut infeſtiores victori fuiſſent, adſcriptitii, angarii, parangarii facti ſunt jure belli. In eam vero conditionem iis redactis, & injurias ſibi illatas ulciſcebantur Nortmanni Principes, & militibus ſuis gratificabantur. Id ipſum *pro anima judicantes* in Eccleſiarum favorem frequentiffime fecere Principes. Ita quidem Rogerius anno 1102. familias duodecim ſupra centum, quæ cum proditore Sergio in obſidione Capuæ adverſus ſe conjuraverant, monaſterio Divi Stephani apud Bruttios tradidit *in perpetuas ſervitutes*, & villanigia diplomate ſuo, quod in actis inter univerſitatem Serræ, & ejusdem monaſterii fratres extat fol. 336. & ſequ. Singulare autem in ead.

donatione est, quod reorum quoque liberi in infinitum eidem conditioni subesse jubentur. Ab adscriptiis igitur, angariis, parangariis barones operas exigentes injurii censerent olim non debuerunt. Haud aliunde autem repetenda ego crediderim tot alia baronum jura sæpiuscule, sat propudiosa, quæ proinde abolevit posterior ætas rectius instituta. Sed videamus, an angariarum, ac parangariarum obsequium recte barones hodie sibi vindicent.

IV. Primum omnium satis constat, angariis, ac parangariis mancipare feudorum incolas, poenæ atrocissimæ instar esse; eandem etiam a solo Principe irrogari oportere; ab eo denique, ejusque in Regno successore remitti posse. Indixerint igitur quibusdam ob crimina Nortmanni Principes angariarum, ac parangariarum onera; eadem tamen evanescere statim oportuit, ex quo Neapo-

politani , ac Siculi Reges humanior-
rem mentem induentes eam servitutis
imaginem abrogarunt . Id ipsum autem
aio factum per Fridericum II. *constit.*
quia frequentèr . de hominib. non te-
nend. rat. terr. vel feud. Ibi quidem ,
ne in se baronum invidiam provocaret,
onera isthæc aperte prohibere non au-
sus est Princeps ; causa tamen , quæ in
constitutione interferitur , ejus mentem
aperte indicat , & ea in posterum exi-
gi vetat . Sic enim ibi Fridericus .
Nos enim , qui sumus domini persona-
rum , absque nostræ serenitatis assen-
su personas servitiis perpetuis volumus
obligari. Sed verba constitutionis ex-
hibere præstat ex Græco codice : *ημεις*
γὰρ οἵτινες εἰμεν δεσποταὶ τῶν προσώπων ,
χωρὶς συναίνεως τῆς ἡμετέρας αὐθεντίας ,
καὶ θελομεν τὰ πρόσωπα διηνεκετι διὰ λείας
ἐνοχοποιεῖσθαι . Male enim in Latinos co-
dices *glossema conditionibus* irrepsit sen-
ten-

tentia aut nulla , aut quæ certe lector-
 rem turbat . Recte igitur Afflictus ad
d. constitut. n. 17. hæc adnotat . *Do-*
minus Rex est dominus omnium perso-
narum habentium domicilium in Regno,
& ideo nullus potest obligare personam
suam ad servitium perpetuum sine Re-
gio assensu . Id usque adeo verum Af-
 flicto visum , ut , si forte per conven-
 tionem angariæ , ac parangariæ baro-
 nibus ab oppidanis promissæ fuerint , ne
 ea quidem in specie id genus operas
 præstandas putet , quia promissio isthæc
 per metum extorta præsumi debet *ibid.*
n. 14. Eo accedit , quod , cum in præ-
 dicta constitutione Fridericus ejusmodi
 conventiones omnino vetuerit , licet si-
 ne metu sint initæ , tamquam adversus
 leges interpositæ , irritæ censerī debeant .
 Sed & siingas , ejusmodi conventiones
 primos paciscentes obstringi , ea non
 usque adeo valere potest , ut eorum li-
 be-

beros obliget, qui obligationis tempore in rerum natura non fuerint. Stet illud igitur, angarias, parangarias & juri Neapolitano, ac Siculo publico adversari, easque ne conventionem quidem oppidanorum ratas censeri oportere.

V. Haec tamen expositis haud inepte quispiam possit opponere carmen illud passim in investituris adhiberi solitum, quo cum angariis, & parangariis feudum concedi dicitur. Verum ipse Carolus V. edixit, eam formulam *de antiqua consuetudine, & stilo* investituris appositam videri oportere; feudis ita concessis, non novas quidem angarias, ac parangarias, sed eas tantum concessas intelligi, quæ concessionis tempore aut *justo titulo*, aut *legitima præscriptione* feudis quæsitæ jam forent *pragm. 16. de baron.* Enimvero justus angariarum, ac parangariarum titulus proferri nequit. Is enim non posset alium.

liunde repeti, quam ex concessione Principis, qui criminis causa maleficos ei conditioni subjiceret. In angariis etiam, ac parangariis legitima præscriptio per barones produci non potest: neque enim capita libera præscriptioni subsunt. Ea vero in re ne præscriptionis quidem *immemorabilis*, quam appellant, rationem habendam putarim. Sicubi enim *immemorabilis* ea de re præscriptio allegari queat, ea non præscriptio quidem, sed vetustas abusus est appellanda; ut proinde ejusmodi onera vi potius, ac metu per barones extorta videri debeant. Vid. Rovit. ad *d. pragm. 16. de baron.* ac de Marin. *resolut. jur. 1. 117.* Eo accedit, quod jura isthæc sunt adepti barones vi veluti magistratus abusi; ut proinde eo nomine non in possessione tuendi sint quidem, sed potius ut vis publicæ reos puniri eos oporteat argumento *l. ult. ff. ad leg. Jul. de vi publ.*

Sed

Sed eximia felicitate temporum apud Neapolitanos , ac Siculos ob angarias , ac parangarias sine sui ludibrio vix quisquam egerit . Proinde Domitiana hodie quaestio videri debet , an feudorum incolae extra fines feudi baroni operas praestare adigantur . Conf. Laganar. ad *Revit. pragm. 16. de feud.* Quid de Paschali , Natali munere ? Ea quoque praestatio & feudorum incolas praegravabat , & a baronibus in Regno olim passim extorquebatur . Proinde providentissimus Ferdinandus divalibus literis id quoque genus extorsiones vetuit quinto idus Jul. ann. 1772. Sed , his omissis , de juribus , quae *realia* appellitant , videamus , & quae ob res ipsas feudi titulo acceptas sibi barones solent asserere .

VI. Quod ad jura baronum realia , eo potissimum referri queant , quae *prohibitoria* , seu *exclusoria* haud inepte dixeris . Ejusmodi est. panis excoquen-

di

di in baronum furnis , frumenti terendi necessitas in eorum pistrinis , olei in ipsorum trāpetis expressio , esculenta , poculenta in eorum tabernis coemendi obligatio , & quæ id genus alia naturalem oppidanorum libertatem afficiunt. Ea de re oppidanos , & barones inter non minus apud Neapolitanos , quam Siculos frequentissimæ exarsere lites . Operæ igitur pretium facturi videbimur , si accuratius investigemus , quid ea de re cum veteri , cum novissimo jure in utroque Regno sit cautum .

VII. Inter mali moris exempla , quæ ob feudale institutum passim olim increbuerunt , illud potissimum erat , quod feudorum incolæ cum humanitatis injuria neque pro arbitrio , ubi vellent , panem possent excoquere , atque ad frumentum terendum , exprimendumve oleum ad baronum pistrina , aut trāpetā itare adigerentur . Hinc *furnagium* , seu
fur-

furnaticum apud fequioris ævi scriptores præstatio dictitatur, quam feu in pane, feu in pecunia eo nomine oppidani cogebantur exolvere. Conf. Ducang. in præd. voc. Ita quidem in tabulario S. Germani Pratenfis. *Omnes homines de dicto bargo S. Germani bannarii ad furnum nostrum, seu furna nostra, dum tamen furnum, & furnarium competentes habeamus, per bannum coquere, & furnagia, prout hactenus consueverunt, nobis solvere tenebuntur.* Indidem & apud fequioris ævi scriptores *secta ad molendinum* pro servitio usurpata, quod frumento in eorum pistrinis molendo baronibus oppidani præstabant. Ita quidem in Monastico Anglicano ex Ducangio in ea voce. *Dedit molendinum cum secta, & molitura totius villæ suæ.* Exinde qui ei servituti suberant, *sectatores* sunt appellati. Vide eundem Ducang. in voc. *secta.*

VIII. Atque hi quidem mores passim recepti apud Gentes, apud quas durius agentes barbari eam servitutis imaginem instituerunt, ac victos glebæ addictos jusserunt esse. Enimvero nil quicquam tale apud Neapolitanos, ac Siculos coeptavere Nortmanni. Nam novum ipsorum Imperium devictarum Gentium benevolentia firmaturi id genus jura libertati contraria sunt averfati. Paucis igitur exceptis, qui infestiores victori fuissent, reliquis neque eam servitutis imaginem imposuerunt, ac feodorum incolis jura sunt elargiti non diversa ab iis, qui Regii demanii civitates inhabitarent. Sub Nortmannis autem jurium, quæ *prohibitoria* diximus, vix vestigium invenire licet in civitatibus ab iis possessis, qui ipsi Principi cognatione devincti forent, aut in prima illa Nortmannorum aristocratia jure summæ potestatis oppidis quibusdam potiti fuerunt.

fu rant . At vero ubi , Nortmannorum
deficiente virili stirpe , utrumque Re-
gnum Friderico cessit , ac sub nova Re-
gnatrici familia baronum omnium æqua-
ta conditio fuit , ipsa ratio Principatus
Friderico suavit , ut æqua esset conditio
civium . Ita non minus angariis , ac pa-
rangariis , quam juribus illis prohibito-
riis feudorum incolas vexari vetuit *con-*
stit. quia frequenter , de homin. non te-
pend. ration. terr. vel feud. Sed & an-
te Fridericum ipse fortasse avus ejus Ro-
gerius , rebus pacatis , jura isthæc prohi-
buisse videtur . Eo me deducit Romual-
dus Salernitanus . Sic enim is scribit .
Rex Rogerius perfecta pacis tranquill-
tate porius pro componenda pace Came-
rarios , & justitios per totam terram
instituit , malas consuetudines de medio
abstulit . Quæ enim peiores consuetudi-
nes præ iis , quæ jura prohibitoria in-
duxerant , effingi queant ? De consuetu-

dinibus autem id genus per dynastas fortasse Nortmannos in regiones Neapolitanas investas liquet ex privilegio ipsius Rogerii Beneventanis concessio ann. 1137. apud Falcon. Benev. *Condonamus vobis ea omnia, quæ nos, & prædecessores nostri Nortmanni circa Beneventanam Civitatem habuerunt, fidantias subscriptas, videlicet denariorum redditus, salutes, angarias, terraticum, herbaticum, carnaticum, Kalendaticum, vinum, olivas, relevum, postremo omnes alias exactio-*

IX. His igitur præstitutis, ita ego rationes inierim, primos illos Nortmannorum dynastas, cum nondum adoleverat Principatus unius, jura pro arbitrio prohibitoria in oppidis, quibus imperitabant, instituisse; unius tandem apud nos firmata potentia, seu per Fridericum, seu per Rogerium ipsum ea exerceri vetitum. At quibus Principibus,
qua

qua occasione, quis inquit, apud nostrates jura isthæc rursus inoleverunt? Ea in re doctores discordes invenire licet. Sunt, qui Andegavenſes, sunt, qui Aragonios eorum auctores agnoscunt ea potissimum ratione, quia in ipsorum diplomatis illa aut memorantur, aut concessa inveniuntur. Quod tamen ad Andegavenſes, in Regiæ Cameræ tabulario nusquam, quod sciam, per eos concessio facta extat, in qua cum juribus prohibitoriis feuda concessa dicantur. Ejus rei sponforem appello Josephum Riccardum Magnæ Curie judicem, ac rei diplomaticæ peritissimum. Is enim ea de re a me pluries rogatus diploma nullum invenire potuit sub Andegavenſibus scriptum, in quo id genus jura concessa legantur. Ejusmodi concessiones sub Aragonenſibus primum invenire licet. Sed & nemo mihi persuaserit, Aragonenſium quempiam adeo

adversus humanitatem obduruisse , ut ejusmodi oneribus oppidanos nil tale meritos subesse jusserit. Aliunde igitur eorum occasionem repetendam existimarem .

X. Eo ut perveniam , adverti quidem oportet , procerum Nortmannorum exemplo , qui jure summi imperii apud nos utebantur olim , paulatim quoque barones jura isthæc in feudis sine concessione Principum usurpasse . Facile per barones eo perventum partim vi potentatus , partim ob res in Regno turbatiores , partim ob Regum diuturnam absentiam . Interea ob heredum in gradu feudali defectum ad fiscum frequentissime feuda redibant : jura illa prohibitoria per vetustissimos illos dynastas introducta legitima credita . Ita , insciis ferme Principibus , in novis investituris cum feudis ea concessa . His initiis sub Aragonensibus tralatitia formula inve-

vestituræ fuit *cum angariis, parangariis, furnis, molendinis, trapetis, hofteriis, & id genus aliis*. Id autem investituræ carmen & hodie ordinarium est, & ab ipsis Aragonensium ævo ordinarii juris erat. Sed videamus, an ob eam in investitura formulam jura prohibitoria sibi possint hodie tueri barones, quidve ea de re seu jure scripto, seu receptis moribus in utroque Regno servatum oporteat.

XI. Ubi sub Aragonensibus prædicta in investitura formula recepta fuit, audientiores facti barones prohibitoriis juri-
bus sibi afferendis vexabant feudorum incolas. Ita inter Principum præsertim absentiam Regni universitates afflictæ, earumque gemitus Caroli V. Neapolitanas provincias invisentis providentiam exciverunt ann. 1536. Per id igitur temporis Princeps, cum rescivisset, ob prædictum investituræ carmen sibi

barones asserere jus prohibitorium furni , trapeti , pistrini , cauponæ , & aliorum id genus , quia feuda sibi concessa obtendebant *cum angariis , parangariis , furnis , trapetis , hosteriis* , eam formulam *de antiqua consuetudine* , & *stilo* in investituris appositam videri pronunciavit ; inde igitur prædicta jura frustra vindicare barones ; sub ejusmodi clausula ea concessa jura tantum intelligi , quæ *tempore concessionum aut justo titulo , aut legitima præscriptione* feudis inessent *pragm. 16. de baron.* Id ipsum expressius caverat idem Princeps *pragm. 14. eod.* Lubet ob rei celebritatem eam pragmaticam hic exhibere. Sic enim ibi . *Volumus igitur ; atque mandamus omnibus baronibus , & aliis utilibus dominis , ut libere permittant ; vassallos suos in ipsorum vassallorum , aut aliorumlibet furnis panem coquere , & similiter possint granum ad molen-*
dum ,

dum, & olivas terendas ad quorumlibet molendina, vel trapetos conducere, & possint in domibus propriis, vel aliorum hosterias, aut tabernas facere, & tenere, hospites recipere, etiam quod domi-
norum hosteriae non sint plenae, nec possint praefati aliququaliter impediri, seu prohiberi, exceptis illis, qui furnos, molendina, trapetos, tabernas, & hosterias, seu hospitria cum hujusmodi jure prohibendi vassallos particulari privilegio, aut legitima praescriptione, vel consuetudine legitime praescipta habent. Utraque Caroli V. lex universitatum propugnaculum, ac murus veluti aeneus adversus injurias per barones inferri solitas videri debet. De recta igitur earum intelligentia pro instituto videndum.

XII. In praedictis igitur pragmaticis Carolus V. in Regno Neapolitano barones jura prohibitoria exercere vetat,

tat, iis exceptis, qui aut *justo titulo*, & *singulari privilegio cum jure prohibendi*; aut *legitima præscriptione*, vel *consuetudine legitime præscripta* ea sibi quæssissent. De *justo titulo* nulla est dubitatio; neque ego intercesserim, quominus ejusmodi juribus barones utantur, si ea expressim a Principe, *cum jure prohibendi* scilicet, concessa fuerint. Quin id ipsum admiserim, si non ex concessione Principis, sed ex transactione, aut conventionione cum oppidanis inita titulum baro repetat, modo transactio, aut conventio juxta Regni leges sit expedita, & Regis assensu confirmata fuerit. Quod tamen ad præscriptionem, aut consuetudinem, recte addubites, quæ Principis sententia fuerit, & an ejus obtentu barones id genus jura vindicare possint. Nimirum in ejusmodi juribus præscriptionem, aut consuetudinem Princeps baronibus prodesse jubet, at non qualem-

lemqualem, sed legitimam, legitimeque præscriptam. Prædictis legibus latis, et Regno Carolum V. abesse oportebat, neque pro ratione temporum usui ei erat baronum adversus se odium. Id præcaveri non poterat, si aperte Princeps injusta pronunciaffet jura isthæc consuetudine, vel præscriptione quæsitæ. Occultis igitur veluti cuniculis barones impetens bona verba, vi adempta, eis ostentavit. Nimirum probe is norat, id genus jura neque consuetudine, neque præscriptione per barones acquiri posse. Ita in speciem illis concessit, ut ea exercere possent, si consuetudine, vel præscriptione quæsitæ forent. Cum tamen addiderit, præscriptionem legitimam, consuetudinem legitime præscriptam esse oportere, re ipsa neque præscriptionem, neque consuetudinem baronibus prodesse voluit. Videbat enim, ea in re neque legitimam præscriptionem, neque consue-

fuetudinem legitime præscriptam per barones ostendi posse. Iis igitur offerens pro Junone nubem & vana illis vocabula venditavit, & oppidanorum indemnitati consuluit.

XIII. His ita se habentibus, facile decerni queat, an ex memoratis Caroli V. legibus consuetudinis, ac præscriptionis obtentu jura prohibitoria sibi barones tueri possint. Exploratum est scilicet, præscriptionem non sola temporis prærogativa consistere; eam legitimam videri non oportere, nisi & justus titulus adsit, & bona fides; jus etiam controversum ita sit comparatum, ut præscriptionem admittat. *Conf. prælect. libr. 2. tit. 6. §. 8.* Quod ad justum titulum, is falsus esse non debet. Neque pro empto igitur, neque pro permutato, aliove quo titulo usucapiundi jus erit, si neque emptio, neque permutatio, neque alia acquirendi causa in-

intercefferit l. 27. ff. de usucap. & u-
surpat. Quod ad bonam fidem, ea ex
receptis in Regno moribus juxta juris
Pontificii regulas æstimari debet, quod
bonam fidem continuatam in præscriptio-
ne requirit c. 5. & 10. X. de præscript.
Denique jura isthæc ita sunt compara-
ta, ut præscriptionem omnino respuant.
Nam & naturalem oppidanorum liber-
tatem afficiunt, & Friderici constitu-
tioni adversantur, qua vetitum supra
vidimus, ne capita libera servitiis per-
petuis quoque modo se mancipient. con-
stit. quia frequenter. de homin. non re-
nend. rat. terr. vel feud. Sed & si po-
nas, in controversis juribus præscriptio-
nem admitti non prohiberi, alio quo-
que respectu ea baronibus prodesse non
potest. Per eam scilicet de juribus in
oppidanorum personas præscribendis agi-
tur, Atqui, ut recte advertibat clarif-
simus Marchio Simonetta in plena opi-
nio-

nione sua ad Siciliæ Proregem ea de re scripta, si quid juris personalis adversus parentes sit præscriptione quæsitum, adversus liberos, qui præscriptionis tempore in rerum natura non erant, usurpari non potest. Quid, quod idem observat, jurium id genus præscriptionem tacito civium pacto consistere oporteret? Atqui, inspectis primævis Regni legibus, ne expressa quidem eorum conventionem ea promitti licet, nisi assensu Principis conventio confirmata fuerit *d. constit. quia frequenter.*

XIV. Ex dictis hætenus aperte liquet, jura prohibitoria per barones neque præscriptione acquiri posse, eorumque possessione eis interdicendum nullo discrimine, seu ante, seu post Caroli V. pragmaticam 14. *de feud.* præscripta dicantur. Nam contra rationem juris quidam inter pragmaticos censuerunt post Carolum Antonium de Rosa *in prax. ci-*

De jur. bar. intr. feud. terr. 239.
civil. c. 10. n. 80. in jurium id genus
possessione baronem tuendum, si ea an-
te Carolum V. præscripta probentur.
Proinde consonant cum veteribus Regni
legibus divales literæ felicissimi Ferdi-
nandi quinto Kal. Januar. ann. 1766.
quibus cautum, ut, quoquo oppidani
vellent, frumentum terendum deferre
possent, neque in pistrino baronum id
molere eos cogi jus esset. Recte etiam,
hodierna fori praxi sanctius instituta, se
faciles non præstant judices, ut barones
jura prohibitoria obtendentes in posses-
sione tueantur, nisi ea expressim, *cum*
jure scilicet *prohibendi*, in investitura
concessa fortasse fuerint. Sed & in fo-
ro eo jure utimur, ut in expressa con-
cessione cum feudorum incolis humanius
quidem agatur. In ejusmodi enim con-
cessione mercimonii quidem causa jura
prohibitoria per oppidanos usurpari ne-
queunt, ipsis tamen usu proprio non in-
ter.

terdicitur, nisi & de eo usu inhibendo expressim in investitura facta sit mentio, ut rerum periti norunt.

XV. Quod ad Siculos, quamdiu ab initio olim eidem cum Neapolitanis Principi paruerunt, eorum conditio in juribus prohibitoriis cum nostratibus aut æqua fuit, aut fortasse melior. Ubi enim Sicilia per Robertum, ejusque fratrem Rogerium est debellata, unius apud Nortmannos potentia firmata jam erat, &, quod usu in regionibus Neapolitanis venerat, sub Nortmannici Principatus incunabula nulla in Sicilia aristocratiae imago, neque usquam ibi dynastæ, qui injustis oneribus oppidanos attererent. Nam alibi quidem evici, quam vigilans Carolus Neapolus imaginarios illos commilitones in Sicilia somnariis, quo tempore primum Siculi in Nortmannorum potestatem venerunt. Enimvero recepta illa apud Neapolitanos investitu-
ræ


re formula cum angariis, parangariis, pistrinis, trapetis, & id genus aliis, sub postremis Aragonensibus Siciliam quoque pervasit. Et ea igitur barones Sicilienses abusi præsertim per absentiam Principum juribus prohibitoriis promiscue exercendis feudorum incolas afflixerunt. Ita ad felicissimum Ferdinandum usque in Sicilia adversus oppidanos graviores præ Neapolitanis injuriæ, easque graphice de more suo describit doctissimus Simonetta in plena opinione sua ad Proregem Siciliæ ea de re missa.

XVI. Porro temporibus minus iniquis ad Siciliam quoque extendere doctores Caroli V. pragmaticam 14. *de baron.* licet Neapolitanis tantum regundis ea promulgata foret. Et ibi tamen pragmatica isthæc eam interpretationem acceperat, ut prædictorum jurium possessio baronibus addiceretur, si ante illius promulgationem ea usu se cepisse appro-

barent. Proinde apud Siculos oppidani miseris modis per barones deglubebantur: ita vero res isthæc in apertos tumultus erupit occasione eorum, qui præscriptionis obtentu jura prohibitoria severius exercebant. Quapropter faustissimus Ferdinandus libello supplici per oppidanos Ficarræ interpellatus, cum rescivisset, quot injustis oneribus attererentur feudorum incolæ, divalibus literis eorum jurium radices ipsas præcisum ivit sexto id. Novembr. ann. 1788. Ea felicissima Siciliæ die vetuit Princeps optimus, ne jura prohibitoria sibi baro titulo præscriptionis ascisceret; ab iis baronem abstinere se jussit, nisi ex primæva concessione titulum exhiberet, & cum jure prohibendi expressim concessa forent, ut de Neapolitanis supra docuimus. Ne qua vero in Principis absentia oppidanis inferretur injuria, si qua id genus jura expressim concessa essent, feudorum in-

co-

colis facultatem indulfit, ut, soluto baroni pretio, ab iis pro arbitrio se redimere possent. Ita, quod ad jura prohibitoria, Neapolitanorum, ac Siculorum ferme æquata conditio, ac non minus oppidanorum commodis, quam baronum indemnitati consultum.



TITULUS ULTIMUS

*De jurisdictione baronibus concedi solita
ex jure seu Neapolitano,
seu Siculo.*

PRimum omnium satis constat, jurisdictionis vocabulo designari generatim omnia, quæ auctoritate publica in Civitate Magistratus expediunt, seu necessariam, seu voluntariam jurisdictionem explicant. Exploratum est quoque, eodem vocabulo contineri non

solum jurisdictionem in causis nummariis explicari solitam, sed & gladii potestatem, seu merum imperium, quo in facinorosos leges animadverti jubent. Ubi tamen accuratius loquuti sunt veteres, jurisdictionem dixerunt, quæ in causis nummariis versaretur; coercendorum criminum facultatem *merum imperium* appellarunt *l. 3. ff. de jurisdic.* Gladii facultas merum imperium dicta fuit, quia vehementior ea quidem erat, ut ea esse plerumque solent, quorum naturalis vigor nulla admixtione sit imminutus. Hinc & facultas modice coercendi, quæ & simplici jurisdictioni necessario inest, mixtum imperium est appellata, quia lenius id quidem erat, & ultra modicam coercionem haud excurreret. Conf. Noodt. *de jurisdic. & imper.* *l. 4.*

II. Porro ipsa ratio Civitatis exposcit, ut seu merum, seu mixtum imper-

pe-

perium in ipsa summa potestate, velut in fonte suo, residere dicatur, seu penes populum in Republica, seu penes Principem sub unius imperio. sit summa potestas. Sicubi igitur in jure civili penes magistratus jurisdictio dicatur esse, id eo pertinet, quod vi magistratus, non alieno mandato eam expediant. Nam ex regulis Romani juris neque merum, neque mixtum imperium ad magistratus jure dominii pertinere potest. Enimvero, feudorum instituto recepto, quemadmodum in utili baronum dominio feuda cœperunt esse, jurisdictio quoque intra feudi territorium concedi solita ad eos veluti jure dominii pertinere cœpit: ita vero feudalis jurisdictio patrimonialis evasit. Cum tamen, ut jura Majestatis reliqua, sine concessionem Principis a privatis jurisdictio possideri non possit, ipsi barones nudo possessionis titulo jurisdictionem sibi rueri

nequeunt , nisi eam in investitura expressim acceperint . Vide Thomas. *de præscript. subdit. advers. Princip.* Sed videamus , quibus initiis jurisdictio baronibus concedi cœperit .

III. Quod ad jurisditionis feudalis initia , complures putarunt , ea nusquam olim intra feudi territorium barones usos , eaque longo ab instituto feudali tempore partim usurpatione , partim concessione Principum uti cœpisse . Ea de re nescio quid singulare post Thomasium protulit Heineccius *in exercit. de orig. atq. indol. jurisdict. patrim.* Is enim existimat , jurisditionem patrimonialem primum in homines proprios , & adscriptitios per Germanos exerceri cœpisse ; mox eorum exemplo barones inter feudorum incolas jurisditionem feudalem sibi adrogasse . Quasi vero facilius fuerit hominum propriorum possessoribus , quam baronibus vi militari pol-

pollentibus Principum jurisdictionem invadere. Ea in re igitur veri ego similima putavi semper; quæ docet Montesquieus *esprit des loix* livr. 30. chap. 20. Ibi enim vir doctus evicisse videtur, jurisdictionem feudalem cum ipsis feudis Francorum opera apud Gallos enatam; eam quidem in vetustissimis feudorum investituris concessam non inveniri; id ipsum tamen inde factum, quia jurisdictio feudis ipsis necessaria veluti consequentia olim inesse credebatur. Sane ex monumentis ab eo productis constare videtur, feudorum concessionem duplex *servitium* complexam esse, quorum alterum militia, alterum jure in feudi territorio dicundo præstabatur. Eo accedit, quod in capitularibus Caroli Magni *fredum* a reis præstari solitum non ubique Principibus addicitur: nam intra feudorum territorium baronibus exolveri jubetur. Id autem intelligi quidem

Q 4

haud

haud potest, nisi ponatur, per id temporis barones jurisdictionem exercuisse. Fredum autem erat veluti publicæ tutelæ pretium reis præstari solitæ adversus ultionem eorum, qui per facinus læsi forent. Vide Montesquieum *loc.cit.* c. 18. & 22. Facile igitur mihi persuaserim, jurisdictionem feudalem ex veteribus Germanorum moribus sub ipsa feudorum incunabula in Galliis fuisse institutam. Nam Tacitus memoriæ prodit, Germanorum proceres per vicos, & pagos jus dicere solitos *de morib. German.* 12. Utcumque sub feudorum apud Gallos initia ea de re receptum jus fuerit; barones in Galliis ab ipso sæculo decimo merum, ac mixtum imperium expederunt, ut liquet ex statutis Sancti Ludovici *cap. 24. & sequ.* Quod autem magis mirum, eorum sententiæ prorsus definitivæ erant, & adversus eas nusquam patebat appellationi locus, ut

ab exemplis liquet a Bruffello productis
de feud. libr. 3. c. 11. & sequ.

IV. Porro reliquorum Francorum exemplo Nortmanni quoque barones in suo quisque territorio omnimodam expediebant jurisdictionem , & ipso merito imperio utebantur . Enimvero cum Robertus , ejusque frater Rogerius probe nossent , sub unius imperio neque fortunas , neque capita civium e privatorum libidine pendere oportere , in provinciis bello partis alias rationes cœptarunt . Exemplum Wilelmi quidem , qui non ita pridem Anglos subegerat , eis persuadere poterat , ut *ima* saltem , quam appellant , jurisdictione finerent barones uti . Id ipsum illis monstrare videbatur Caroli Magni institutum , qui & regnandi arte per ætatem suam reliquos Principes præcellebat , & jurisdictionem id genus beneficiariis non denegavit *capitul. ann. 812. cap. 3. §. 4.* *Li tamen non*

non ignorabant , ea in re facillime præstitutos transiliri limites ; ita barones in Galliis merum , ac mixtum imperium usurpasse ; id ipsum apud Anglos barones aggressos . Vide Robertson. *in Carol. V. not.* 23. Hæc perpendentes Nortmannici Principatus primæ illi conditores in provinciis Neapolitanis , ac Siculis ne imam quidem jurisdictionem in causis minusculariis exerceri solitam baronibus reliquerunt .

V. Quæ hætenus de præsentī argumento posuimus , mire confirmant , cum quæ de Rogerio Rege sunt memoriæ prodita , cum Gvilelmi I. & ipsius Frederici leges , qui in codice suo politicam Nortmannorum constitutionem restituendam curavit . Nimirum , quod ad Rogerium , ubi , deficiente Roberti virili stirpe , ei cesserunt omnia , in constitutione politica ordinanda vestigiis Romanorum hæsit . Apud Romanos scilicet

cet rerum dominos provinciarum constitutio ita ordinata fuit, ut in Civitate provinciæ principe præses jus diceret; in singulis provinciarum oppidis per Duumviros jurisdictio expediretur; ab iis ad præsidem appellandi facultas esset. Eo igitur exemplo Rogerius in Civitatibus provinciarum principibus merum, ac mixtum imperium per præsidēs, seu justitios exerceri jussit; in singulis provinciarum oppidis mixtum imperium explicari per bajulos; adversus eorum sententias justitios appellari; barones quaqua uti jurisditione vetuit. Quibusdam tantum baronibus de se fortasse benemerentissimis in causis tantum nummariis jurisditionem concessit. Ita quidem in ejus Græco diplomate apud Ducang. *in voc. bancus*. Καὶ δίδομεν αὐτῷ ἀδειαν τὴν εἶναι βαρχον, τὴν κρατύν κριτας, καὶ κρινειν. *Potestatem ipsi facimus habendi bancum, constituendi judi-*

dices, & judicandi. A patris institutis
 Gvilelmus I. ea in re non recessit, ut li-
 quet ex constitutione *locorum bajuli. de*
cognit. caus. cor. bajul. Eamdem poli-
 ticam constitutionem in provincias Nea-
 politanas, ac Siculas per primos Nort-
 mannos investam rerum inibi potitus
 confirmavit Fridericus II. eorum in u-
 troque Regno successor cum alibi, cum
 in constitutione *cum satis. qua pœni.*
univers. teneant. Sic enim ibi. *Officia-*
les tantum a nostra Majestate statutos,
vel de mandato nostro, magistros justitiarios,
camerarios, bajulos, & judices
ubique per Regnum nostrum volumus es-
se, & tam jura nostra, quam nostrorum
fidelium volumus ministrare. Stet illud
 igitur, sub Nortmannis, ac Suevis ne
 ima quidem, nedum omnimoda jurisdi-
 ctione barones usos, nisi *bancus, & judex*
 singulari Principis privilegio eis in in-
 vestitura concessus esset. Sed videamus,
 qui-

quibus initiis Regni baronibus primum omnimoda in causis nummariis jurisdictionis, deinde merum imperium, & ipsa gladii facultas concedi cœperit.

VI. Quod ad civilem jurisdictionem, cui ex regulis Romani juris mixtum imperium inesse jusserunt Neapolitani Principes, ea cum in Regno Neapolitano, cum Siculo citius sunt potiti barones. Ea quidem sub Nortmannis, ac Suevis in ipsis oppidis feudi titulo concessis penes bajulos erat a camerariis designari solitos *constit. magistri camerarii. de præstand. sacram. bajul.* Sub ipso tamen Rege Rogerio exempla non desunt, unde liquet, civilem jurisdictionem, ac mixtum imperium baronibus fuisse concessum. Id primo constat ex ipsius Rogerii Græco diplomate, quod ex Ducangio supra exhibuimus §.5. Id ipsum inculcat producta Gvilelmi I. constitutio *magistri camerarii*. In ea enim edi-
ci-

citur, id juris ad bajulos pertinere vel camerariorum jussu, *vel mixto imperio partium*. Nam ibi, ni fallor, *partium* vocabulo designantur barones ipsi, quorum electione prævia, intra feudi territorium bajuli jus dicebant. Si enim singulari privilegio jurisdictio baronibus concessa foret, bajulos per ipsos creari oportebat, ut & hodie fieri solet, qui mixtum imperium explicarent. Si alia deessent, id apprime evinceret Rogerii diploma supra productum, ubi, concessa *banco*, facultas, seu potius necessitas constituendi judices in barone ponitur.

VII. Licet autem sub Nortmannis, ac Suevis baronibus quibusdam de Principe præclare meritis omnimoda in causis nummariis jurisdictio concedi soleret, eam tamen expressim concedi oportebat. Hinc feudi publicationem adversus eos Fride-ricus indicit, qui justitiarum munia in concessa oppida usurparent *constit. ea quæ*
ad

ad speciale decus . quod null. prælar. com. bar. Hoc autem institutum non solum sub Nortmannis , ac Suevis , sed & sub primis Andegavenfibus recepti juris in Regno fuit . Sub primis autem Andegavenfibus adeo exploratum id videbatur, ut pluribus oppidis veluti feudi , seu potius muneris , & gestionis titulo , atque usufructuario jure a Carolo I. concessis ejus filio natu majori , & certo jam Cæsari , intra eorum territorium civilem jurisdictionem , & mixtum imperium expressim ei concedi oportuerit , ut liquet ex reliquiis *regeſt. concess. a sereniss. Reg. Car. I. fact. ann. 1269. fol. 106. & sequ.* Adeo certum scilicet sub ipsis Andegavenfibus putabatur , jurisdictionem feudis non hære , ut ne in Regum quidem liberos , & in Regnum successuros sine expressa concessione transferre crederetur . Licet autem sub postremis Andegavenfibus civilis jurisdictio
pas-

passim concessa reperiatur ; & hodie tamen ea necessario feudis non inest . A baronibus igitur expediri non potest , nisi speciatim in investitura concessa fuerit . Si secus quis faxit , usurpatæ jurisdictionis reus censeretur .

VIII. Quod ad merum imperium , seu jurisdictionem in criminibus coercendis explicari solitam , numquam sub Nortmannis , ac Suevis ea facultate baronibus uti concessum . Id rei diplomaticæ periti viri passim advertunt . Proinde sublestæ fidei diplomata ego putarim , in quibus per Nortmannorum , Suevorumve tempora facultas gladii cuiquam concessa legitur . Conf. Marchion. Varg. in *examin. chartar. Cartus. pag. 595. & sequ.* Id ipsum sub primis Andegavensibus religiose servatum , ejusque rei respectu cum ipso Carolo II. certo jam Cæsare parce , ac restrictè actum . Quod enim supra monuimus , usufructuario jure

re tot oppidis ei a parente concessis, in reliqua quidem civili jurisdictione iustus est uti; merum tamen imperium vix intra Salerni moenia ei demandatum. Id & Marinus Freccia narrat *de suffeud. lib. 2. auctor. 2. n. 21.* & liquet ex reliquiis ipsis *regeft. concess. a Carol. I. factar. ann. 1269. fol. 106. & sequ.* Hinc intelliges, cur, sub eodem Carolo I. comite Brennae, & Lycii obtendente, sibi merum imperium in investitura fuisse concessum, iustituario Apuliae is rescripserit, *id incredibile* sibi videri, ea rescripto ratione addita, *quod in singulis concessionibus terrarum per nostram Excellentiam factis omnia criminalia nostrae sunt curiae reservata* *regeft. 1275. l. a. fol. 99.* A majorum suorum vestigiis ea in re non recessit Joanna I. Neque enim genuinum ejus diploma usquam occurrit, in quo privato cuiquam gladii facultas

Tom. III. R con.

concessa legatur. Id tantum pro illis aliquando factum, qui aut cognatione, aut affinitate sibi devincti forent. Ita quidem Philippo Andegavensi leviro suo ob nuptias cum Ludovico illius germano initas in feuda ei concessa jus gladii datum, ut constat ex *regeſt. ann. 1318. l. c. fol. 12.*

IX. Porro sub ipsa Regina Joanna II. infirmioris ea quidem ingenii, ac jurium Majestatis incuriosa nusquam feudi titulo facultas gladii privatis concessa legitur. Si quando baronibus ei acceptissimis indultum merum imperium, id non feudi titulo in eos translatum; tantum intra feudi territorium cum mero, & mixto imperio capitanei, quamdiu adviverent, ii sunt constituti. Ea de re ita scribit Afflictus ad *constit. ea, qua ad speciale decus. n. 3.* Ego vidi aliqua privilegia concessa aliquibus comitibus, & baro-

ronibus, per quæ apparebat; quod Regina faciebat eos Regios capitaneos ad vitam cum mero, & mixto imperio in terris eorum. Hinc autem liquet, vel falsa de Roberto prodere Angelum Constantium scribentem *hisor. libr.6.* eum plurimis baronibus merum imperium concessisse, aut non feudi quidem titulo, sed *capitaneatus ad vitam* pro more temporum id factum existimasse. Neque enim ad Alfonso I. usque genuinum monumentum usquam occurrit, quo merum imperium *baroni*, & *heredibus* concessum feudi titulo evinci possit. Stet illud igitur, ad eundem Alfonso usque gladii facultatem cuiquam jure feudi non fuisse concessam; si quis singulari Principum beneficio eam exercuit, non feudi quidem titulo, sed *capitaneatus ad vitam*, seu magistratus jure illam exercuisse.

X. Jam vero vulgata fabula docto-

rum est, Alfonsum I. merum imperium generatim concessisse baronibus, ejusque monstroso privilegio facultatem gladii non tantum ad ætatis suæ barones, sed ad heredes etiam jure feudi pertinere cœpisse. Ea de re quidem Alfonsum bis per barones precibus aditum fuisse comperio ann. 1442. Comitiis per id temporis Neapoli habitis, de mero imperio is interpellatus postridie Kalendas Martii respondit, sibi non placere, ut omnes Regni barones mero imperio uterentur; eo uti se tantum pati, quibus expressim concessum jam foret *capit. Civit. Neap. pag. mih. 6.* Enimvero ea in re Alfonsus sibi non constitit. Paucis enim post mensibus, cum barones Ferdinandulum suum in Regno Neapolitano Cæsarem acceptassent, ea de re rursus precibus aditus, de oppidanorum corio eis gratificatus merum ipsis imperium generatim indulgit

capit. Civit. Neap. pag. mib.8. His ita se habentibus, ad incitas hic me redigit Regens Galeota *controvers. rom. 1. in decis. ad controvers. 53.* Ibi enim is narrat, eundem Alfonso anno 1450. octo post annis scilicet, ex quo gladii potestatem baronibus concessisse vidimus, Francisco Caraphæ in tres suburbanos pagos merum, ac mixtum imperium indulgisse, quamdiu superstes foret, eo adhuc addito, ut ei jus esset, id ipsum in filiorum aliquem suo arbitrio eligendum extendere. Cui bono igitur id privilegium, si octo ante annis ab eodem Alfonso baronibus omnibus gladii potestas concessa jam fuerat? Hæret hic mihi aqua, neque alius in jure Neapolitano locus me magis excruciat.

XI. Ut igitur his me trîcis expediam, ita rationes inierim, Alfonso scilicet tempori inservientem, ut Ferdinandus Cæsar agnosceretur, dicis tantum causa

merum, ac mixtum imperium baronibus concessisse; mox; solutis comitiis, perpenso, vim Principatus eo privilegio ferme resolvi, fidem non liberasse; retro Principum sequutum exempla paucis tantum baronibus, qui viribus præcellerent, ac periculum facessere Ferdinando possent, sub veteri titulo *capitaneatus ad vitam* merum imperium concessisse; id ipsum factitasse Ferdinandum ad demerendos illos, quorum studiis ei potissimum opus, ut adversus Callixtum III. se tueretur. Is enim adversus Ferdinandum implacabilior, ac veluti supposititium Alfonsi filium eum traducens constitutione sua ipsum Regno privaverat. Vide *hystor. Urb. libr. 27. sub. init.* Enimvero his quidem initiis Ferdinandi liberi in dies infirmiores inconsultis concessionibus, ac pessimo publico merum imperium profanarunt. Passim enim in investituris id elargiti sunt
feu-

feudali nexu; ita & gladii potestas veluti patrimonialis evasit. Sub Ferdinando autem paucis, & ad vitam usque, sub ejus liberis facultas isthæc baronibus, & heredibus passim concessa fuit. Ita vero capita, ac fortunæ oppidanorum in discrimen adducta. Id autem perpendens Matthæus de Afflictis ad *constit. occupatis nobis. ut. null. offic. n. 4.* hæc adlinit, *Quid dicam, hodie, cum Reges Aragonum concesserint merum, ac mixtum imperium in terris baronum ipsis, & eorum heredibus in perpetuum in eorum castris, & terris? Ego volo ponere frenum in ore meo. Sed & mox ultra processum. Ab initio enim concessæ baronibus primæ tantum, quas appellant, instantiæ; mox secundæ, ac tertiæ quoque, atque ipsa literarum arbitrariarum facultas: qua quidem de re & memet ori meo frenum præstat imponere. Vide *jus Regn. libr. I. §. 6. & sequ.**

XII. Jam vero quod supra de civili jurisdictione monuimus, eam scilicet sine expressa concessione Principis per barones expediri non posse, id potiori jure de facultate gladii, seu mero imperio intelligi quidem oportet. Licet igitur, ut sunt in Regno res hodie, feuda cum mero imperio concedi plerumque soleant, eo tamen nequeunt uti barones, nisi eis expressim concessum in investitura fuerit. Nam, ut recte docet Afflictus ad *ad capit. de capit. qu. cur. vend.* jus gladii inter potissima Majestatis jura referri debet; idem velut accessio feudi existimari non potest. Id vel inde liquet, quod per plura sæcula sine ea facultate feuda concedi sunt solita. Aliunde adeo exploratum in jure Neapolitano est, neque merum, neque mixtum imperium feudis habere, eorumve accessionem esse, ut sexcenta produci possint exempla, unde liquet, feudi

di quidem titulo alteri prædia , alteri aut jurisdictionem civilem , aut coercendorum criminum facultatem fuisse concessam . Exempla quoque investiturarum non desunt , in quibus primo feudum in prædia , deinde longo post tempore aut in causis nummariis jurisdictio , aut gladii potestas concessa fuerit . Ea vero in specie si recens meri , mixtivi imperii concessio sit , successio in prædiale feudum primo concessum antiqui feudi jure regetur ; meri , mixtive imperii successionem jure feudi novi regi oportebit . Vide Regent. Galeot. tom. I. *controvers. in decis. ad controvers. 53. artic. 3.*

XIII. Cum igitur , inspecto jure Neapolitano publico , sine expressa concessionem Principis merum imperium expediri nequeat , frustra sunt quidem doctores , qui ob investituræ clausulas , quas monstroso vocabulo *prægnantes* appellant, illud

illud baronibus asserunt. Proinde recte scribit Afflictus *ad consuet. ea quæ ad speciale decus. n. 22.* ne eo sub obtentu quidem facultatem gladii barones usurpare posse, quod *cum plena, & omni jurisdictione* ipsis feudum sit fortasse concessum. Ea Afflicti sententia non solum accuratioribus doctoribus se commendavit, sed & ipsis Friderici verbis firmari videtur *in prædict. consuet.* Ibi scilicet Fridericus ipsa feudi publicatione barones puniri jubet, qui sine expressa concessionem merum imperium usurparent; vetat etiam, *per illicitas præsumptiones* sibi quempiam illud asserere. Illicitæ autem illæ præsumptiones clausulas illas *prægnantes* respiciunt, quibus innixus quispiam per verborum aueupia in defectu expressæ concessionis facultatem gladii sibi adrogaret. His igitur regulis Sacrum Consilium hærens recte pronuntiavit, per baronem alienatum merum im-

pe.

perium non videri , ac penes vendito-
rem id esse pergere , licet cum Regis
assensu venditum feudum diceretur *cum*
jurisdictione , & *pertinentiis suis nil*
reservando , ut memoriæ prodit Affli-
ctus *decis.* 22. Nunc , quod superest ,
videamus , quibus initiis Siculi quo-
que barones mero , mixtoque imperio
potiti fuerint .

XIV. Quod ad barones Sicilienses ,
ipsis merum imperium citius , quam ba-
ronibus Neapolitanis concessum compe-
rio . Id enim illis concedi coepit ab ipso
Martino I. qui , sæculo decimo quar-
to ferme inclinante , apud Siculos Re-
gnum habuit . Vide *capit.* 10. & 47.
Reg. Martin. In eo autem privilegio
postulando singulare fuit , quod pro illo
impetrando utilitatem oppidanorum ob-
tendere barones , ne , si coram magna Cur-
ria , aliisve , quibus quæstio de crimi-
nibus demandata foret , causam suam
tue-

tueri cogerentur feudorum incolæ, expensis gravioribus attererentur, ut liquet ex Ferdinandi II. *capit. 127.* Verum ad populum phaleras, neque mihi quisquam persuaferit, gladii potestatem pro oppidanorum commodo inhiasse barones. Neque vero baronibus omnibus apud Siculos mero imperio uti licet, sed iis tantum, quibus id expressum concessum in investitura fuerit. Sæpius quidem in Sicilia sunt adnixa feudorum possesores, ut sine discrimine potestate gladii armarentur barones omnes: verum præter alios eam spem prorsus præcisum ixit Philippus II. Carolo V. prognatus *capit. 94.*

XV. At vero qui apud Siculos mero utuntur imperio, eo non eodem modo potiti sunt omnes. Alii enim, ut scribit Rex Martinus *capit. 47. gratiose, & ad Principis beneplacitum* id obtinuerunt. Alii emptionis, aliove oneroso titulo sunt
il-

illud adepti . His ipsis vel simpliciter ,
vel *cum jure redimendi* , quod vocant,
gladii potestas concessa fuit . Interest
autem , qua cuique formula merum im-
perium concessum ponatur . Quibus *ad*
beneplacitum concessum id fuerit , ri-
gore quidem juris inspecto , videtur pro
arbitrio Principis posse adimi . Verum
cerebrosa sua æquitate pragmatici pas-
sim docent , eo barones temere privari
non oportere , nisi justa causa profera-
tur . Vid. de Pont. *de potest. Proreg.*
in tit. de elect. offic. n. 4. & sequ.
& Montan. *de regal. pag. 136.* Quibus
simpliciter potestas isthæc concessa fue-
rit , ii jure ordinario neque ea privari
possunt , neque oblato pretio cogi , ut
illa se abdicent . Enimvero quibus *cum*
jure redimendi merum imperium sit con-
cessum , pretio quidem restituto seu per
Principem , seu per oppidanos , statim
ea potestate excidunt . Ceterum quoquo
mo-


modo merum imperium baronibus Siculis concessum dicatur, id eorum respectu patrimoniale non erit. Rex enim Martinus gladii facultatem non patrimonii feudalis intuitu, sed jure perpetui magistratus per barones expediri jussit: *constituendo eosdem in causis criminalibus justitarios, & officiales d. capit. 47.* At at inter rabiem canis in Sicilia diutius morari piget. Aliunde


. . . nos immensum spatium confecimus equor,

Et jam tempus equum fumantia solvere colla.

F I N I S.

VA11546841





167

B

33



